


NTANGU YA KUYONZIKA

 Matondo na nge, Mpangi Williams. Mbote, bankundi. Ya kele bweso na kuvwanda awa na suka yayi. Mpe kuzwa nkotosolo ya mutindu yayi, ya ke salaka munu kukitala fioti mingi. Mpe mu kele. . .mu vutulaka matondo mingi samu na ntangu yayi ya mbote ya kukwisa, na suka yayi, na Phoenix.

² Mu ke bambuka moyo ntangu mu kumaka ntete na Phoenix, mu vwandaka na bamvula pene kumi na sambwadi. Kieleka ya me kula kubanda ntangu yina. Kuna na suka yayi wapi kisika beto kumaka na Phoenix, na mpasi beto lendaka tuba ntangu beto bikaka Tucson mpe kwendaka na Phoenix. Ya kele kaka ya kukangama kintwadi, bisika mingi me monika. Bisika beto vwandaka kwenda awa mpe na yina beto vwandaka nata mwa bampunda ya fioti kuna na ntoto ya kuyuma, mpe ntangu yayi ya kele na ba-motel mpe ba-cent kumi, mpe nionso yina. Mpe, ya kieleka, yina ke sala ti mu kuma kiboba.

³ Mpe na yina mu vwandaka awa pene-pene ya mpangi ya munu ya bakala ya mbote awa, Mpangi Valdez, mpe mu—mu tubaka, “Mbote, mpangi-bakala. . .” Beto vwandaka zonza, mpe mu tubaka, “Mbote, ya kieleka, mu ke na kukumaka kiboba.” Mu tubaka, “Mu me bakula ti, ba-kilometre ya munu ke na kutunga yinzo.” Mu tubaka, “Vingila tii nge ke kuzwa nsungi ya munu,” to kima mutindu yina. Mu vwandaka—mu vwandaka me yituka na kuzaba ti yandi vwandaka pene ya bamvula kumi na zole kulutila munu. Na yawu, munu, na yina mu kuwaka mbote mingi kuna. Mu tubaka, “Mpangi Valdez, mu zola nge. . .Bantangu yikwa nge ke longa Nsangu ya mbote?”

Yandi tubaka, “Bamvula makumi tanu.”

⁴ Mbote, mu vwandaka mwana mosi ya fioti ntangu yandi vwandaka longa. Na yina mu tubaka, “Mu ke zola ti nge baka lukutakanu na suka yayi, Mpangi Valdez.” Mu tubaka, “Mu—mu kele ntwenya ya bakala,” mu tubaka, “Mu ke yinaka kuvwanda awa mpe kumeka na kuzonza,” mu tubaka, “bakuluntu ya munu.”

⁵ Mpe yandi sekaka kaka, yandi tubaka, “Samu na yinki nge ke banza ti mu me nata ditoma awa?”

⁶ Na yina mu ke vutula matondo mingi samu na Mpangi Valdez. Yandi vwandaka tuba na munu samu na yina me tala kuzwa ntangu ya kupema na yinzo awa. Ya kele—ya kele kieleka mbote. Mu ke sepela na yawu. Ba bokilaka munu na kubasika mpe kutala bawu ntangu mosi. Mpe ya kele awa pene-pene ya New River. Mu zaba ve kana mosi ya beno zaba kisika ya kele, to ve. Mu ke ndima ti, kana Valdez mosi kele na manima ya yawu, ya kele mbote mingi.

7 Na yina, ntangu nionso mu ke kwisaka na lukutakanu mosi, Mu ke kutanaka ntangu nionso na muntu yina—yina me belukaka na balukutakanu to kima mosi. Mpe ntangu mu vwandaka ya kutelama awa na mesa na suka yayi, mpangikento mosi ya ntalu yina kele ya kuvwanda awa, na nkumbu ya Erb, yandi me katuka awa na Michigan. Mwana ya yandi ya bakala kele muzabisi awa na station yayi ya Baklisto. Mpe yandi vwandaka tuba na munu samu na yina me tala kuvwanda na lukutakanu kuna na Flint, na Michigan. Yandi kele na kalati ya bisambu, mpe yandi vwandaka meka na kusambila samu na yandi, mpe yandi salaka yawu ata fioti ve. Mpe yandi kele ya kubela mingi. Mpe kaka awa na suka yayi, mu banza ti Nzambi belusaka kento yayi, ya kutelama kaka awa na lweka ya kisika.

8 Mu tubaka, “Wapi ntangu ntangu yayi! Ya me vwanda pene ya bamvula kumi na zole, kumi na yiya me luta, mpe ntangu yayi na mbanza yina ba ke bokilaka Phoenix, Phoenix kele kima yina me tungama—tungama na bakubeba.” Mu tubaka, “Mbote, ya kele kima mutindu mosi me salama na nge na suka yayi. Nzambi tungaka nge, mu banza, na suka yayi, na mavimpi ya kubeba na mavimpi ya mbote.”

9 Mu vwandaka kuwa kaka mazono na nkokila, mbokolo vwandaka kwiza, kulutila mingi. Mu kele mfinangani ya nge ntangu yayi, mu ke zingaka na Tucson mpe lubokilu vwandaka mingi mu lendaka ve kubasika samu na kubasisa bawu nionso, na yawu mu vwandaka sambila kaka samu na bawu na nzila ya allo-allo. Mpe bawu, na yina, bawu zolaka bika kaka banumelo ya bawu.

10 Mpe ya vwandaka na mama mosi, ya bamvula makumi nana na sambwadi, Muklisto mosi ya kiboba, yandi vwandaka na ngaanda ya mabanza ya yandi mwa ntangu fioti. Yandi vwandaka na bala-bala, ke boka, mpe ke bokila bapulusu, ti muntu mosi bakaka bébé ya yandi. Bamvula makumi nana na sambwadi, beno me mona, mabanza ya yandi bikaka yandi. Mpe yandi vwandaka kento mosi ya kiboba ya luzolo. Mu zabaka yandi ata fioti ve na luzingu ya munu. Mpe na yawu Billy kwendaka mbangu, mpe tubaka, “Kwenda mbala mosi na bisambu,” yandi tubaka, “mama yayi kele ya kubela mingi, mpe ba ke banza ti yandi ke kufwa.” Yandi tubaka, “Yandi kele kaka . . . yandi kele na zulu ya yandi mosi.”

11 Na yina mu vwandaka tula kaka mukanda, mpe mu kwendaka na kivinga mpe mu sambilaka. Na mwa ntangu fioti, yandi vwandaka ya kulala. Yandi vumbukaka, na mavimpi ya mbote, yandi kudiaka madia ya nkokila ya muvimba, na galasi nionso mpe gato, na manima ya yawu. Yinga.

12 Beno me mona, Nzambi kele na ngolo nionso. Yandi kele kieleka, Yandi lenda . . . Beno fwana vwanda kuna ve; beno yufula kaka—kaka yayi.

13 Mu ke kwikila ntwadisi ya beto awa, na suka yayi, to muntu mosi, to mu banza ti ya vwandaka Mpangi Valdez na kisambu ya yandi, yandi tubaka, “Beto me kuzwa yawu ve samu beto me lomba yawu ve. Beto me lomba yawu ve samu beto me kwikila ve.”

14 Mu ke sepalaka na kuyimba ya bantu yayi ya bantwenya awa. Mpangi Valdez, beto bantu ya ntama, vwandaka bakula bukieleka ya bakala yina ya ntwenya yina vwandaka pesa kimbangi yina, ti yandi zabaka Yesu.

15 Ntangu yayi beto zaba ti beto ke mona, bambala mingi, mwa bayiya yayi mpe bankunga, mu . . . yayi kele ndinga ya longi yankaka, Mpangi Valdez tubaka, “Bantangu yankaka bawu vwandaka kwisa makumi makumi zole.” Samu, yawu ke monana mutindu, bubu yayi, ya kele—ya me kuma kulakisa na kisika ya busantu mpe ya kusungama yina ba-pentecotiste kuzwaka ntete.

16 Mpe kusungama ya bana-babakala yayi, mu—mu me sepela na yawu. Mfumu kusakumuna beno bana-babakala. Mpe mu vwandaka . . .

17 Mu kele ve mingi ya televizyo. Mutindu beno zaba, kieleka mu ke teleminaka yawu. Mpe kieleka mu ke futila kisika mosi kuna na Tucson tii kuna beto ke yidika kisika ya beto, kisika wapi beto ke vwanda na yinzo ya beto yina ba tulaka kuna, kana Mfumu kuzola. Mpe mama yina vwandaka futila yinzo yango, yandi kele nkundi ya Muklisto ya mbote, kasi yandi vwandaka na televisio na kati ya yinzo. Mbote, mu kele na bana ya bantwenya, mpe beno zaba mutindu bawu kele, na yawu bawu ke salaka mbangu na yawu. Na yawu, mwa basuka zole me luta, ntangu mu katukaka na nzietelo mosi na Mpangi Stromei . . . Mu zaba ve kana Mpangi Stromei kele awa na suka yayi, to ve, yandi kele ntwadisi ya yinsi ya kimvuka yango na Tucson. Mwana ya munu ya kento ya ntwenya, yina kele ya kuvwanda na manima awa, bokilaka munu na kutala mbote, yandi tubaka, “Beto ke balula television, mwa ba- bankunga yiya,” to ya lenda vwanda nionso yina ya vwandaka.

18 Mbote, ntangu yayi, mu kele muntu ya masawula mingi, mpe mu—mu ke nyonga samu na yawu, kasi mu—mu—mu lenda vwanda kima yankaka ve kasi kaka yina mu salaka. Kana mu sala kima ya kuswaswana na kupakula ya munu mosi, mu kele muntu ya luvunu. Mpe mu ke zola ve kuvwanda yawu na ntuala ya beno bantu. Mu—mu zola kaka kuvwanda yina mu kele, mpe na yina beno zaba mutindu beto kele ya kutelama. Mpe mu—mu banza ti mu ke vweza mwa fioti mingi.

19 Kasi mu vwandaka kaka na yawu na kati ya ntima ya munu samu na kusawula yawu, samu ya monanaka kaka samu na munu mutindu mwa Hollywood mosi ba me tula kuna na zulu, kaka mingi ya kusala. Ya monanaka ve ya busantu mutindu ya lendaka vwanda. Mpe ba vwandaka yimba bankunga yango na—

na ntangu ya rock-and-roll, mpe basapatu ya wolo ya kubaluka. Mpe ya me kwiza ti Nsangu ya mbote me kuma kulakisa? Na yina, mu, kana ya kele yina ya kele, mu—mu zola ve kima ya kusala na yawu. Mu zola kima yina kele kieleka mpe ya kisina, mpe beto zola kubumba yawu mutindu yina.

²⁰ Ntangu yayi, mu—mu ke kwikila ti bakupindula zole yayi kaka awa, bampangi. Ti, beno ke kuwa munu kulutila mbote ntangu yayi?

²¹ Ntangu yayi, Kilumbu ya sambanu yina ke landa na suka, kana Mfumu kuzola, Mu kele na bweso ya nene ya kutuba na kimvuka, mbala ya munu ya ntete, na Flagstaff, na Arizona. Mpangi-bakala yayi awa, mu me zimbana nkumbu ya yandi, kele ntwadisi ya yinsi. [Mpangi-bakala mosi me tuba, “Chester Earl.”—Mu.] Chester Earl, Mpangi Chester Earl. Yandi kuzwaka kaka bweso ya kukutana na yandi na suka yayi, ntangu mu vwandaka pesa mbote na evangeliste ya mbote awa yina me katuka na Inde, mpangi-bakala ya Indien. Mpe yandi tubaka ti Kilumbu ya sambanu ke kwisa na suka mu ke tuba kuna. Ba me bokila beno na ntima ya muvimba na lukutakanu yayi. Beto ke na kivuvu ti Mfumu ke sakumuna beto.

²² Mpe na yina Kilumbu ya ntete yina ke landa na nkokila, na Tucson, ya kele feti. Mfumu me pesa munu lukumu ya kutuba na . . . na feti kuna, kilumbu ya makumi zole na zole ya—ya Ngonda ya kumi na zole, na Tucson. Ya kieleka ba me bokila beno na ntima ya muvimba na kukwisa na nkokila yina ya feti.

²³ Mpe na yina mutindu Mpangi Williams zabisaka ti mu fwana vutuka diaka awa, samu na mutindu ya mwa nkotosolo na ntwala lukutakanu kubanda.

²⁴ Mpe, na yawu, mu ke na kuzwa mwa kuningana kuna, Mpangi Williams? Ya kele . . . Yinki beno ke tuba? Ya kele kulutila mbote ntangu yayi? Ya kele kulutila mbote. Mbote.

²⁵ Kieleka mu banza ti mingi ya beno lenda kuzwa ntangu ya kuvwanda na mosi, to konso nkokila mpe kilumbu, ya lukutakanu. Ti, ya ke banda na kilumbu ya kumi na sambwadi, na ngunga ya sambwadi, na Lumingu na manima ya midi? [Muntu mosi me tuba, “Mosi na ndambu.”—Mu.] Ngunga mosi na ndambu. Na ngunga mosi na ndambu, na Lumingu na manima ya midi. Mu zola tuba mpe, kana Mfumu kuzola, Mu ke sambila samu na bambevo na—na—na kati ya balukutakanu yina, mpe mu ke sala nionso mu lendaka sadisa beno.

²⁶ Mpe bampangi ya balongi awa, na suka yayi, ya kizunga ya Phoenix. Kikuma mu me kwisa awa na couloir yayi, mu . . . Ntangu nionso mu ke kwisaka, mu ke salaka ntangu nionso mwa foto, mpe mu ke kima mbangu pene-pene ya mabuundu, konso dibuundu. Na yina mu ke mona yawu mutindu mpasi, samu ti mabuundu yankaka kele fyoti fyoti. Mpe kieleka beto zola ve kubika mpangi-bakala mosi samu ti dibuundu ya yandi kele

fyoti, mpe na yina ya ke sala yawu mpasi, bantu lenda kota ve. Na yawu kana . . . mu banzaka ti beto ke kutana kaka na kisika mosi mpe mu ke keba yawu munu mosi, mpe beto ke kutana kaka awa mpe beto ke kuzwa lukutakanu, kaka mwa lukutakanu ya kumwangisa nsangu, mpe kusambila samu na bambevo mpe nyonso. Ntete. . .

27 Mu banza ti kana mu manisa yayi yankaka, yayi kele mbote mingi wa? [Muntu mosi me tuba, “Ve, yina, ya kele bande.”—Mu.] Yina kele bande. Mbote mingi.

28 Mu banza ti ya ke vwanda mwa mbote mingi kana mu sala yawu mutindu yina. Mpe mu zola bampangi ya munu awa, ya mabuundu, ba-pasteur awa na Phoenix, kuzaba ti ya kele samu na yina beto salaka yayi, na kukwiza awa na couloir yayi, na yina beto nionso lendaka vukana na kisika mosi. Mpe beno lenda ve kukuma na bampangi nionso, ya kele na mingi ya bawu. Beno me mona yina me telama na suka yayi, mpe mu banza ti ya kele ve ndambu ya bawu. Na yawu beno lenda ve kuzwa bawu nyonso na mwa bilumbu yina beto kele na yawu awa, ntete, lukutakanu ya ntete.

29 Mpe mu ke ndima ti beto ke kuzwa ntangu mosi ya nene na kati ya lukutakanu. Beno ke kuwa banzonzi ya nene. Mpangi Cash yayi kele Cash Hamburg, Hamburg. Oh, bantu yikwa me kuwaka yandi ntete? Yandi kele kieleka kitembo mosi. Yinga. Beno lemvo kila munu, mu zolaka tuba yawu mutindu yina ve. Ya kele mpangi-bakala, kasi—kasi, oh, la la, mu vwandaka na yandi kilumbu mosi. Beno zaba, mu ke mona ve mutindu beno me kwisaka na kuwa munu, ntangu beno ke kuwa muntu ya mutindu yina. Yandi lendaka longa mpe kukanga ata fioti ve pema ya yandi. Mu—mu zaba ve yinki mutindu yandi ke salaka yawu, mu . . . kasi kieleka yandi ke salaka mingi. Mu kwendaka na yandi na lukutakanu ya munu ya New York, ntama mingi ve, mpe yandi zolaka nata munu na—na madya ya nkokila na manima ya lukutakanu. Mpe mu kwendaka na kisika mosi, mpe mu vwandaka pene-pene ya kubasika ntangu mpangi-bakala . . . Yandi, yandi longaka bisika nionso na ntoto, mpe bisika nionso na nziunga, samu na bantu nionso yina vwandaka kuna. Yandi kele kieleka personnage, na kati ya yandi mosi.

30 Mpe mu ke kwikila ti nge ke sepela na mpangi ya bakala ya Californie, mpe. Yinki kele nkumbu ya yandi? Mu lenda banza ve na nkumbu ya yandi, yandi yina kele mosi ya bantu yina ke zonzaka. Mu—mu me zimbana nkumbu ya yandi, mpe. Kasi yandi kele nzonzi ya ngolo, mpe beno ke sepela na yandi. Ya ke vwanda mu banza na banzonzi ya nene kuna mutindu, beno zaba, Mpangi Roberts mpe bantu mingi ya nene ya kilumbu yayi.

31 Na yawu, mu ke vutula matondo na kubanza na Masonuku yina me kwiza na dibanza ya munu awa na ntangu yayi. Mpe na ntangu mosi David vwandaka tala na nzasa ya Mfumu, na

kuvwandaka na batenta. Mpe yandi tubaka . . . Yandi vwandaka ya kuvwanda na profete, Nathan, ya kilumbu yina. Mpe na yina yandi tubaka, “Ya kele kieleka ti mu ke zinga awa na yinzo, ke zinga na yinzo ya cèdre, mpe nzasa ya ngwisani ya Mfumu ya munu na yisi ya tenta?”

³² Mpe profete tubaka na yandi, “Sala nyonso yina kele na kati ya ntima ya nge, David, samu ti Nzambi kele na nge.” Kaka yina yandi zabaka na kutuba.

³³ Kasi na nkokila yina, Mfumu kutanaka na profete, mpe yandi tubaka, “Kwenda, tuba na kisadi ya munu, David, ti mu me nata yandi na lupangu ya mameme yina, na kulandaka mwa mameme yina, beno zaba, mpe me kumisa yandi nkumbu mutindu bantu ya nene,” nkumbu ya kulutilla nene ve, nkumbu ya kulutilla nene ve, kasi ba me tanga yandi na bantu ya nene yina vwandaka na ntoto na ntangu yina.

³⁴ Mpe mu banzaka, “Lemvo ya Nzambi, na David kuna!” Mpe mu banzaka, “Mu lendaka tanga yawu, munu mosi. Ntangu mu ke mona bweso ya kilumbu yayi yina beto ke na kuzinga, bilumbu ya nsuka ya masolo ya yinza, mpe samu na kutangama na kati-kati ya babakala yayi mutindu beto me kwisa na balukutakanu yayi.” Mpe Mfumu kusakumuna beno, ya kufuluka mingi.

³⁵ Ntangu yayi, nkundi ya munu ya mbote, Mpangi Valdez, tubaka, “Mpangi Branham, mu fwana kwenda, mu ke kwikila, na ngunga ya kumi na yiya, to kumi na yiya na manima ya kumi.” Yandi tubaka, “Mu ke kwenda na nsuka, na yina mu ke kwamisa nge ve—ve ke tuba.” Yandi vwandaka na balukutakanu na ntwala.

³⁶ Mu kele—mu kele fioti malembe, mpe mu fwana banza, beno zaba, ntangu mu ke tuba. Mpe mu ke sonika Masonuku ya munu awa, mpe noti mosi, mu banza, kasi na yina mu fwana vutuka mpe kubanza yina Mfumu tubaka na munu na kutuba, beno zaba, fwana vingila Yandi. Mpe mu ke malembe, na yawu mu banza ti mu ke bumba beno ntangu mingi ve, na suka yayi.

³⁷ Mu yufulaka Mpangi Williams, mu tubaka, “Mpangi Williams, ngunga yikwa mu ke na yawu?” Mu tubaka, “Ntangu yayi, mu vwandaka na Masonuku awa yina mu lendaka zonzila yina ke baka munu kaka pene ya baminuti makumi tatu, to kima, mpe kukatula muntu nyonso mpe kukwenda na yinzo.” Mpe mu tubaka, “Kasi mu ke zola kuvwanda na mwa lesu mosi, kana ya lendaka salama,” mpe na yina mu banza ti ya ke vwanda kima mosi samu na beno bubu yayi, kima yina beno lendaka vutuka na yinzo na beno, samu na kubanza na yawu.

³⁸ Mpe kieleka mu zolaka telama ve na suka yayi na ngunga ya tatu na ndambu, to baminuti makumi zole na yiya, mpe me kubama na kukwisa awa, kaka samu na kumonana. Mu—mu—mu ke kipe ve. Mu—mu me kwisa awa mpe me longuka mazono

na zulu ya Masonuku yina mu sonikaka, samu na kima yina mu sambilaka ya kieleka, mpe mu banzaka ti, na nzila ya yawu, ya lendaka sadisa muntu mosi. Munu . . . Beto kele ve na ntangu samu na bimokisi mpe bansaka. Beto—beto fwana kwenda na kisalulu. Mu ke kwikila ti Yesu ke kwisa ntama mingi ve.

³⁹ Mpe ntangu yayi ba ke na kutula yayi na bande, mpe mu banza ti muntu mosi lenda baka bande. Mpe mu ke zola kusala nsamunu yayi, ti bantangu yankaka mu kele . . . bambala mingi ba ke bakulaka munu yimbi. Mpe bambala mingi bantu ke bokilaka munu, na kutubaka, “Mpangi Branham, vwandaka nsemo yayi nge zolaka tuba yawu?” Mpe bantangu yankaka ya kele beto ke tubaka kima mosi, kasi beno fwana zaba, beno belama na yawu na mutindu ya mbala mosi landila misiku yina mu zola kutuba samu na yawu.

⁴⁰ Mpe mu ke tubaka bima ntangu yankaka yina kele—yina kele fioti ya kuswaswana na kutala kundima ya muntu mosi, Mu zola ti beno bakula yawu mbote-mbote ntangu yayi, muntu mosi, yina muntu mosi ke kwikila. Kasi mu kele na Nsangu, mu kele ve . . . na Mfumu, yina mu ke kuwa mutindu yina samu na yawu. Bayankaka lendaka kuwa ti Yawu me katuka na diabulu. Bayankaka lendaka kuwa ti Yawu kele buzoba. Kasi, samu na munu, yawu kele Luzingu. Mu zola ve kuvwanda ya kuswaswana ntangu mu ke tubaka bima yina kele ya kuswaswana, to ntangu yankaka mu ke lwadisa fioti to ke sala mpasi, samu na bantu. Mu zola kutuba yawu ve na nsemo yina. Mu—mu, kana mu sala yawu, na yina mu kele muntu ya luvunu. Mu—mu ke tuba yawu na kati ya nsemo ya kukwenda na ntwala, na Nzambi. Mu ke tuba yawu na nsemo ya—ya—ya bantu na kuzaba Nzambi kulutila mbote. Mpe mu ke tuba yawu ve samu ti ya kele kima yina mu salaka, munu mosi. Ya kele kima yina mu ke mona na Nzambi.

⁴¹ Mpe ntangu yayi kana mu tuba kima mosi na mosi ya balukutakanu yayi, bantu yina ke sala mpasi, to . . . Beno tuba, “Mu ke kwikila Yawu ve mutindu yina.”

Mbote, mu ke salaka mingi nsamunu yayi ya ngolo. Mpe kento ya munu ya kuvwanda kuna ke na kuwa munu, yandi zaba ti ya kele ve na mambu ya nganda samu na munu. Mu—mu . . . Kaka mutindu ntangu beno ke kudya nsusu, mpe beno ke kota na mukwa. Ntangu yayi, ata muntu mosi ve yina ke zolaka kudya nsusu ke losa nsusu samu yandi me kutana na mukwa mosi. Yandi ke losa kaka mukwa, na manima yandi ke kwenda na ntwala ke kudya nsusu. Kima mutindu mosi na kudya karte aux cerises. Kana mu bula nkuna, mu—mu—mu ke losa ve tarte, mu ke losa kaka nkuna. Na yawu . . .

⁴² Mpe yina mu ke tuba awa yina lendaka monana, na balukutakanu ya munu nionso, yina ke monana mutindu nkuna samu na beno, mbote, beno ke tula yawu kaka na lweka, beno tuba, beno ke pesila yawu muswa na munu kukondwa kuzaba

mingi samu na yawu mutindu beno lendaka. Na yawu, kuna, beno kwenda kaka na ntwala mpe beno kudya yina beno ke banza ti ya kele kieleka. Mpe mu ke . . .

⁴³ Mu ke tula kivuvu ntangu yayi ti Mfumu ke sakumuna Ndinga ya Yandi. Mu kele mukwikidi ya kieleka na kati ya Ndinga, mpe Ndinga kaka. Kaka Ndinga, mpe ya kele Nsangu yina Mfumu pesaka munu.

⁴⁴ Beto kele ya kuswaswana, mosi na yankaka. Mu me mona na suka yayi, bampangi ya munu, ba-missionnaire, ba-évangéliste, mpe ba-pasteur, ya kutelama awa, mu banza—mu banza nkama mosi to kulutila bawu, ya kutelama awa. Mosi na mosi ya bawu kele ya kulunga na kutelama awa mpe kuzonza, kulutila munu. Mu ke kwikila yawu. Kasi, beno me mona, mosi na mosi ya beto, mosi lenda baka ve kisika yankaka. Mosi lenda baka ve nsangu ya yankaka. Beno me mona, beto kele na mitindu ya beto ya kuswaswana.

⁴⁵ Nzambi kele na ngolo nyonso. Ntangu Yandi . . . Nani, nani lendaka tuba na Nzambi wapi mutindu kusala bima, na mbandukulu, ntangu Yandi vwandaka kaka yandi mosi? Beno me mona? Mpe kana beto kele na Luzingu ya Kukonda nsuka, ya kele kaka na mutindu mosi ya Luzingu ya Kukonda nsuka, mpe ya kele Nzambi. Na yawu kana beto kele na Luzingu ya Kukonda nsuka, beto vwandaka na Nzambi kaka kuna, kitini ya Nzambi. Beto vwandaka kinama ya Yandi. Beto kele ntangu yayi kinama ya Yandi. Mpe, samu, “Na mbandukulu vwandaka Ndinga.” Mpe ndinga kele dibanza yina me tubama. Na yawu beto vwandaka mabanza ya Yandi, na manima yina me monisama na kati ya ndinga mpe me kuma yina beto kele. Ya kele samu na yina bankumbu ya beto, mu banza ve yina beto kele na yawu ntangu yayi, kasi bankumbu ya beto tulamaka na Buku ya Luzingu ya Mwana-dimeme ntete mbandukulu ya yinza. Beno me mona? Mpe kana ya vwandaka kuna ve, ya ke wanda ata fioti ve kuna. Beno me mona? Mpe Yesu kwisaka samu na kuvulusa bayina nionso, bayina kele, bayina bankumbu kele na Buku yina. Beno me mona, Yandi zabaka.

⁴⁶ “Kiyidiki ya banzungu,” mutindu Romain 8 ke tubaka na beto, “nani lenda tuba na kiyidiki ya banzungu? Ntoto lenda tuba, ‘Sala munu mutindu *yina*, mutindu *yayi*?’” Beno me mona? Ve. Nzambi fwana talisa binama ya Yandi nionso. Mpe na yawu Yandi fwana sala nzungu mosi ya lukumu ve, mpe yankaka ya lukumu, samu na kulakisa ti mosi na zulu, ya kieleka. Ntangu yayi, kasi Yandi kele na ngolo nyonso, beno me mona, muntu ve lenda tuba na Yandi yinki ya kusala.

⁴⁷ Mpe Yandi ke sala beto ya kuswaswana. Mpe . . . kuna, ba me tuba na beto, na kati ya Biblia, ti bambwetete ya kuswaswana na yankaka, mbwetete mosi ya kuswaswana na yankaka. Beno zaba, ya kele na luswaswanu na Mazulu, na Bawanzio, bantu

ya Bawanzio; ya kele na Bawanzio, ya kele na Bakeluba, ya kele na ba-Séraphin, mpe luswaswanu ya bawu—ya bawu Kuna. Mpe beto nionso kele ya kuswaswanu. Mpe Nzambi kele na miongo ya nene, Yandi kele na bisika ya lepèle, banseke, matiti, ntoto ya kuyuma, maza. Beno me mona, Yandi kele—Yandi kele ya kuswaswana, Yandi kele—Yandi kele Nzambi ya mutindu na mutindu. Mpe beno tala bantu ya Yandi awa na suka yayi, bayankaka na kati ya beto mpembe, mwa ndombe, mwa café, jaune, mwa mbwaki; beno me mona, ya kele—ya kele bantu ya Yandi. Yandi kele . . . Yandi kele—Yandi kele Nzambi ya mutindu na mutindu, mpe na yawu mu banza ti Yandi kele na kima mutindu mosi na kati-kati ya milongi ya Yandi.

⁴⁸ Ntangu yayi beto kulumusa bayintu ya beto na mwa ntangu fioti, samu na kisambu. Mpe mu lendaka tuba yayi ntangu yayi ntete beto tanga Ndinga. Mu zaba ti kana mu kele kaka mwa ntangu fyoti, mpe beno fwana telama mpe kukwenda, Mu ke bakula, beno me mona, mu ke bakula na mutindu ya kulunga. Ntangu yayi beto sambila. Mpe na yina beto ke sambila, na bayintu ya beto ya kukulumusa na fundu-fundu yina Nzambi bakaka beto, ya kele na muntu awa yina ke zola ti ba bambuka yandi moyo na kisambu, beno telemisa kaka diboko ya beno. Yandi, Yandi zaba mbote yina kele na kati ya ntima ya beno, na yisi ya diboko yina.

⁴⁹ Tata ya luzolo ya Mazulu, beto ke belama na Nge na luzitu nyonso, na bayintu ya beto ya kubaluka na fundu-fundu kisika wapi Nge me baka beto. Mpe na yina na mabanza ya beto beto ke banza ti Nge tubaka na Abraham, na nkokila mosi, yandi lendaka “kutanga bazelo yina vwandaka na zulu ya bakumu?” Mpe na yina Nge tubaka na yandi “tala na ntwala bambwetete,” mpe yandi lendaka “tanga yawu?” Ya kieleka, ya lendaka salama ve. Mpe Nge tubaka na yandi ti “nkuna ya yandi ke vwanda yina ba lendaka ve kutanga, mpe mutindu bazelo na zulu ya kumu, mpe na bambwetete yina nsemo yina mazulu.” Ntangu yayi mbanzulu ya beto, dibanza ya beto, mabanza ya beto na kati ya mbanzulu ya beto, mu zola tuba, na yina beto ke kulumusa bayintu ya beto na zulu ya zyelo kisika beto me katuka; na yina bantima ya beto ke tala na ntwala na Mazulu, kisika beto ke kwenda. Kubanda zyelo tii na bambwetete, na kuvwandaka Nkuna ya Abraham! Ya kufwa na kati ya Klisto, beto kele Nkuna ya Abraham, mpe bibyadi na Yandi landila nsilulu.

⁵⁰ Mpe beto me kwisa awa na suka yayi samu na kubundana pene-pene ya madia ya kimuntu ya luzingu, yina beto bakaka, samu na kubasisa yawu na nzila. Mpe ntangu yayi beto ke na nsatu ya Nge samu na kupesa beto Mana yina ya Mazulu, ti Madia yina ke pesa beto ngolo na Luzingu yina kele na kati ya beto. Mutindu menga ke nataka madia yayi ntangu yayi, samu na kupesa yawu ngolo, samu na kusala ba-cellule mingi, samu na kutunga beto ngolo samu na kilumbu; bika ti beto yamba na

Klisto, ti Yandi kota na bampeve ya beto, na suka yayi, na nzila ya Ndinga, mpe—mpe pesa beto ngolo samu na ngunga yina beto ke na kuzinga. Samu ti, kilumbu me luta mingi mpe bivudi ya nkokila ke na kubwa, Nsemo ya nkokila kele awa, beto ke na kulingila malu-malu mbokolo samu na “kumata na Zulu,” mpe beto ke zola kukubama na ngunga yina. Na yina, sadisa beto, Tata.

⁵¹ Mpe ya kele ve na muntu ya kulunga na kuzibula Buku, to kuzibula Bidimbu ya yawu; kasi Mwana-dimeme, yina ba kufwaka kubanda mbandukulu ya yinza, kwizaka bakaka Buku mpe bukaka Bidimbu. O Mwana-dimeme ya Nzambi, kwisa na suka yayi, zibula Buku na beto, mpe bika ti beto tala na Nge, Mfumu, mpe mona yina beto fwana sala samu na kuvwanda ya kuyilama samu na ngunga yayi. Sakumuna konso dibuundu, sakumuna balukutakanu yina ke kwisa, mosi na mosi ya bawu, mpe mwa lukutakanu ya beto, samu na kuvukana na bawu na ntuala. Mpe ntangu beto ke katuka awa bubu yayi, ti beto lenda tuba mutindu bayina katukaka na Emmaüs, “Bantima ya beto vwandaka pela ve na kati ya beto, mutindu Yandi vwandaka tuba na beto na nzila?” Pesa yawu, Tata. Beto ke lomba na Nkumbu ya Yesu. Amen.

⁵² Ntangu yayi samu na beno yina ke zola kubaluka, ntangu nyonso beno ke zolaka kutanga na manima ya mulongi ntangu yandi ke tanga, samu na kutala kaka kisika yandi ke na kuzonzaka, kana beno kele na Babiblia ya beno, mpe beno ke baka Santu Matthieu kapu 4.

⁵³ Mpe ntangu yayi mu ke pesa dilongi ya munu kaka ntete mu zonza; mingi fioti, mu zola kulonga yawu mutindu, mpe kuzonza yawu na yina beto ke kwenda na ntuala. Mpe yayi mu me bokila, na mutindu nyonso, mu zaba ve samu na yinki, mu ke na kubokila yayi: *Ntangu Ya Kuyonzika*.

⁵⁴ Mpe beto ke tanga Masonuku, samu na kuvwandisa dibanza yayi na zulu, samu na kubaka dibanza ya masonuku awa. Beto ke tanga Santu Matthieu kapu 4, kitini ya yawu. Yayi kele na bampukumunu ya Yesu. Na manima Yandi fulukaka na Mpeve-Santu, ba twadisaka Yandi na ntoto ya kuyuma.

Ntangu yayi ntangu ba twadisaka Yesu na ntoto ya kuyuma samu na kumekama na dyabulu.

Mpe ntangu yandi mangaka madia bilumbu makumi yiya mpe bampimpa makumi yiya, na manima yandi kuwaka na nzala.

Mpe ntangu mpukumuna mosi kwisaka na yandi, yandi tubaka, Kana nge kele Mwana ya Nzambi, pesa muswa ti matadi yayi kukuma dimpa.

Kasi yandi vutulaka mvutu mpe tubaka, Ya kele ya kusonika, Muntu ke zinga kaka na dimpa ve, kasi na bandinga nionso yina ke basikaka na yinwa ya Nzambi.

Mpe diabulu nataka yandi na mbanza ya santu, mpe tulaka yandi na zulu ya nsongi ya tempelo,

Mpe yandi tubaka na yandi, Kana nge kele Mwana ya Nzambi, kulumuka: samu ti ya kele ya kusonika, Yandi ke pesa muswa na bawanzio ya yandi samu na nge: mpe ba ke yamba nge na maboko ya bawu, ti ata fioti nge ke tuta dikulu ya nge na ditadi.

Yesu tubaka na yandi, Yawu me sonamaka diaka, Nge ke meka Mfumu Nzambi ya nge ve.

Mpe diaka, diabulu nataka yandi na zulu . . . mongo ya kulutila yinda, mpe talisaka yandi bimfumu nionso ya yinza, mpe bankembo ya yawu;

Mpe yandi tubaka na yandi, Bima nyonso yayi mu ke pesa nge, kana nge ke fukama mpe ke sambila munu.

. . . Yesu tubaka na yandi, Katuka awa, Satana: samu yawu kele ya kusonika, Nge ke sambila Mfumu Nzambi ya nge, mpe yandi kaka nge ke sadila.

55 Mu ke zola kuvutuka diaka mwa fioti, na nzila ya yiya diaka.

Kasi yandi vutulaka mvutu mpe tubaka na yandi, Ya kele ya kusonika, Muntu ke zinga kaka na dimpa ve, kasi na ndinga nionso yina ke basika na yinwa ya Nzambi.

56 Ntangu yayi samu na yintu ya dilongi, mu ke zola kubaka yawu, “konso Ndinga yina ke basika na yinwa ya Nzambi.” Ntangu yayi beno simba yawu na dibanza na ntangu yina beto ke zonga.

57 Yesu tubaka mbala mosi, na Santu Jean 6:48, mu ke kwikila ti ya kele kieleka, mutindu mu sonikaka yawu na suka yayi, “Mu kele Dimpa ya Luzingu.” Yayi vwandaka na feti ya Paki, ntangu ba-Juif vwandaka—vwandaka kudya dimpa ya bawu ya kosher samu na kubambuka moyo na mana yina kubwaka na ntoto ya kuyuma, mpe—mpe ba vwandaka kunwa na yinto mosi kuna yina vwandaka talisa Ditadi yina vwandaka na ntoto ya kuyuma, mpe bawu vwandaka na ntangu mosi ya nene. Mpe Yesu bokaka, na kati-kati, mpe Yandi tubaka, “Mu kele Dimpa ya Luzingu. Batata ya beno kudiaka mana na ntoto ya kuyuma, bamvula makumi yiya, mpe bawu nionso kele mosi na mosi, ya kufwa. Kasi Mu kele Dimpa yina me katuka na Nzambi na Mazulu. Kana muntu kudya yawu, yandi ke kufwa ve.” Mpe samu na ditadi, Yandi tubaka, “Mu kele Ditadi yina vwandaka na ntoto ya kuyuma. Mu kele Ditadi yina kisika batata ya beno kunwaka.”

58 “Wapi mutindu?” Bawu tubaka, “Nge kele muntu ya bamvula makumi tanu, mpe nge ke tuba ti Nge monaka Abraham? Ntangu yayi beto zaba ti Nge kele na mpeve ya yimbi mpe kele kilawu.”

59 Mpe Yesu tubaka, “Ntete Abraham kuvwanda, MU KELE.” Beno me mona, “MU KELE” vwandaka Dikunzi ya Tiya yina

vwandaka na divunda, yina zonzaka na Moïse. Mpe kana beno ke yidika yawu na bankumbu ya bawu mpe biyingilu, ve “Mu vwandaka, mu ke vwanda.” “MU KELE” na ntangu yayi, ntangu nyonso.

⁶⁰ Beto ke banza na yayi, ti Yandi tubaka, Yandi mosi ntangu yayi, ti, “Mu kele Dimpa yango ya Luzingu.” Ntangu yayi wapi mutindu muntu yayi lendaka vwanda Dimpa ya Luzingu? Yawu yina beto ke kukiyufula. “Nzutu ya Munu kele Dimpa,” Yandi tubaka. Mpe ntangu yayi wapi mutindu muntu yayi lendaka vwanda Dimpa? Ya kele mutindu ya ngitukulu, kasi beno vwanda ve na muvusu samu na yawu. Bantu ya ntangu ya Yandi vwandaka na muvusu samu na yawu. Bawu zabaka ve mutindu ti muntu yayi lendaka vwanda Dimpa, Yandi mosi. Mpe na Santu Jean 1, ya me pesama na beto mutindu yayi, ti, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni mpe zingaka na kati-kati ya beto.” Na yawu, Ndinga kumaka Dimpa. Ndinga mpe Dimpa awa zolaka vwanda mutindu mosi, samu ti Yesu kele Ndinga mpe Yandi kele Dimpa.

⁶¹ Ntangu yayi wapi mutindu Yandi zolaka vwanda Dimpa mpe Ndinga? Nyonso . . . Ya zolaka vwanda dinsweki, na dibanza ya nsuni. Kasi beto ke tula kivuvu, na suka yayi, ti ya kele ve na mabanza ya nsuni na kati-kati ya beto, ti ya kele na dibanza ya kimpeve na kati-kati ya beto, ti beto lenda bakula yina Tata ke na kumeka na kukuma na beto awa. Na kumonaka bampova yayi kele mansweki ve, kasi, na ntangu mosi, bawu kele Kieleka ya Masonuku, beno me mona.

⁶² “Ntangu yayi wapi mutindu muntu yayi lendaka vwanda Dimpa?” Yawu yina bawu tubaka. Ya kele yina, mu banza, Josephus, mingi ya beno bantu ya masolo . . . mutindu mu vwandaka longuka yawu.

⁶³ Ntangu yayi mu ke sonika buku, mulabu ya munu na zulu ya bakapu yiya ya ntete ya Apocalypse, kivuvu na kuzwa yawu ntama mingi ve. Ya ke vwanda buku mosi ya nene. Na yina mu ke vwanda na balukanu ya konso nsungi ya dibuundu.

⁶⁴ Mpe mu vwandaka longuka disolo ya dibuundu. Mu . . . ya vwandaka mutindu na kati ya mabanza ya munu, mu banza ti ya vwandaka Josephus, ti, mosi ya misoniki ya ntete, na mutindu nyonso, yina tubaka ti, “Yesu yayi ya Nazareth, Yina kwendaka samu na kubeluka ya bambevo,” yandi tubaka, “Bilandi ya Yandi timunaka Yandi mpe kudiaka nzutu ya Yandi.” Beno me mona, bawu vwandaka baka kominyo. Mpe bawu banzaka ti bawu timunaka nzutu ya Yandi mpe vwandaka kudya nzutu ya Yandi. Na yina, beto ke kudya kominyo, to ke bakaka kominyo, na mutindu ya kidimbu, ya nzutu ya Yandi, samu ti Yandi vwandaka Ndinga.

⁶⁵ Ntangu yayi, beno me mona, yayi ke mansweki. Mpe, na ntangu mosi, ya kele Masonuku. Mpe Yesu tubaka, “Masonuku nyonso fwana lungisama.” Beno me mona? Ntangu yayi, beto zola ntangu nyonso kuzenga mabanza ya beto na kima ya kuswaswana na Masonuku yina. Ata mbala mosi ve, ata mbala mosi ve, ata mbala mosi ve, kubika Masonuku yango samu na kima mosi, ata Ndinga mosi ve ya Yawu. Beno bikana kieleka na Masonuku yina.

⁶⁶ Ntangu yayi, Nzambi fwana fundisa bantu kilumbu mosi. Mpe kana Yandi ke sambisa bantu na nzila ya dibuundu, wapi dibuundu ya ke vwanda? Ba ke tuba, “Dibuundu ya Katolika.” Mbote, na yina, wapi dibuundu ya Katolika? Beno me mona? Samu ti bawu kele na luswaswanu mosi na yankaka, ya kulutula yimbi na yina bawu kele na beto. Beno me mona, bawu kele ya kuswaswana, mosi. . . Bawu nyonso kele mitindu ya kuswaswana na kati ya bawu, ba-Romain mpe ba-Orthodox, mpe ba-Juifhanite mpe, oh, makanda mingi ya mutindu na mutindu na kati ya bawu. Mpe bawu kele kieleka na kubendana mosi na yankaka, na yina wapi mosi na kati ya mabuundu yayi ya Katolika? Kana Yandi sala yawu na nzila ya dibuundu ya ba-Protestant, wapi dibuundu ya ba-Protestant? Mosi na mosi ya kuswaswana na yankaka.

⁶⁷ Kasi Yandi ke sambisa yinza, mpe Yandi fwana vwanda na mwa kitesilu mosi samu na kufundisa yinza, to Yandi ke vwanda ya kusungama ve samu na kubika beto kwenda ntangu yayi mpe—mpe kuzinga luzingu yayi kukondwa kutelama samu na lufundusu. Nani ke vwanda ya kusungama? Wapi kisika beno lenda tuba yina vwandaka mbote? Ya fwana vwanda na kitesilu.

⁶⁸ Mpe Yandi tubaka, na kati ya Biblia ya Yandi, ti Yandi ke sambisa yinza na nzila ya Yesu Klisto. Mpe beto ke tanga awa ti Yesu kele Ndinga. Na Hébreux 13:8, tubaka, “Yandi kele mutindu mosi mazono, bubu yayi, mpe kukonda nsuka.” Na yawu, kuna, Yandi ke fundisa dibuundu na nzila ya nkadulu ya bawu na ntwala ya Klisto, Yina kele Ndinga. “Muntu ke zinga kaka na dimpa ve, kasi na konso Ndinga yina ke basika na yinwa ya Nzambi.” Ve na yinwa ya muntu, ve na seminere, ve na ngaanda ya—ya dibuundu, kasi, “na yinwa ya Nzambi.” Muntu fwana zinga na nzila ya Yawu, mpe Yawu kaka; ntendulu ya muntu ve, kasi Ndinga ya Nzambi yandi Mosi!

⁶⁹ “Mbote,” beno ke tuba, “ya kele na kifu *Awa*.” Kana ya kele mutindu yina, Nzambi kele na kizitu samu na yawu. Yandi nataka yawu na munu, beno me mona. Yayi kele yina mu fwana baka, kaka awa kele yina Yandi tubaka.

⁷⁰ Ntangu yayi, kana yayi kele mutindu ya mansweki, mpe na yina me tala “muntu yina kele Dimpa mpe yina kele Ndinga,” beto kwenda ntangu yayi mpe beto sosa yayi. Beto tala. Samu ti, Masonuku kele nyonso kieleka, mpe bawu—bawu lenda

ve kubukana. Konso Masonuku ke lungisama. Ata mutindu ngitukulu ya ke monana, Ti, ya ke lungisama ntangu nionso.

⁷¹ Yinki kana—kana Mpangi Williams to—to mwa bampangi awa, nkooko ya beto ya bakala ya nene, bawu zole lendaka kota na kisalu, na suka yayi, mpe, kutuba, mbote, lakisa bawu televizyo? Mpe mu banza ti muntu mosi pesaka profesi na kilumbu yina, mpe yandi tubaka, “Ya ke vwanda na ntangu yina beno lenda kuwa ndinga na yinza ya muvimba.”

⁷² Ba zolaka tuba, “Mbote, ti kiboba ya kyadi yayi swi, yandi me zimbisa mabanza ya yandi.”

⁷³ “Mpe ya ke vwanda na ntangu yina ntinta ke pepa na kati ya mupepe.” Ya kele awa na ntangu yayi. “Mpe ba ke baluka mwa buto mosi, mpe na yinza ya muvimba nge ke mona bantu ke tambula, mpe nionso yina, kaka na zulu ya écran.”

⁷⁴ “Mbote,” ba ke tuba, “kiboba yayi ya kyadi!” Beno me mona? Kasi ntangu yayi beto kele na yawu, kaka na kati ya kivinga yayi na suka yayi.

⁷⁵ Mpe mu zola kunata beno na kuzabaka yawu, ntete beto belama na ntwala, ti Nzambi kele na kati ya kivinga yayi. Nsoniki ya Ndinga yayi kele awa. Na yawu, ya ke sala ve wapi mutindu beno me lwata, to wapi diplome yina beno ke zinga na kati ya luzingu, to wapi mutindu ya yinzo beno ke zinga kuna, to wapi mutindu ya tomabilu beno ke tambula, to wapi mutindu beno me longukaka mingi, Nzambi ke talaka na ntima ya beno. Mpe Yandi ke talaka na kati ya ntima ya munu. Mpe ba me fundisa beto na ntima ya beto, ata mpe bandinga ya beto ve. Ntima ya beto ke fundisaka beto. “Katuka na ntima ti yinwa ke zonzaka.” Kana ya kele ve mutindu yina, ya kele luvunu.

⁷⁶ Ntangu yayi, na kati ya kivinga yayi ntangu yayi ke na kwiza bantu, mitindu ya bantu, na kulutaka awa, na yinza ya muvimba, bandinga ke yimbila, kele na kati ya kivinga yayi na ntangu yayi. Kasi, beno me mona, beno kele na nsuka, na kati ya basense ya beno, na zulu ya nkama mosi ya kumona. Kasi ntangu yayi beno lenda baka kitala-tala, to tube to nyonso yina kele na televizyo, mpe kunamisa yawu, mpe nkonga yina lendaka lutisa yawu na lweka ya bitembo yayi ya ether—ether, mpe kuluta na lweka ya yina, samu na kukutika yawu na kati ya kanale mosi, mpe ke baka bantu yango; muntu mosi na Australie, na Afrique du Sud, to kisika mosi kuna, na Inde, to konso kisika yina ya lendaka vwanda. Beno lenda telama awa, na zulu ya kitala-tala, mpe kumona ata mpe ntinta ya bilele yina kele na bawu, ntinta ya bayinti, mpe mouvement nionso bawu ke salaka. Beno pelisa kaka televizyo, beno tala kana ya kele ve mutindu yina.

⁷⁷ Na yina, ya fwana vwanda kisika mosi kuna, ya kubumbama na meso ya beto, kima mosi yina ke luta awa ntangu yayi. Ya lutaka awa ntangu Abraham kuwaka Nzambi kutuba, “Tala na mantwala bambwetete.” Ya vwandaka awa ntangu Elie

vwandaka ya kuvwanda na zulu ya Mongo Carmel. Ya vwandaka awa ntangu Adam vwandaka awa, kasi bawu kaka ntangu yayi bakulaka yawu.

⁷⁸ Mpe mutindu mosi kele Nzambi awa, mpe Bawanzio. Mpe kilumbu mosi ya ke vwanda kaka kieleka mutindu televizio to kima yankaka kele, samu ti Mpeve ke nata na kati ya Luzingu yina ke kufwaka ve. Na yina beto ke bakula. Na yawu, kuna, beto ke zonzila na Ndinga ya Yandi. Ntangu yayi, ti, beto ke meka . . .

⁷⁹ Nzambi, Nzambi Mvangi ya nene, beto meka na kuzonzila na zulu ya mutindu ya yinza, beno baka Yandi na kati ya yinza ntete, samu na kuvutula yawu na Ndinga. Ntangu yayi, yinza ke tambulaka kaka na Ndinga, samu ti Nzambi kele Kiyidiki ya yinza. Ntangu beno ke mona mutindu yinza ke salaka, . . . beno ke mona ti ya kele nzila. Ti, ya kele Biblia ya munu ya ntete, zolaka kutala mutindu yinza . . . monaka Nzambi na kati ya yinza. Mpe blé kele mbuma ya yinza, dimpa, beno ke salaka dimpa na yawu, yina ke simbisaka nzutu ya muntu. Nkadulu ke simbaka binsweki mingi. Beto . . . mpe yina kele mbala ya munu ya ntete samu na kumona Nzambi, vwandaka tala mbote yinza. Mu monaka ti ya zolaka vwanda na kima mosi. Mpe, ntangu yayi, mu me longukaka ve, na yina mu ke zonzaka mingi na nzila ya yinza. Mpe ya kele . . . Mu ke na kumeka ve na kusimbisa kukondwa luzabu. Kasi mu ke meka na kutuba ti beno kele ve na nsatu ya kuvwanda na malongi, samu na kuzaba Nzambi.

⁸⁰ Jean Mubotiki, muntu yina tekilaka Klisto, ntangu yandi basikaka na ntoto ya kuyuma . . . Ba me longa beto ti yandi kwendaka na ntoto ya kuyuma, na nsungi ya yivwa, mpe yandi bikanaka kuna samu kisalu ya yandi vwandaka mfunu mingi. Tata ya yandi vwandaka nganga-Nzambi. Mpe na nzila yango mosi ya kinganga-Nzambi, to dénomination, oh, tata ya yandi tubaka, “Ntangu yayi, Jean, nge zaba ti nge ke talisa Mesiya. Beno zaba, ti Mpangi *Kingandi awa* ke sala kaka Mesiya ya kulunga!” Na yawu Jean zolaka kwenda ntama na yawu, yandi zolaka kota na ntoto ya kuyuma na yandi mosi, samu ti ya fwana vwanda nsodolo ya Nzambi, mpe muntu ve ke na kusola, ata fyoti ve, nani ke vwanda Mesiya. Na yawu, yandi kwendaka kuna na nsungi ya bamvula yivwa.

⁸¹ Mpe, beno tala, ntangu yandi basikaka, na nsungi ya makumi tatu, malongi ya yandi vwandaka ve mutindu théologien. Yandi sadilaka ve bampova ya nene, kasi ya vwandaka nyonso na zulu ya yinza. Yandi tubaka na bantu ya dibuundu ya kilumbu yina, yandi tubaka, “Beno nsungi ya banioka.” Yawu yina yandi monaka na ntoto ya kuyuma, banioka. Yandi yinaka banioka. Bawu vwandaka bandikila. na kati ya meno ya bawu bawu vwandaka na ndikila yina ke kufwaka, mpe yandi samunaka yayi na zulu ya dibuundu ya kilumbu yina, “Beno nkonga ya banyoka ya ndikila, nani me longa beno na kukima nganzi yina ke na kwiza? Beno banda ve na kutuba, ‘Beto kele ya *yayi*,’ mpe,

‘Beto kele—beto kele ba-Jesuite,’ to ‘Beto kele *yayi-mpe-yayi*,’ to, ‘Beto kele ya ba-Methodiste, ba-Baptiste, ba-Presbytérien,’ to nyonso yina ya kele. Beno banda ve na kutuba ti beno kele na yawu, samu ti, mu ke tuba na beno, Nzambi kele na lenda na matadi yayi kubasisa bana na Abraham.” Beno me mona?

⁸² Mpe diaka, “Soka,” yawu yina yandi sadilaka na ntoto ya kuyuma, “ya ke vwanda na nsimbulu ya yinti. Mpe konso yinti yina ke butaka ve mbuma ya mbote—mbuma, ba ke katula yandi na tiya.” Beno me mona, yandi zolaka zenga ve yinti yina vwandaka pesa mbuma, samu ti yandi vwandaka zinga na mbuma ya yinti. Kasi, yinti yina vwandaka pesa ve mbuma! Oh, beno lenda baka kaka Masonuku nionso, yina me twadisama na kimpeve, tii kuna bima nionso me lunga samu na Yesu Klisto. Beno me mona, “Konso yinti yina ke butaka ve mbuma ya mbote kele kubasika mpe kulosa yawu na tiya,” mpe nyonso yina. Beno me mona, yandi—yandi sadilaka nsangu ya yandi na kitezo ya yinza.

⁸³ Mpe beto zola kukutana yawu ntangu yayi, na kuvwandaka ti beto me mona ti Yandi tubaka, “Mu kele Dimpa. Mpe muntu ke zinga na konso Ndinga, mpe mu kele Ndinga.” Beno me mona? Na yawu beto zola kuvutuka na yinza. Mu ke talaka bambala mingi mu fwana kusala yawu.

⁸⁴ Mpe yinza ke tambulaka na zulu ya kikalu mosi. Beno ke tala bandeke nionso ke vukana, ba ke basika mpe ba ke kwenda kuna na kati ya ntoto ya kuyuma mpe ba ke kwenda kudia. Beno tala mbote bibulu nyonso ntangu bawu ke basika, ya kumwanganana na bilanga, na kudyaka. Beno losa nsinga ya beno kuna na kati, mbisi ke tatika. Kasi ntangu bibulu yayi. . .Bandeke yayi ke mata na bayinti, mpe bibulu yayi ke kota na kati ya dibulu, beno lendaka mpe kubaka nsinga ya beno. Bawu ke tatika ve, samu yinza ke tambulaka na zulu ya kikalu mosi ntangu nionso.

⁸⁵ Mpe mutindu mosi Ndinga ya Nzambi ke kwendaka na kati ya ndandani. Nzambi ke salaka ntangu nyonso yina Yandi ke salaka na kudya mosi. Yandi bakaka lukanu na mbandukulu, ntangu muntu zimbisaka kubundana ya yandi na Yandi, Yandi zolaka vulusa yandi na nzila ya menga yina tiamukaka ya muntu yina salaka dyambu ve. Mpe Yandi me sobaka ata fioti ve mutindu ya Yandi. Beto me meka na kulonga bawu na kati ya yawu, na denomination bawu na kati ya yawu, mpe—mpe kulomba bawu na kati ya yawu, me bula bawu na kati ya yawu, to me boka bawu na kati ya yawu. Ya kele dyaka mutindu mosi, Menga yina tiamukaka kele kaka kisika Nzambi ke kutana na mukwikidi.

⁸⁶ Ve, beto lenda ve kusala Kimvuka mosi ya mabuundu ya Yinza ya muvimba mpe bantu nionso ke kutana. Ata mbala mosi ve ti ya ke simba; ata mbala mosi ve ti ya salaka, ata mbala mosi ve ti ya ke sala. Ya kele mutindu mu ke teleminaka sysiteme yina.

Nzambi kele na sysiteme. Beno kuwaka yawu me tubama bubu yayi, “Mabuundu nyonso ke vukana, ya ke vwanda Lukutakanu ya Yinza ya mabuundu. Mpe Yesu sambilaka samu na yawu, ti beto ‘nyonso lendaka vwanda mosi.’” Mbote, ntangu yayi, beno me mona, yina kele dibanza ya nsuni, kukondwa kuzaba Mpeve.

⁸⁷ Yesu tubaka, “Ti ba lendaka vwanda mosi, Tata, mutindu Nge na munu kele mosi.” Ya kele ve samu na muntu na kuvwanda na zulu ya kima mosi, ya ke simba ata fioti ve; denomination mosi ke zola kuyala na zulu yankaka, mpe muntu mosi na zulu yankaka. Kasi samu ti beno vwanda mosi na Nzambi, mutindu Klisto mpe Nzambi vwandaka mosi, ya kele yina kisambu kele. Ti, Yandi vwandaka Ndinga, mpe Yesu sambilaka ti beto lendaka vwanda Ndinga, na kulakisaka Yandi. Yina kele kisambu ya Yandi samu na kuzwa mvutu.

⁸⁸ Beno me mona yinki mutindu Satana ke vukisa yawu na dibanza ya nsuni? Kasi yina vwandaka ve kisambu ya Yesu, ata fioti ve, ti beto nionso ke vukana kintwadi mpe beto ke na credo mosi mpe nionso yina. Konso ntangu bawu ke sala yawu, bawu ke kwenda ntama mpe ke kwenda ntama na Nzambi.

⁸⁹ Yandi zola ti beto vwanda mosi na Nzambi, mpe Nzambi kele Ndinga. Konso muntu yandi mosi, na kati ya ntima ya yandi, fwana vwanda mosi na Nzambi.

⁹⁰ Nzambi na kuzabaka yawu, yayi, bima nyonso yayi salaka mutindu yayi. Ntangu yayi ya kele mutindu beto ke mona Nzambi ntangu yankaka, ya kele kutala na yinza. Bansungi, ke na kubalukaka, ke siamisa Nzambi. Ya kele kisika mu talaka yawu ntete, mutindu ti ya kele na luzingu ke kwizaka na printemps, ya ke zinga luzingu ya yawu, ke basisa nkuna, ke kufwa mpe ke kwenda na ntoto, ke vutuka na mvumbukulu, ke kwenda kaka bisika nyonso. Beto lenda lutisa bangunga na zulu ya yawu.

⁹¹ Kasi ntangu yayi wapi mutindu ya kele ya kuswaswana na yina, mpangi ya beto ya bakala ya missionaire awa, na Inde. Mu ke mona mingi kuna, mpe bisika nyonso na yinza, bawu ke kwikilaka na kuvutuka dyaka na kati ya nzutu, ti, bawu—bawu, ti beno ke kufwa awa mutindu muntu mpe beno ke vutuka mutindu ndeke to kibulu. Beno me mona, yina beno ke tuba ve na yinza.

⁹² Yinza ke zonza ti nkuna mosi yayi kotaka na ntoto, nkuna mosi yina ke basika dyaka. Beno me mona? Yesu mosi kulumukaka, kele Yesu mosi yina vutukaka. Alleluia! Mpe nzutu yayi, ntangu ya ke kubwa na ntoto, ya ke vutuka ve fololo to kima yankaka, ya ke vutuka bakala to kento. Beto ke monaka yawu na kati ya yinza, wapi mutindu ya ke salaka, ya fwana kwenda na kati ya ba-hivers ya madidi, mpe ke pola mpe nionso yina, kasi ba ke keba luzingu kana ya kele na luzingu mosi na kati ya yawu.

⁹³ Kasi kana, kuna, kana nkuna yina me mena ve, ya ke vumbuka dyaka ata fyoti ve; ya lenda vumbula ve, ya kele na kima ve na kati ya yawu na kuvumbula yawu. Mpe kana beto kuma kaka Muklisto ya nkumbu. . . Ya kele na mabuundu zole na yinza, dibuundu ya yinza, dibuundu ya kimpeve, ba me bokila bawu nionso “Baklisto.” Kasi dibuundu ya yinza lenda ve kuvumbuka. Ya ke na kusalaka kuvumbuka ya yandi ntangu yayi na Lukutakanu ya Yinza, lukutakanu ya mabuundu.

⁹⁴ Kasi Muklisto ke telama samu na kukutana na Klisto samu ti Yawu kele Kento ya makwela, samu na kukwenda kutana na Yandi. Ya kele na luswaswanu na kati ya bawu. Yinza ke simbaka mansweki yayi, samu na beto, mpe beto lenda mona yawu mutindu beto ke tala yawu mbote. Mpe beto ke mona ti Buklisto ke zonzaka Kieleka, ya lufwa, luzikulu, mpe mvumbukulu.

⁹⁵ Kana na yina ya kele na dimpa ya blé yina beto zaba ti na nzila ya yawu beto nyonso ke zingaka, mpe beto zaba ti ya kele kaka na mutindu mosi yina beto lenda zinga, kele na nzila ya kubaka kima ya kufwa na kati ya nzutu ya beto. Beno lenda zinga ve mutindu yankaka.

⁹⁶ Muntu mosi ke kudyaka matiti kutanaka na munu, ntama mingi ve, yandi tubaka, “Mpangi Branham, mu vwandaka na kivuvu mingi na nge tii kuna mu kuwaka nge kutuba ti nge ke kudya bacon mpe meki na madya ya suka.” Beno me mona? Mpe yandi tubaka, “Wapi mutindu muntu ya santu lendaka kudya kima ya mutindu yina?”

Beno me mona, mu tubaka, “Mbote, yinki ke tambula mbote ve na yawu?”

⁹⁷ Bima nionso kele ya yimbi, kasi ya kele ya kusantisama na nzila ya Ndinga ya Nzambi mpe ya bisambu. Biblia ke tuba, “Kana nge kele longi ya mbote ya Yesu Klisto, nge ke bambuka moyo na mpangi ya bima yayi. Beno me mona, bima nionso kele ya kusantisama, kima mosi ve ba ke manga yawu, kana ba me yamba yawu na kuvutula matondo,” Timothée ya Ntete: 3. Ntangu yayi beto ke mona ti ya kele kieleka. Na yina mu tubaka, na kutala. . .

Mu tubaka, “Mbote, nge fwana ve kudya kima ya kufwa, mpe?”

“Oh, ve, tata!”

⁹⁸ Mu tubaka, “Kana beno zinga na mutindu nyonso, beno fwana zinga na nzila ya kima ya kufwa. Kana beno kudya dimpa, blé ke kufwa; kana beno ke kudyaka ndunda, ya ke kufwaka; nyonso yina beno salaka, ata mpe miliki, beno kunwaka ba-bacterie. Beno kele. . . beno lenda zinga kaka na nzila ya kima ya kufwa.”

⁹⁹ Mpe na yina kana kima mosi lendaka kufwa samu beto zinga na nzutu, wapi mutindu dyaka kima fwana kufwa samu ti beto

zinga ya Seko! Lufwa ya ke lomba, na kusala yawu. Dimpa! Na kumonaka ti Yesu tubaka, “Mu kele Dimpa,” mpe ya kele na dimpa ya blé mpe Yandi vwandaka ve mutindu yina ya dimpa, na yawu ya fwana vwanda na mitindu zole ya baluzingu yina me simbama na nzila ya dimpa. Ya ke twadisa beto na yawu. Ya lenda vwanda ve. . . Yandi kele ve, Yandi vwandaka ve blé; mpe Yandi vwandaka ve Ndinga, Yandi vwandaka nsuni, na yawu ya fwana vwanda na mitindu zole ya luzingu. Beto zaba ti blé yango ke kufwaka na yawu beto ke zinga na nzutu, mutindu mu tubaka. Yesu, Ndinga Dimpa, kufwaka, samu beto zinga ya Seko. Yandi vwandaka Ndinga Dimpa. Ntangu yayi beno tala, beno bumba yawu na dibanza. Ntangu yayi samu na kulakisa ti Bandinga ya Yesu kele kieleka, beto ke mona na yayi, na yinza, mutindu ya ke kwenda.

¹⁰⁰ Ntangu yayi beto kwenda na Masonuku, samu na kutala diaka, beto vutuka na Masonuku tii beto ke kuma na dilongi ya beto ya ngudi. Na disamba, Nzambi pesaka dibuta ya Yandi ya ntete Ndinga ya Nzambi samu na kuzinga na nzila ya yawu, konso Ndinga ya yawu. Dibuta ya ntete yina ba tulaka awa na zulu ya ntoto, yina ba pesaka Luzingu ya Kukonda nsuka ntangu nionso ba bikanaka na Ndinga ya Nzambi.

¹⁰¹ Yina vwandaka dikani ya Yandi. “Mu kele Nzambi,” Yandi tubaka, “Mu ke sobaka ve.” Yina kele dyaka dikani ya Yandi. Ya kele ata mbala mosi ve dikani ya Yandi samu na credo, to organisation, to misiku yina muntu me sala, muntu yina ke zinga na nzila ya yawu, kasi na konso Ndinga yina basikaka na yinwa ya Nzambi.

¹⁰² Ntangu yayi kuvutuka na Genèse, yina kele mbandukulu. *Genèse* zola kutuba “mbandukulu.” Beto ke mona ti Nzambi pesaka dibuta ya Yandi Luzingu ya Kukonda nsuka ntangu nyonso yina bawu bikanaka na kati ya Ndinga yayi mpe zingaka na nzila ya Ndinga yayi. Kasi ntangu bawu bukaka yawu, kaka kitini mosi na kati ya muniololo, lufwa bulaka bawu, yina vwandaka nsilulu mpe.

¹⁰³ Ya kele muniololo. Beno kele ya kukangama na zulu ya difelo na yawu, mpe ya kele kaka kima yina ke nata beno. Ntangu mukwikidi ke kuma mukwikidi ya kati-kati mpe ke zinga na ndinga mosi yina me swaswana na Ndinga yayi, yandi ke zenga kubundana ya yandi na Nzambi. Kitini mosi me bukana! Mpe, beno bambuka moyo, lukwikilu ya beno na Ndinga yayi kele mutindu muniololo. Muniololo kele ngolo mingi na kitini ya yawu ya pete-pete. Ya kele kieleka. Ya kele ngolo, ti, samu ti ya kele nyonso yina ya ke simba. Mpe kana ya kele na kima mosi na kati ya Ndinga yina ke dinsweki samu na beno, kima yina beno kuwaka mutindu yankaka, kasi bawu tubaka, “Nge? Oh, yina vwandaka samu na bantumwa, mpe bima yina lutaka na nzila ya yawu,” ntangu Masonuku ke tuba ti Yesu Klisto kele mutindu mosi mazono, bubu yayi mpe kukonda nsuka, kubika ve ti ya

vwanda kulemba! Beno kindisa Yawu mpe beno simbisa Yawu, mpe beno kanga luzingu ya beno na kati ya Yawu, samu ti ya kele kaka kima yina ke nata beno na zulu ya milaka ya tiya ya difelo. Ya kele kieleka.

¹⁰⁴ Ntangu muniololo yayi ke bukana, na Adam na Eve, dibuta ya ntete, beno bambuka moyo ntangu yayi, bawu bukaka ve nsasa mosi, bawu bukaka Bandinga tatu ve; Ndinga mosi! Muntu ke kangama na difelo na nzila ya konso Ndinga, konso Ndinga yina ke basika na yinwa ya Nzambi. Ya kele kisika yina ba me zenga kisika ya nsuka ya Seko ya muntu. Samu na yinki, yandi ke kangama na muniololo yina, to yandi ke kangama na nzila ya credo mosi; to kana ya kele na credo ya kuvukana na muniololo, ya kele kisika yina kitini ya kulemba kele, mpe beno me kwenda. Ya kele kisika kitini ya kulemba vwandaka na Adam mpe na Eve. Kitini yina ya kulemba, “ya kieleka,” yandi tubaka, “Nzambi. . .” Kasi ya kieleka Nzambi tubaka yawu! Mpe kana Nzambi tubaka yawu, Nzambi zolaka tuba yawu. Mpe Yandi ke zitisaka Ndinga ya Yandi na kutubaka, “Kilumbu beno ke kudya yawu, kilumbu yina beno ke kufwa.” Kilumbu beno ke kotisa na kati ya beno kima yankaka na ngaanda ya Ndinga ya Nzambi ya kukondwa mvindu, na kati ya moyo ya beno, ya kele kilumbu yina beno kele ya kukabuka na Nzambi.

¹⁰⁵ Ntangu yayi yayi kele ngolo mingi, kasi beno kuwa kaka mbote. Ntangu yayi beno tala. Ndinga mosi, Ndinga mosi ya ntete ya Biblia, Nzambi tubaka yawu, “Ndinga mosi, yina me kabwana na Luzingu ya Kukonda nsuka.”

¹⁰⁶ Yina kele mutindu kubaka bakala mosi mpe beno ke kanga yandi, na makulu ya yandi. . . yandi kele na maboko ya yandi na Mazulu, mpe beno ke zenga yandi na bitini zole, beno ke bukana musapi, nionso yina beno ke kangama na yawu. Beno kele ya kukangama na kitini ya yisi, mpe, kana beno buka muniololo yina, bisika nionso, beno me kwenda. Ntangu yayi beno kanga yawu na kati ya mabanza.

¹⁰⁷ Beno bambuka moyo, Biblia ke tuba, “Na yinwa ya bambangi tatu, ti konso ndinga kuvwanda.” Beto ke tubila yawu, na mwa ntangu fioti, na bampukumunu tatu ya Yesu; bampukumunu tatu ya milongi, bubu yayi, kisika bawu kumaka ya kubwa; bampukumunu tatu ya dibuundu, mpe kisika bawu ke salaka kubwa ya bawu; bampukumunu tatu ya organisation, kisika yawu ke salaka ti yawu kubwa; mpe bampukumunu tatu na kati ya bantu, mpe kisika bawu ke salaka kubwa ya bawu. Ntangu yayi, yawu nyonso ke kota na tatu; mutindu kunungisama, kusantisama, mbotika ya Mpeve-Santu; Tata, Mwana, Mpeve-Santu. Nyonso kele ya kulunga na kati ya tatu.

¹⁰⁸ Ntangu yayi beno tala Nzambi, na mbandukulu, kima ya ntete Yandi pesaka bana ya Yandi samu na kuzinga, vwandaka Ndinga ya Yandi. Ntangu yayi beto ke mona ti ya kele kieleka.

Na yina na kati-kati ya Biblia, beto ke kuwa Yesu kukwiza mpe kutuba ti, “Muntu ke zinga na konso Ndinga yina ke basika na yinwa ya Nzambi.” Mpe na yina na Apocalypse 22:18, Yesu Yandi mosi ke zonza dyaka, ke tuba, “Mu ke pesa kimbangi ya bima yayi. Kana muntu mosi kubwela ndinga mosi na Yayi, to kukatula Ndinga mosi ya Buku yayi, ba ke katula ndambu ya yandi na Buku ya Luzingu.”

¹⁰⁹ Ntangu yayi, beno me mona, ya kele ve luzingu ya beto ya mbote; ya kele kaka kima ke tambula na yawu. Ya kele ve dibuundu ya beto—ya beto ya kukwikama; yina ke kwenda na yawu. Kasi kima ya mfunu kele, na kubikanaka na Ndinga yina. Beno kudya kima yankaka ve kasi Ndinga yango. Beno vwanda na Yawu. Yandi kele Ndinga yango. Ntangu yayi beto zola kutala mbote ntangu yayi.

¹¹⁰ Yinki kele luswaswanu na dimpa yayi, ya luvangulu, samu na kuzinga? Ntangu yayi, blé kele dimpa ya luzingu, kana ya kele ve mbuma yina ba me vukisa, ya ke. . . ke zika bawu mpe ya ke mata dyaka. Ya fwana vwanda mbote ya mbuma ya kuyela. Bankuna ya kupola ke basika ve. Beto nionso zaba yawu. Mpangi Sothmann, yina me vwanda awa, kisadi mosi ya blé na Canada, zaba ti beno ke kuna ve bankuna ya kupola na kati ya ntoto, samu na kuvingila ntangu ya kuyonzika yawu. Samu ti, mpassu to—to bamikolobi, yina ya kele na kati ya mbuma, ke kudya yawu, ke kudya luzingu na yawu ntete.

¹¹¹ Beno zaba ti misobi ya kieleka yina ke bebisa beno, yina ke kudia nzutu ya beno, kele na kati ya yawu na ntangu yayi? Job tubaka, “Ata ti misobi ya mpusu ya munu me bebisa nzutu yayi!” Ba ke tula beno na kati ya sanduku mpe ba ke kanga yawu, ngolo mingi; tii misobi, yina kele na kati ya beno, ke kudia beno.

¹¹² Beno baka faline mpe fufu, mpe bima, mpe beno bika yawu mwa ntangu fioti, ya ke kuzwa mbumbu na kati ya yawu, beno kanga yawu. Yinki ya kele? Mbumbu yina kele kuna na kati, na kubanda. Ya kele kuna, na kubanda.

¹¹³ Ntangu yayi, mbuma yayi fwana vwanda mbuma ya mbote. Ya fwana vwanda na kimpwanza na foti, kubwa, mpe nyonso yina, na kati ya yawu. Ya fwana vwanda mbuma ya kieleka. Ya lenda vwanda ve mbuma yina ba me vukisa—mbuma yina ba me vukisa, samu ti, ntangu ya ke mata, beno ke kuna dyaka yawu, mpe blé ya beno—ya beno me salama, samu ti mbuma yina ba me vukisa ke mena dyaka ve. Ya lenda mena dyaka ve. Beno katula luzingu na yawu ntangu beno ke vukisa yawu.

¹¹⁴ Mpe ya kele yina salamaka na mabuundu. Ba me vukisa bawu na yinza, mpe ya kele samu na yina konso réveil ke na kwiza, mpe beno lenda ve kuzwa réveil yankaka na manima ya yawu. Konso organisation yina ba me bongisaka ntete, ke kufwaka na kisika yina mpe ke telama ata fyoti dyaka ve, samu yawu ke bongisa yinza na kati ya basysiteme ya yawu, na yawu

yawu me salamaka ata fioti ve. Ya kele ata fioti ve na disolo yina ke talisa ti dibuundu mosi, yina me bongisa organisation, yina me telemaka ntete. Yandi kufwaka kuna. Samu na yinki? Beno me vukisa yawu.

¹¹⁵ Beno tula ve évêque na zulu ya yawu. Ti Mpeve-Santu kuvwanda na zulu ya yawu. Beno me mona? Ba fidisaka Mpeve-Santu samu na kukeba matiti ya yimbi mpe nyonso; ve yina évêque ke banzaka, to mikengi, to nyonso yankaka yina. Ya ke lombamba Mpeve-Santu na kukeba dibuundu yina na mutindu ya yawu. Yandi vwandaka Ndinga yina ya kulunga, mutindu beto ke mona.

¹¹⁶ Adam vwandaka na nsodolo ya yandi, Ndinga mpe kuzinga, to kukondwa kukwikila na Ndinga mosi mpe kufwa.

¹¹⁷ Beto kele na nsodolo mosi, samu ti beto fwana vwanda. Kana Nzambi tulaka Adam na zulu ya Ndinga, mpe Ndinga kaka, na yina Yandi ke tula beto na credo to mutindu mosi ya credo, na yina Nzambi kele ya kusungama ve na lufundusu ya Yandi, ya kele ve ya kulunga na busantu ya Yandi to na bunene ya Yandi. Kasi ya ke na kukumaka na ngolo ya Yandi nionso na kumona ti Yandi ke tula muntu nyonso na zulu ya lufulu mosi. Mpe Yandi kele Nzambi mpe ke sobaka ve. Yina Nzambi ke salaka ntete, Yandi ntangu nyonso ke salaka kima mutindu mosi. Yandi ke sobaka ata mbala mosi ve manaka ya Yandi—ya Yandi. Kima mosi kaka, Yandi ke kumisa yawu, kasi Yandi ke sobaka yawu ata fioti ve. Kima mosi ke landila kaka.

¹¹⁸ Ntangu yayi, Adam vwandaka na nsodolo. Mpe kana yandi kangamaka na Ndinga, yandi zingaka. Kana yandi kangamaka ve na Ndinga, yandi kufwaka.

¹¹⁹ Mpe beto kele na kima mutindu mosi. Beto ke kangama na Ndinga, beto ke zinga. “Muntu ke zinga na konso Ndinga.” Kasi kana beto sala yawu ve, beto ke kufwa, beto ke kufwa na kimpeve. Oh, beto lenda sala kaka makelele, kieleka, kubula dikulu, mpe kuboka mpe kulandila, kasi, yina, yina kele ve—yina ke zinga ve. Yina ke zinga ve. Mu kele missionaire. Mu me kuwaka mimpani ke pamuka na zulu mpe ke boka kulutula mutindu beto lendaka sala, mpe ke tuba na kuzaba banzambi, mpe bima ya mutindu yina. Bawu ke na kuzinga ve. “Bawu kele ya kufwa na ntangu bawu ke na kuzinga.” Biblia me tuba mutindu yina. Ntangu yayi beto ke mona ti nsodolo yayi me pesama na beto.

¹²⁰ Kasi yandi me kakula ndinga ya Satana, na manima yandi fwaka.

¹²¹ Mpe kana, mbandukulu, yina Nzambi na kati ya lemvo ya Yandi mpe kyadi zolaka luta bampasi nyonso yina beto me sala, balufwa nionso yayi ya mwa ba-bébé ya fioti, mpe bima nionso, mpe bamvita, mpe bifundu, mpe bakukomama na kulunsi, mpe bima yina beto kuzwaka; kana Yandi lendaka luta na lweka

ya yawu, Ngolo ya Yandi nionso ya Ndinga ya Yandi zolaka pesa Yandi muswa ya kuluta yawu, Yandi zolaka vwanda ya kusungama ve kana Yandi bikaka yawu ve kuna. Beno me bakula yawu? Yandi lenda ve kuluta yawu. Yandi tulaka yawu na lweka samu na Adam, na kubanda. Mpe Yandi ke bika yawu ve samu na beno to munu, na kubanda. Beto fwana kwiza na kima yina, Ndinga kaka. “Ti konso ndinga ya muntu kuvwanda luvunu, mpe ya munu kuvwanda kieleka,” Yandi tubaka.

¹²² Ntangu yayi beto ke vingila kaka na wapi kilumbu beto ke na kuzinga, na ntangu ya kuyonzika.

¹²³ Na yina Nzambi, na manima Adam kubwaka (mekaka na nzila ya Ndinga, mpe kubwaka), Nzambi landilaka, na ngidikulu ya Yandi, samu na kumeka na kuzwa muntu yina ke zinga konso Ndinga. Ntangu yayi beno tala. Yandi mekaka na kumona muntu, yina kele, kuzinga Ndinga samu na nsungi ya yandi. Ntangu yayi, beno me mona, Nzambi mwangisaka Ndinga ya Yandi, samu ti Yandi lendaka.

¹²⁴ Yandi kele, Yandi kele ya seko, mpe Yandi kele—Yandi kele yina kele bisika nionso. Yina zaba nionso, na yawu Yandi zaba bima nionso. Yandi lenda vwanda ve awa bisika nyonso. Na kuvwandaka yina zaba nyonso, na kuzabaka bima nyonso, na yina Yandi lenda vwanda awa bisika nyonso. Samu ti, ya kele mutindu Yandi ke soolaka beto na ntwala, na nzila ya luzabu ya mantwala, ve samu ti Yandi zolaka ti muntu *yayi* kuzwa mpulusu mpe *yayi* zimbanaka. Kasi Yandi zabaka nani ke zimbana mpe nani ke kuzwa mpulusu. Beno me mona? Na yina, na nzila ya luzabu ya Yandi ya mantwala, Yandi lenda kusoola beto na ntwala. Mpe Yandi ke salaka nyonso kutambula na nkembo ya Yandi. Ya kele yina binama ya Yandi ke na kusalaka, ke lakisa nkembo ya Yandi. Nzungu ya lukumu mpe mosi ya lukumu ve, kasi ya kele Nzambi yina ke salaka yawu. “Ve yandi yina zola to yandi yina ke kima mbangu, kasi Nzambi yina ke talaka kyadi.” Beno me mona?

¹²⁵ “Muntu ve lenda kwiza na Munu,” tubaka Yesu, “kana ti Tata ya Munu kubenda yandi ve. Mpe nyonso yina Tata me,” na ntangu me luta, “pesaka na Munu, ke kwiza na Munu, na Ndinga.” Wapi mutindu ba ke kwisa kana bawu vwandaka, bawu nionso kele, bawu vwandaka ya kusoola na kukwisa? “Bayina nionso yambaka Yandi, samu na bawu pesaka Yandi ngolo ya kukuma bana ya Nzambi.” Beno me mona, samu ti bankumbu ya bawu vwandaka na Buku, Yandi kwizaka samu na kuvulusa yina vwandaka na Buku.

¹²⁶ Na Apocalypse, beto ke mona ti, ntangu Bidimbu zibukaka, ya vwandaka na Buku mosi. Mpe Yandi yina vwandaka na zulu ya Kiti ya kimfumu, Nzambi, vwandaka na Yawu na diboko ya Yandi ya kibakala. Mpe ya vwandaka ve na kima mosi, muntu ve, na Mazulu to na ntoto, to kisika mosi, vwandaka ya kulunga

na kwiza baka Buku, to mpe na kutala Yawu. Jean dilaka na ya nene. . . samu ti Buku nyonso ya mpulusu vwandaka kuna.

¹²⁷ Ya vwandaka na lukutakanu nkokila yankaka yina, mwa Assemblée yango ya Nzambi mpangi-bakala mpe mpangi-kento yimbaka nkunga yina, “Mu ke kukiufula kana Jean monaka munu ntangu yandi monaka bayinsi nionso vukanaka. Yandi monaka munu?” Kieleka, yandi salaka yawu, kana nkumbu ya beno vwandaka na Buku yina. Mpe ntangu. . .

¹²⁸ Nkumbu ya Jean vwandaka na zulu ya yawu, mpe, mpe yandi dilaka samu ti ya vwandaka ve na muntu yina zolaka simba Yawu. Mpe kuna mosi ya bakuluntu kwizaka mpe tubaka, “Kudila ve, Jean, samu ti Nkosi ya Dikanda ya Juda me nunga.”

¹²⁹ Mpe Jean vwandaka tala pene-pene ya kumona nkosi, mpe kuna na manima ya ba-rido me kwiza Mwana-dimeme, mwana ya dimeme yina ba kufwaka kubanda mbandukulu ya yinza. Na yina yandi monaka Mwana-dimeme ya menga basikaka, mpe Yandi kwisaka mpe bakaka Buku na diboko ya kibakala ya Yandi, mpe bokilaka nyonso yina vwandaka na Buku yango. Ya kele Buku ya muvimba ya mpulusu. Mpe *yayi* kele Yawu. Buku ya mpulusu, Yandi vulusaka nyonso vwandaka na kati ya Buku yango, na ngaanda ya Buku ve. Nyonso yina kuzwaka mbandukulu kele na nsuka. Kasi kana beno kele na Luzingu ya Kukonda nsuka, beno me bandaka ata fioti ve mpe beno lenda ve nsuka, samu ti beno kele bana ya babakala mpe bana ya bakento ya Nzambi, binama ya mabanza ya Yandi mpe Ndinga ya Yandi. Beno kele ve na nsuka ya Luzingu, kana nkumbu ya beno kele na Buku yina. Mwana-dimeme kwisaka samu na kuvulusa Yawu. Bayina nionso ke tubaka “Baklisto,” nionso yina ke meka na kuzinga mbote mpe santu; kasi bayina bankumbu kele ya kusonika kuna, Yandi vulusaka yawu, mpe bayina kaka, bayina bankumbu vwandaka na Buku.

¹³⁰ Ntangu yayi beto ke mona ti Satana salaka ti Adam kubwa, na nzila ya ndinga yina mosi. Mpe Nzambi landilaka ntangu yayi, na luvangulu ya Yandi, samu na kumeka na kuzwa muntu yina ke zinga na konso Ndinga. Muntu ya yandi ya ntete kubwaka. Mpe muntu yayi zolaka zinga ntangu ya yandi, nsungi ya yandi yina yandi zingaka.

¹³¹ Ntangu yayi, beno me mona, ya kele na bansungi ya mutindu na mutindu ti Nzambi pesaka profesi na mbandukulu, yina zolaka salama bisika nyonso. Ya kele samu na yina Yandi lendaka tuba nsuka na mbandukulu, ya kele samu ti Yandi zabaka bima nyonso. Yandi salaka bima nyonso na nzila ya Yesu Klisto, mpe samu na Yandi, mpe samu na kilengi ya Yandi Mosi. Beno tala mbote ntangu yayi. Beno kondwa yayi ve.

¹³² Yinki ke salama kana Moise lendaka kwisa samu na kulonga nsangu ya Noé? Ya zolaka simba ve. Ve. Ve.

133 Yinki kana Yesu zolaka kwiza na kunataka nsangu ya Moise? Ya zolaka simba ve.

134 Yinki ke salama kana beto kwisa, beto meka na kulonga nsangu ya ba-Methodiste, nsangu ya ba-Baptiste, to nsangu ya ba-Pentecotiste? Ya zolaka simba ve. Ba vwandaka mbote; ba talisaka yawu na mwa ntangu fioti, na nzila ya Ndinga. Ba vwandaka mbote mingi na nsungi ya bawu. Nsungi yina me kwenda. Beto fwana mona yina Masonuku me tuba samu na bubu yayi. Bubu yayi, ya kele yina muntu ke zinga samu na, nzila ya nsungi ya yandi.

Yandi mekaka na kuzwa muntu yina ke zinga Ndinga ya muvimba.

135 Kima ya ntete Yandi salaka, Yandi mekaka Noé. Noé kondwaka Yandi; yandi zimbanaka, yandi kubwaka.

136 Moise, kisalu yina ya nene ya kisalu ya nene ya Nzambi, Yandi mekaka yandi mpe yandi kubwaka. Yandi kembisa yandi mosi, mpe yandi vwandaka ve na muswa ya kukota na yinsi ya nsilulu.

137 Na manima kwizaka David, ti Yandi zolaka lakisa ya Yandi—ya Yandi. . . Millenium ya nene, na kati ya David, mpe Yandi zolaka lakisa yina vwandaka Ntinu ya Yandi. Mpe Nzambi zengaka ndefi na nzila ya David, yandi ke vumbuka. . . ke vumbula Mwana ya Yandi ya bakala na kuvwanda na kiti ya yandi ya kimfumu. Mpe David vwandaka muntu mosi ya ngolo, ti, “yandi vwandaka muntu na manima ya ntima ya Nzambi Mosi.” Mpe David vwandaka sala mbote. Yandi bulaka ba-Philistin nionso mpe pasulaka ba-autel, mpe bikanaka na Ndinga. Mpe, na nsuka, kento mosi ya kitoko kotisaka yandi, mpe yandi bukaka musiku, zimbisaka Ndinga, salaka pité. Beno me mona? Muntu na manima ya ntima ya Yandi Mosi, beno me mona, dyaka David kondwaka Yandi.

138 Moise kubwaka Yandi, bayankaka nionso kondwaka Yandi, kasi baluzingu ya bawu nyonso vwandaka kaka kifwani ya Yandi yina zolaka kukwiza.

139 Na kati ya Buku ya Apocalypse, mutindu mu ke na kusonika, bakala mosi yina ke na kubangula to kuyidika grammaire. . . Grammaire kele mputu mingi, mu kele ve na mayele ya mbote samu na kutula yawu na grammaire, kutula bankumbu ya mbote mpe biyingilu kintwadi. Na yina, mu zaba ve yina kele luswaswanu kati-kati ya nkumbu mpe kiyingilu. Kasi, kasi yandi ke sala yawu, mpe yandi ke tula bawu nionso. . . Mu zaba, kima kaka mu zaba, Nzambi ke pesaka Yawu na munu mpe mu ke sonika kaka Yawu, beno me mona. Mpe, bawu, ba fwana tula yawu na mutindu ti kana ya kwenda na balukolo mpe nyonso, bawu—bawu zaba yinki, lenda tanga yawu mingi na mutindu ya bawu ya lubakusu. Mpe na yina nsoniki tubaka na munu, to, grammaire, bakala yina ke na kutula grammaire na yawu, yandi

tubaka na munu, yandi tubaka, “Kasi, Mpangi Branham, beto ke mona na nsungi ya dibuundu ya Pergame. . . Ti, Yesu tubaka awa, ‘yandi yina ke nunga, mu ke pesa yandi Mbwetete ya Suka.’ Pesa yandi Mbwetete ya Suka?” Yandi tubaka, “Ntangu yayi wapi mutindu yandi lendaka kuzwa Mbwetete ya Suka, ntangu Yesu tubaka, Yandi mosi, ti Yandi kele Mbwetete ya Suka?”

¹⁴⁰ Beno me mona, bankuna yina nionso ya Abraham ke talisama na nzila ya bambwetete. Bawu kele ya kuswaswana mosi na yankaka, mpe beto ke vwanda ya kuswaswana mosi na yankaka. Mpe Yesu kele Mbwetete yina ya Suka, ya kulutula kitoko na kati ya bawu nionso. Kasi beto ke mona Yandi, na Apocalypse 1, na bambwetete sambwadi na diboko ya Yandi. Yandi ke tendula yawu, mpe tubaka, “Bambwetete sambwadi yayi kele bawanzio sambwadi na mabuundu sambwadi, to bansungi sambwadi ya dibuundu yina ke na kwiza.”

¹⁴¹ Na yina yandi tubaka, “Wapi mutindu ya lendaka vwanda kuna, kana ba kele na Mbwetete ya Suka?”

¹⁴² Mu tubaka, “Bambwetete yina vwandaka na diboko ya Yandi vwandaka kaka bambwetete ya Mbwetete ya Suka, beno me mona, samu na munati-nsangu ya kilumbu yina vwandaka na Ndinga.” Mpe Yandi kele Ndinga; yandi vwandaka kaka na kitini ya kilumbu yina. Mpe bantu yina me kubama na kubasika na ba systeme ya yinza mpe bima ya yinza, mpe kutambula na Yandi, kumona kifwani ya Mbwetete ya Suka na nzila ya munati-nsangu ya nsungi yina. Mutindu Yandi salaka na nzila ya Noé mpe na nzila ya Moise, mpe nyonso yina, mutindu Yandi talisaka Ngwisani ya Ntama, na nsuka bawu nionso kumaka na Mosi. Mpe mutindu mosi ya ke vwanda na nsuka ya bansungi ya dibuundu, ya ke vutuka nyonso na Yesu, ti Yandi kele Ndinga.

¹⁴³ Beto mutindu Baklisto ke talisaka Yandi kaka. Ngonda ke talisaka kaka mwini, na ntangu ya mwini kele ve. Mpe mukwikidi ke lakisaka kaka Mwana ya Nzambi, na ntangu Mwana ya Nzambi kele ve. Ya kele Nsemo ya Biblia, Masonuku, yina me siamisama na baluzingu ya beto, Ndinga yina ke salaka Nsemo na mpimpa. Beno kele minda yina kele na zulu ya mongo. Ya kele mwini ve; ya kele mwinda. Mwinda ke bakaka kaka kisika ya mwini, ke talisaka kaka lutangu mosi ya nsemo. Beto kele bana ya Nzambi, beto kele bana ya babakala mpe bana ya bakento ya Nzambi, kaka na nzila ya Mpeve na ndambu. Yandi kuzwaka Yawu kukondwa kitini. Beto kele mbwetete yina ke sema, beto nionso kintwadi ke sala Nsemo na yinza, kasi Yandi kele Mwana ya muvimba yina ke lakisa Nsemo na konso mbwetete. Alleluia! Mu ke kwikila Yandi. Nzambi sadisa kukondwa lukwikilu ya munu!

¹⁴⁴ Na nsuka, Mosi yayi ya kulunga kwisaka. Ntangu yayi, ba mekaka Yandi na bisika nionso kaka mutindu beto kele. Biblia ke tuba ti Yandi vwandaka. Ba mekaka Yandi mutindu Noé.

Ba mekaka Yandi mutindu Moise. Ba mekaka yandi mutindu bayankaka nionso. Kana beto vwandaka na ntangu ya kubuka yawu mpe kulakisa beno, kasi beto kele ve, na yina ti mu zola baka ntangu mingi ya beno ve. Kasi, samu na kubuka yawu mpe kulakisa beno, ba mekaka Yandi na mutindu mosi.

¹⁴⁵ Satana ke sobaka ata mbala mosi ve tiki-taki ya yandi, to Nzambi ke sobaka kaka bansungi. Kasi yinki . . . Satana kotaka kuna, na dikanda ya ntete ya Nzambi, na zulu ya ntoto. Yawu yayi mpangi-bakala, mpangi-kento. Beno kondwa ve na kusimba yayi. Wapi mutindu Satana kuzwaka dibuta ya ntete? Yandi lendaka ve kubuka yawu na mutindu yankaka ve kasi kuzwa Ndinga yina me bukana, samu ti bawu vwandaka na kikesa na manima ya Ndinga yina. Kana yandi lendaka kaka kuzwa luswaswanu mosi!

¹⁴⁶ Yina kele mutindu yandi kuzwaka dibuundu nionso na nsungi nionso, yandi kuzwaka mukwikidi nionso, yandi fulusaka kaka luswaswanu yina. “Mbote, mu—mu ke kwikila ti Biblia kele ya kusungama, kasi mu ke kwikilaka *yawu* ve.” Oh, kuna yandi ke kwenda. Yimbi mingi, kasi kuna yandi kwendaka.

“Konso Ndinga yina ke basika na yinwa ya Nzambi!”

¹⁴⁷ Ntangu yayi beno kuwa mbote yayi ntangu yayi. Ntangu yayi Yandi na nsuka, Yandi yayi yina zolaka, kumaka mpe zolaka kumekama kaka kieleka mutindu bayankaka ya bawu kumekamaka. Ntangu yayi beno tala wapi mutindu Satana ke na kunwanisaka na mutindu ya yandi nionso, kaka mutindu mosi na konso ntangu. Ntangu yayi yandi mekaka na kupesa Yandi dimpa ya yinza, kaka mutindu yandi salaka na Eve. “Kana beno ke kudya *yayi*, beno ke baka *yayi*,” to kima yankaka, yandi me kuzwa yawu.

¹⁴⁸ Mpe ya kele yina yandi ke salaka na konso organisation, ya kele yina yandi ke salaka na konso muntu yandi mosi, yandi ke meka na kupesa beno bima ya yinza yina beno lenda tala. Mpe ya ke nata beno ntama! “Mbote, beno tala dibuundu yayi ya nene! Mbote, ba kele na mafuku mingi na kati ya yawu! Dibuundu ya beto kele dibuundu ya kulutila nene na kati ya mbanza. Mbote, ya beto, beto kele na mfumu ya mbanza yina ke kwizaka na dibuundu ya beto. Beno me mona nyonso yina! Pasteur ya beto kele na diplome ya DOCTORAT na Théologie, Doctorat na Droit, Doctorat na Philosophie! Ti, mbote, yina, mbote, yandi ke vwanda muntu ya mayele.” Nganga-Nzambi ya Katolika lenda kwiza mpe kufuka yandi, ntangu nyonso, na ba-diplome ya yandi. Yandi kele na babuku makumi sambanu na mosi ya ngitukulu yina yandi fwana zaba yimbi mutindu beno ke zaba Biblia, samu na kuzwa diplome ya yandi na kuvwanda nganga-nzambi, na yina beno meka ve na kufwanikisa.

¹⁴⁹ Ya kele kaka mutindu yinza, ya ke mekaka ntangu nyonso na kufwanikisa. Beno fwani kisa ve na bima ya yinza. Beno

fwanikisa ve na mabuundu. Beno fwanikisa na Biblia! Yawu yina beto ke sala bubu yayi. Yawu yina diambu na beto mabuundu ya ba-Pentecotiste. Yawu yina diambu na mwa ba-yiya ya beto mpe kuyimba, mpe nionso yina, mutindu beto ke na yawu, beto ke meka na kusala mutindu Hollywood. Hollywood ke ngengaka; Nsangu ya mbote ke kupela. Ya kele na luswaswanu mingi na kati-kati ya kungenga mpe kulema. Beno me mona? Hollywood ke ngenga na bilele, mpe ba-Ricky mpe ba-Rickettas, mpe ricochet. Kasi Nzambi ke semaka na kukikulumusa nionso na kati ya kukikulumusa ya mukwikidi, ata ti yandi me zaba kima ve. Yandi ke semaka na kati ya kukikulumusa, ve ke ngenga na kati ya Hollywood.

¹⁵⁰ Beno tala, yandi mekaka tiki-taki ya yandi ya ntama na Yesu, kima mosi yandi salaka na Moise, kima mosi yandi salaka na bayankaka. Yandi mekaka yawu. Yandi ke meka yawu na zulu ya beno, samu beno ndima kima mosi ya nene yina ke sema.

¹⁵¹ Ya ke bambuka munu ntangu mu vwandaka zomba baniawu, bankumbi. Mu zolaka baka . . . Papa, tata ya munu, vwandaka baka tabaka. Mu zaba ve kana beno nionso me zabaka ntete mosi ya bima yayi yina vwandaka vwanda na zulu ya kisimbilu ya tabaka. Mu lendaka baka yawu, mu ke baka kitini ya yinti mpe mu ke tobola dibulu mosi na kati ya yawu, kaka penepene ya mwa masa kisika niawu vwandaka kima mbangu. Mpe na manima mu lendaka tobola dibulu mosi na kati kuna, mpe kunamika etiketi ya tabaka kuna. Mpe na manima mu vwandaka na mwa bansoso, na kulobaka kuna mutindu *yayi*. Mpe niawu ke sosaka ntangu nionso kima yina ke ngengaka. Mpe na yina ntangu ngonda kwisaka, mpe yandi kwendaka mbangu kuna, yandi talaka na manima kuna, yandi kotisaka diboko ya yandi na kati kuna samu na kubaka yawu. Mpe yandi ke bika yawu ve.

¹⁵² Yandi kele mutindu bamambeke ya dibuundu mosi. Mpe yandi zaba ti ba me simba yandi, yandi ke bika yawu ve. “Kana mu sala yawu, ba ke tula munu na ngaanda ya organisation.” Ya kele kaka lufwa ya yandi, kaka yina. Mbote mingi. Beno tala. Kuna yandi ke kangama na yawu, yandi ke bika yawu ve.

¹⁵³ Ntangu yayi Satana mekaka tiki-taki ya yandi mosi na zulu ya Yesu, ti yandi mekaka na bayankaka ya bawu. Yandi mekaka na kusala Yandi kudya kima na ngaanda ya Dimpa ya nsilulu. Samu ti, Yesu tubaka, “Ya kele ya kusonama, ‘Muntu ke zinga kaka na dimpa ve.’” Beno me mona? Yandi mekaka na kusala Yandi kutumama na yandi. Ata ti ya vwandaka kitoko, ya vwandaka talana mutindu Yandi zolaka dikisa Yandi mosi, mpe Yandi zolaka sala yawu. Beno me . . .

¹⁵⁴ Beno lenda sala mutindu nyonso beno zola, mpe. Beno lenda baka Yawu to kubika Yawu, to mosi na beno zola. Ntangu yayi kana coon vwandaka na sense mingi, oh, kanga diboko ya yandi na manima, yandi lendaka basisa yawu diaka; kasi yandi ke sala

yawu ve, yandi ke simba kaka yandi mosi kuna. Mpe ya kele mutindu yina Baklisto mingi ya nkumbu ke salaka, mpe. Bawu zola ve kuwa kima mosi samu na Yawu, bawu zola kwisa ve mpe kuwa Yawu. Bawu zola kima mosi ve samu na Yawu. Beno kwenda na ntwala mpe beno kangama na yawu kuna, beno me mona, beno ke mona yina ke salama.

¹⁵⁵ Ntangu yayi beno tala, bawu mekaka na kusala Yandi kudya kima mosi na ngaanda ya Dimpa ya Luzingu yina muntu nyonso zolaka zinga na nzila ya yawu. Kasi Yesu bikanaka na Ndinga ya Tata. Oh, yandi bulaka ve Eve na ntangu yina, yandi bulaka ata fioti ve Moise, yandi bulaka ata fioti ve mosi ya bawu nyonso. Yandi bulaka Mosi zolaka lakisa konso Ndinga. Beno me mona, Yandi, ya kele samu na yina, Yandi vwandaka Ndinga. Kasi Yesu bikanaka na Ndinga, mangaka malongi ya yandi ya théologie, yinga, tata, nsemo ya yandi ya malu-malu, kimbangi ya yandi ya kulutila. Yandi lendaka ve kupusa yawu na zulu ya Yesu mutindu yandi bendaka yawu na Eve, samu na kutalisa yandi, “Oh, ya kieleka, Nzambi. . .”

¹⁵⁶ “Oh, ya kieleka, Nzambi ke vwanda na kati ya yayi kana beto lendaka vukana mpe kusala Kimvuka ya mabuundu ya Yinza ya muvimba. Ya kieleka, Nzambi ke vwanda. Yandi zola kuvukana mpe Yandi zola kimpangi.” Na Yandi mosi, na yinza ve; kimpangi na Yandi mosi, kusambila samu na Yandi mosi. Ya kele samu na yina Yandi kufwaka, ti beno zolaka sambila Yandi. Mutindu ntangu nyonso, kana yandi lenda ve. . .

Ntangu yayi beto ke mona ti yandi kubwaka. Yesu vutukaka kaka na yandi, na **MUTINDU ME TUBA MFUMU**.

¹⁵⁷ Ntangu yayi ntangu yandi ke mona ti mukwikidi. . .Beno tala mbote mukwikidi kukwiza na bakategoli yayi mosi ntangu yayi, mosi na mosi ya beno. Ntangu yandi ke mona (yandi) beno ke bikana na Biblia, “Yinga, mu ke kwikila Biblia. Mu ke kota ve na credo mpe kima mosi kuna. Mu ke bikana na Biblia.” Mpe, mutindu ntangu nyonso, kana yandi lenda nata beno ve na kukwikila, na—na kuzinga Kieleka ya kieleka mpe kukwikila Ndinga, Mu zola beno kutala yina yandi salaka na Yesu, mbala ya zole, kana yandi me kuma beno ve. Beno tuba, “Mu ke kota ve na credo. Mu ke kwenda ve. Mu kele, mu butukaka na kimpwanza, mu ke bikana na Yawu. Mu ke sala *yayi, yina*, to *yankaka*.” Beno me mona, “beno kota na dibuundu,” mpe “beno kwisa kota,” mpe kima yankaka; yandi lenda nata beno ve na kusala yawu, na yina yandi ke sala kima yankaka na beno. Oh, mpangi-bakala, beno tala mbote yayi.

¹⁵⁸ Kana yandi sala yawu ve, na yina yandi ke tinda beno na seminere ya yandi mosi, samu ba longa yandi na ba-théologien ya yandi mosi, beno me mona, kisika Satana kele mutendudi. “Oh, bilumbu ya bimangu me lutaka. Bantu yina kuna, mu kele. . .

mbote, yina kele nkonga ya ba-eretiki. Bawu, bawu kele ve, beno me mona.” Yandi ke fidisa beno kuna.

¹⁵⁹ Oh, beno lenda tuba, “Vingila fioti, Mpangi Branham! Vingila fioti ntangu yayi!” Yinga, beto vingila fioti, beno me mona. Beno ke tuba ntangu yayi, “Beno fwana dyaka ve? Beto fwana vwanda ve?” Ve, tata. Ve, tata.

¹⁶⁰ Kasi Yesu tubaka, “Ntangu Yandi Mpeve ya Kieleka ke kwisa, beno me mona, Yandi ke nata bima yayi yina mu longaka, na mabanza ya beno, Ndinga. Mpe Yandi ke lakisa beno mpe bima yina ke kwiza.” Ya kele na Dibuundu ya kieleka ya kifuluka na Mpeve ntangu yayi, ke bikana na Ndinga, ke lakisa Ndinga, Nzambi na zulu ya ntoto. Beno me mona? Yandi ke na nsatu ya théologien mosi ve, samu Ndinga ya Yandi kele ve ntendulu ya muntu yandi mosi. Yandi ke tendulaka Ndinga ya Yandi Mosi, na kusiamisaka Yawu mpe ke siamisa Yawu, Yawu kele Kieleka.

¹⁶¹ Ntangu dibuundu ya ba-Methodiste tubaka na beno ti beno lendaka ve kuzwa Mpeve-Santu mutindu bawu salaka na Kilumbu ya Pentecote, beno me sala keba na yawu? Kieleka ve. Beno me kwenda kaka mpe me kuzwa Mpeve-Santu, na mutindu nyonso. Beno me mona? Samu ti . . .

¹⁶² Mu vwandaka zonzila butatu na mulongi ya Baptiste, nkokila yankaka yina, mpe mu tubaka na yandi ti ya vwandaka kaka terminologie. Mpe na yina beto bakulaka ti, yandi tubaka, longi yankaka ya fioti kuna na seminere, yandi tubaka, “Kasi, Tata Branham, nge ke meka na kusala ti bantu kukwikila nsambulu ya bantumwa.”

Mu tubaka, “Ya kieleka, yina kaka kele.”

Mpe yandi tubaka, “Tata, wapi kisika nge kwendaka na lukolo?”

¹⁶³ Mu tubaka, “Na zulu ya mabolongo ya munu, mpangi ya munu ya bakala. Ve na . . . Beno me mona, ya kele kisika yina mu kuzwaka, théologie ve, kasi dibolongo.” Mu tubaka, “Ya kele kisika mu monaka Yandi.”

¹⁶⁴ Mpe yandi tubaka, “Tata Branham, mbotika ya Mpeve-Santu, mutindu bawu kumaka na Kilumbu ya Pantekote, beno ke meka na kutuba ti ya kele bubu yayi?”

¹⁶⁵ Mu tubaka, “Biblia ke tuba, tata, ti . . . ti Yesu Klisto kele mutindu mosi mazono, bubu yayi, mpe kukonda nsuka.” Mu tubaka, “Yina vwandaka Yesu Klisto yina kwisaka na Kilumbu ya Pentecote.” Oh, yinga.

¹⁶⁶ Ve, Mosi kaka! “Kasi na mwa ntangu fioti, mu ke sambila Tata, Yandi ke fidisa beno kisadisi yankaka, yina kele Mpeve-Santu. Na mwa ntangu fioti mpe yinza ke mona Munu diaka ve, Munu diaka ve; kasi beno ke mona Munu, samu Mu ke vwanda

na beno, ata mpe na kati ya beno, tii na nsuka ya ntangu, nsuka ya yinza.”

167 Mu tubaka, “Yinga, ya kele Yandi kwisaka na Kilumbu ya Pentecote. Yinga, tata. Yandi kwizaka, zingaka na kati ya bawu, beno tala, na mutindu ya muntu ya Mpeve-Santu, Yesu Klisto na kati ya muntu ya Mpeve-Santu, mutindu beto ke bakula Bunzambi.”

168 Ntangu yayi beno tala, Satana vwandaka ve na nsatu ya théologie ya yandi, théologie. Mpe muntu yayi tubaka na munu, yandi tubaka, “Tata Branham,” yandi tubaka, “Mu ke sala ti nge bakula, mu me katuka na lukolo mosi, mpe ba me longusa beto.”

Mu tubaka, “Mu ke kuwaka dinaka ya nge, ntangu nionso.” Beno me mona?

Yandi tubaka, “Beto kele ya kulongoka kuna.” Yandi tubaka, “Mbotika ya bawu ya Mpeve-Santu vwandaka kaka samu na bilandi.”

169 Mu tubaka, “Biblia ke tuba ti ya vwandaka ‘nkama mosi na makumi zole’ na kivinga ya zulu.” Mpe mu tubaka, “Ntangu yayi nani kele kieleka, nge to Ndinga?”

170 Mpe mu tubaka, “Mpe na yina, diaka, ntangu Philippe kwendaka kuna mpe longaka na ba-Samaritain, mpe yandi botikaka bawu na Nkumbu ya Yesu Klisto, kasi Mpeve-Santu kwisaka ntete ve na zulu ya bawu, samu Pierre vwandaka na bafungula. Na yawu yandi fidisaka na Jérusalem mpe bakaka Pierre, yina kulumukaka mpe tentikaka maboko na zulu ya bawu, mpe Mpeve-Santu kwisaka na zulu ya bawu. Biblia ke tuba, ‘Mpeve-Santu!’”

171 Mu tubaka, “Na yina Pierre, na vision, na bafungula, kwendaka na yinzo ya Corneille, Actes 10, makumi yiya na yivwa... ‘Mpe na yina yandi tubaka bampova yayi, Mpeve-Santu kulumukaka na zulu ya bawu. Samu ti bawu kuwaka bawu kuzonza na bandinga, mpe—mpe—mpe kupesa profesu, kukembila Nzambi. Na yina Pierre tubaka, beto lenda yimina maza, ti bayayi kuzwa ve mbotika, na kumonaka ti bawu kuzwaka Mpeve-Santu mutindu beto kuzwaka na mbandukulu? Mpe yandi tumaka bawu na kubotama na Nkumbu ya Yesu Klisto.’

172 “Beto ke mona, bamvula makumi tatu na ntwala, Paul kulutaka na basimu ya zulu ya Éphèse, ke mona bantu ya ba-Baptiste yina vwandaka na reveil ya nene. Bima ya nene vwandaka salama. Bawu vwandaka boka, vwandaka kembila Mfumu. Mpe Paul kwendaka tala dibuundu kisika bantu makumi zole vwandaka na lukutakanu, kisika Aquilas mpe Priscille vwandaka na lukutakanu; kisika Apollos, muntu ya musiku yina ndimaka, na kusiamisaka na nzila ya Biblia ti Yesu vwandaka Klisto. Mpe bawu vwandaka na kyese ya nene, mpe lukutakanu ya nene. Paul kulutaka, yandi kwizaka na

manima ya yandi. . . Mfumu vulusaka yandi na boloko; samu na kubasisa mpeve, dyabulu na nganga-nkisi. Mpe na manima yandi kwisaka kuna, na kosalu ya Mfumu, mpe yandi kwendaka kuwa lukutakanu. Mpe yandi tubaka, 'Muntu yayi kele muntu ya nene, mbote mingi, kasi,' yandi tubaka, 'beno kuzwaka Mpeve-Santu tuka beno kwikilaka?' Yandi kwikilaka ti beno kuzwaka Yawu ntangu beno kwikilaka. Kasi yandi tubaka, 'Beno kuzwaka Mpeve-Santu tuka beno kwikilaka?' Yandi tubaka, 'Beto zaba ve kana ya kele na Mpeve-Santu mosi.'

¹⁷³ "Yandi tubaka, 'Nani botikaka beno?' Yina vwandaka kyuvu. Yandi tubaka, 'Beto botamaka, muntu mosi yina botikaka Yesu: Jean. Beto botamaka na mbotika ya Jean.' Beno me mona? Yandi tubaka, 'Jean botikaka kaka samu na kubalula ntima, ve samu na mulemvo ya masumu.' Jean. . . samu ti ba kufwaka Mwana-dimeme ntete ve. Yandi tubaka, 'Jean botikaka samu na kubalula ntima, na kumonaka ti nge fwana kwikila na Yandi yina zolaka kwiza, na Yesu Klisto.' 'Mpe ntangu bawu kuwaka yayi, bawu kubotamaka na Nkumbu ya Yesu Klisto. Mpe Paul tentikaka maboko ya yandi na zulu ya bawu, mpe Mpeve-Santu kwisaka na zulu ya bawu, mpe bawu pesaka profesi mpe tubaka na bandinga, bamvula makumi tatu na manima."

Mpe mu tubaka, "Na ngaanda ya yina, nge ke kwikila Biblia?"

Yandi tubaka, "Kieleka."

¹⁷⁴ Mu tubaka, "Pierre, na Kilumbu ya Pantekote, ntangu makelele nyonso yayi vwandaka bisika nyonso, mpe bawu nyonso vwandaka boka mpe vwandaka kembila Nzambi, bawu tubaka, 'Bampangi, yinki beto lenda sala samu na kuzwa mpulusu?' Pierre tubaka, 'Beno balula ntima, mosi na mosi ya beno, mpe beno botama na Nkumbu ya Yesu Klisto samu na mulemvo ya masumu, mpe beno ke kuzwa dikabu ya Mpeve-Santu, samu ti nsilulu kele samu na beno mpe bana ya beno, mpe na bayina kele ntama, ya mingi Mfumu Nzambi ya beto ke bokila.' Mazulu na ntoto ke luta, kasi Ndinga yina ke kubwa ata fioti ve!"

¹⁷⁵ Beno ba-Pentecotiste ke kipe ve ba-Methodiste, ba-Baptiste, to ba-Presbytérien. Beno zaba ti Yawu vwandaka samu na konso nsungi, mpe beno me kota na kati ya Yawu. Kieleka. Ntangu yayi, beno telema ve na kulandila kuna, beno landila kaka na kukwenda na ntwala, beno me mona.

¹⁷⁶ Ya kele kisika yina ba-Méthodiste salaka kifu ya bawu, bawu kimaka na kusantisama kasi bawu telemaka. Ba-Luthérien me kota na kunungisama mpe me telama. Beno me mona, na yina ya ke bongisa yawu, kuna ya ke kufwa. Yina kele nsuka ya yawu. Yawu yina kaka.

¹⁷⁷ Beno tala mbote ntangu yayi na yina beto ke sala nswalu. "Ntangu Mpeve ya Kieleka ke kwisa, Yandi ke longa beno bima

nionso, nionso yina mu longaka beno,” oh, la la, “na kupesaka kimbangi ya balubambuku nionso na beno, yina mu me tuba na beno, na kunataka na beno, balubambuku nionso. Mpe Yandi ke lakisa beno bima yina ke kwiza. Yandi ke siamisa konso Ndinga, na kusiamisaka Ndinga na bidimbu ke landa.” Nyonso yina Yandi silaka, ti Nzambi silaka na kati ya Biblia, kana beno katukila konso credo mpe nyonso yankaka, mpe kukangama na Ndinga, Nzambi me tumama na ngolo na kukeba Ndinga ya Yandi. Mpe na yawu ntangu bawu salaka yayi, Ndinga ke siamisaka Yawu mosi.

178 Yandi ke na nsatu ya muntu ve samu na kutuba, “Mbote, bilumbu ya bimangu me lutaka.”

179 Nani kele muntu yina ke tubaka na munu ti bilumbu ya bimangu me lutaka, ntangu mu vwandaka mbala mosi muntu ya kufwa meso? Alleluia. Mu me lalaka ntete na kisika yina badokotolo pesaka munu minuti tatu samu na kuzinga, mpe mu kele ya moyo bubu yayi. Wapi mutindu ba lendaka tuba na munu kima ya luswaswanu? Mbala mosi mambele ya dibuundu ya tiya ve madidi ve, ntangu yayi ya kufuluka na Mpeve-Santu. Nzambi ke na nsatu ya mutendudi mosi ve. Mpeve Yawu mosi, yina kele Ndinga, ke tendula yawu na kuvwanda Kieleka. Kana muntu lenda telama mpe kubaka Yawu. Yandi kele mutendudi ya Yandi Mosi. Beno meka Yandi kilumbu mosi, mpe beno tala kana ya kele kieleka ve. Beno sala bukebi ve na yina muntu mosi tubaka. Beno sala yina Nzambi tubaka na kusala.

180 “Mbote,” beno ke tuba, “Mu ke sala yayi.” Mbote, yinki samu na yankaka, konso Ndinga? Ndinga mosi ke buka muniololo.

181 Ya kele kisika yina mabuundu ke kubwaka ntangu nionso, kaka na muniololo yina. Ba ke sala organisation na yawu mpe ba ke vukisa kima yango kintwadi, mpe ba ke sala denomination ya nene. Bantu yayi ke vukana, Tata ya Santu *Kingandi* mpe Docteur Bishop *Kingandi*. Mpe yinki kele kima ya ntete beno ke na yawu? Yawu yina. Beno ke kufwa kaka kuna. Beto ke siamisa yawu na nzila ya yinza mpe na nzila ya Ndinga, kana Mfumu kuzola, na baminuti fyoti. Mbote mingi.

182 “Na kunataka na lubambuku.” Yandi ke siamisaka Ndinga nionso, mpe beto ke zinga na nzila ya Yawu. Alleluia! Beno zinga na nzila ya Yawu! “Muntu ke zinga na konso Ndinga, konso Ndinga me siamisama.” Yesu tubaka, “Bidimbu yayi ke landa bayina ke kwikila. Ke landa bayina ke kwikila!” Beno simba Yawu; Nzambi ke siamisaka Yawu, ti Yawu kele Kieleka.

183 Kisika, baseminere mpe ba-théologien, yina me twadisama na Satana, ke tuba, “Beni lenda tula kivuvu na Yawu ve. Ya kele samu na bantumwa. Bilumbu me luta. Ya kele ve na kima mutindu yina. Yina vwandaka kaka samu na bantumwa, samu na kusiamisa Nsangu ya mbote kuna. Beto me longuka bantu bubu yayi.”

184 Bawu kuzwaka ndongosolo ya mbote mingi kulutila yina beto me kuzwa bubu yayi. Beno tuba na munu dibuundu nyonso yina lenda kwiza na yawu, Kimvuka ya bakuluntu yina, ntangu nkooko ya nkooko ya nkooko ya nkooko ya yawu ya bakala zolaka vwanda banganga-nzambi, na manima ya bawu. Ndinga mosi ya kutengama na kati ya yawu, na rulo yina, to, na yina, ba—ba vwandaka bula yawu samu na yawu. Ba zolaka vwanda nyonso ya kieleka. Kasi bawu kondwaka na kumona Mbuma ya kieleka ya Ndinga ntangu Yawu kwizaka, Luzingu. Ya kele samu na yina ba fundisaka bawu mpe ba bokilaka bawu “bisadi ya Satana.”

185 Beno me mona, yina ke lakisa ve Ndinga ya Nzambi, ntangu muntu ya seminere ke tuba na beno, “Mpeve-Santu kele ve samu na bubu yayi. Mpe bima yayi, bima yina nionso ya kubeluka ya Kinzambi, samu na kilumbu mosi.” Beno me mona, ya kele ve kifwani ya Nzambi, ya kele kifwani ya credo. Ya kele kifwani ya malongi yina kele na ngaanda ya Biblia.

186 Hébreux 13:8 ke tuba, “Yandi kele mutindu mosi mazono, bubu yayi, mpe kukonda nsuka.” Santu Jean 14:12, me tuba, “Yandi yina ke kwikila na Munu, yandi mpe ke sala bisalu yina Mu ke sala.” Ntangu yayi wapi mutindu beno ke katula Ndinga yina kuna, wapi mutindu beno ke bwela kima na kisika ya Yawu? Beno ke buka muniololo ya Luzingu. Muntu ke zingaka na nzila ya Dimpa kaka, Dimpa, ya Seko yandi ke zingaka na nzila ya Dimpa yina. Na nzutu, yandi ke zingaka na nzila ya dimpa yayi. Ya kele na mampa zole. Mpeve-Santu, Mpeve-Santu kele na kati ya beno, ke tuba “amen” na konso Ndinga ya Nzambi, kana ya kele Mpeve-Santu. Ntangu yayi mu zola kuyufula beno kima mosi. Ntangu yayi yayi kele kitini ya mpasi.

187 Mama vwanda pesaka munu mafuta ya ricin ntangu mu vwandaka mwana ya fioti. Mpe mu—mu lendaka ve kukanga ntima na nsunga ya bima, kasi. Beno me mona? Beto me kula na bumputu, mpe mama vwandaka tokisa bampusu ya nsuni mpe vwandaka nata yawu. Beto vwandaka nata yawu na... na mpangi-kento mosi ya kiboba na nkumbu ya Goodwin, yina vwandaka na fulu ya mampa kuna, mpe yandi vwandaka sala jambon mpe bima, mpe vwandaka nata yawu kuna. Beto ke kuzwa faline, mpe ke baka mafuta yango mpe nyonso yina mpe ke sala dimpa ya beto ya masangu. Mpe beto vwandaka bamputu na yina me tala kudya, kuyituka ve ti beto vwandaka na kudya ya kulunga ve mpe nionso yina, bampasi. Kasi mama na ntangu yina, konso Kilumbu ya sambanu na nkokila... Beto—beto kuzwaka ve mutindu ya mbote ya madia, na yina yandi zolaka sala beto nyonso kubaka mafuta ya ricin. Mpe mu—mu ke simba kaka mbombo ya munu mpe kuboka, mu tubaka, “Mama, yina ke sala munu kubela mingi.” Yandi tubaka, “Kana ya ke sala nge kimbevo ve, ya ke sala nge mbote ve.” Na yawu, na yawu mu banza ti ya ke sala mutindu yayi. Ntangu yayi wapi mutindu... .

188 Mu ke yufula beno kima mosi. Wapi mutindu bakala to kento yina ke tubaka ti yandi kele ya kufuluka na Mpeve-Santu, yina kele Ndinga (ya kieleka?), mpe wapi mutindu beno lenda vwanda nsuni ya Mpeve-Santu yina, me sala beno kitini ya Yandi, samu na kulakisa Nsangu ya mbote ya nsungi ya beno, mpe kumanga Ndinga yina Yandi sonikaka?

189 Mu ke kipe ve mutindu mbote beno kele. Na yina, mu lenda nata beno na Afrika, na ba-Hottentot kuna, mpe kulakisa beno luzingu yina Muklisto lenda simba ve. Ata ti ba ke simba bawu na pité; kana mosi ya bakento, ntete yandi kwelana, ntwenya ya kento, ba fwana teza yandi ntete samu na bumwense ya yandi. Kana yandi zabaka dyambu, yandi fwana tuba yinki bakala salaka yawu, mpe ba me kufwa bawu zole kintwadi. Yinki ke salama kana ya salamaka na Etats-Unis, nani ke zika bimfumu nionso, beno me mona? Na yina, na yina beno bawu yayi, beno me mona. Mpe bawu kele mimpani, beno me mona bumuntu. Beno me mona, na yina beno lenda ve kumeka yawu na nzila ya yawu. Mpangi ya beto ya Indien awa lenda tuba na beno ntangu yayi, ba-Musulman lenda zinga luzingu ya kulutila kitoko na yina beto ke banzaka ntete.

190 Kasi yinki ya kele? Ya kele Ndinga yina ke pesaka kumekama. Ba-Pharisien yango vwandaka mbala zole ya kukikulumusa mutindu Yesu. Yandi vwandaka kwenda bisika nionso samu na kupanza mabuundu ya bawu, mpe vwandaka losa bawu na ngaanda, mpe vwandaka bula bawu fimbu, mpe bima nionso ya mutindu yina.

191 Mpe kiboba ya nganga-Nzambi yayi ya santu, beno zaba, na yina, nani vwandaka. . . Kana mu vwandaka na lukutakanu mosi samu na kutelemina Yandi, na suka yayi; Mu ke tuba, nani kwisaka na beno ntangu beno vwandaka mbevo, sambilaka samu na beno? “Nganga-Nzambi yina ya kiboba ya santu.” Nani pesaka papa mbongo yina ntangu bambuma ya yandi kubwaka? “Kiboba ya nganga-Nzambi yina ya santu.” Nani biekaka nge na Nzambi, samu na luzingu ya kisalu? “Kiboba ya nganga-Nzambi yina ya santu.” Nani ya vwandaka, ntangu beno vwandaka na boloko, kwisa kutala beno? “Nganga-Nzambi yina ya kiboba ya santu.” Mpe kimpumbulu yayi ya ntwenia bokilaka Yesu, yinki Yandi salaka? Ba ke bokilaka pasteur ya beno “nyoka”! Beno me mona? Beno me mona, ya kele ve na nzila ya bambuma.

192 Ya kele na nzila ya Ndinga. “Muntu ke zinga kaka na mbuma ve, kasi na konso Ndinga yina ke basika na yinwa ya Nzambi.”

193 Mpe Yandi vwandaka Ndinga yango. Bawu kondwaka kaka na kumona Yawu. Ya kele yina Yandi zolaka sala. Ba lendaka ve kumona yawu, samu ba tumaka bawu ve na kumona yawu. Yandi tubaka, “Nge lenda kwisa ve na Munu.” Beno tala ba-Juif yayi ya mputu, meso ya bawu vwandaka ya kufwa. Kieleka, Yandi salaka yawu. Yandi kufwaka meso ya bawu, Yandi mosi.

194 Beno banza na mutindu ya zolaka vwanda ya kufwa meso. Beno fwana vutula matondo na Nzambi samu na yina beno kele na yawu na Masonuku. Ntangu yayi beno tala.

195 Ntangu yayi, Yandi, Yandi vwandaka Ndinga yayi. Ntangu yayi, na manima ya yayi, ba mekaka Yandi. Kumekama ya Yesu. Ntangu yayi beto ke tubila yawu.

196 Beno me mona, ya ke lakisa ve Ndinga ntangu muntu nyonso ke tuba, “Mbote, Ya vwandaka samu na nsungi yankaka,” samu ti Biblia ke tuba ti Yandi kele mutindu mosi mazono, bubu yayi, mpe kukonda nsuka. Wapi mutindu Mpeve-Santu na kati ya beno lendaka tuba ti beno kele ya kufuluka na Mpeve-Santu?

197 Ntangu yayi mu lenda niongisa beno fioti? [Dibuundu me tuba, “Amen.”—Mu.] Ya ke mbote mingi? Beno telemisa maboko ya beno. Nge ke vwanda ve kilawu na munu? [“Ve.”] Kana nge sala yawu, nge fwana vwanda.

198 Wapi mutindu beno lenda bakento, na bansuki ya kuzenga, beno tuba na munu ti beno me fuluka na Mpeve-Santu? Ndinga mosi! “Oh, mu zonzaka na bandinga.” Yina ke sala ata luswaswanu ve. Mu me monaka bandoki ya bakento kuzonza na bandinga, kutendula, kuboka na kimpeve, kubina na kimpeve.

199 Wapi mutindu beno bakala lendaka kukibokila mfumu ya yinzo, mpe beno ke bika kento ya beno kulwata bakupe mpe kusala mutindu yandi kele, beno kukibokila beno mosi Miklisto?

200 Wapi mutindu beno ba-pasteur lenda kutana na Nzambi na kima ya mutindu yina, kukondwa kutelama mpe kutelemina yawu? Beno lenda ve kusala bawu kusala yawu. Kasi beno ke longa mutindu yina, beno ke vwanda ve na seminere na ntangu ya yinda to na kimvuka mosi. Beno fwana kuzwa ngwisani kisika yankaka. Beto ke kota na yawu, kaka na mwa ntangu fyoti, kana Mfumu zola. Beno me mona?

201 Kasi beno bawu yayi. Ve, mu zola kunyongisa beno ve. Mu zola beno. Ya kele samu na yina. Kana—kana beno vwandaka mwangisa nzadi, mpe mu monaka ti beno ke dinda na masa, mu ke vwanda muntu ya mawa, tuba, “Mbote, vwanda muntu ya mbote, cherie.” Beno ke sala mbote na kukebisa bawu. Ya kele kieleka. Beno tuba na bawu!

202 Mutindu mu tubaka nkokila yankaka yina, kana mu kele Muklisto, mu fwana kukitalisa na konso muntu ya Biblia. Mu zolaka telama na Noé mpe kulonga na yandi, na kati ya bilumbu, mpe kukebisa bantu. Ya kele kieleka. Mu zolaka telama na zulu ya Mongo Carmel, munu mosi, na Elie. Mu zolaka telama na Calvaire, mpe kuvwanda ya kukoma na kulunsi munu mosi mpe mabanza ya munu mosi, na Yandi. Kasi na yina diaka, mu telemaka na Yandi na Paki, na lunungu na zulu ya bima nionso. Nsuni nyonso ya nsuni ya yinza, vumbukaka na zulu ya yawu, na kati ya Yandi.

203 Beno tala, ya ke lakisa ve Ndinga kuna, ve, ya ke siamisa Yawu ve. Ntangu yayi, kasi kana beno ke kwikila Ndinga, Nzambi ke siamisa Yawu, Yandi mosi, mutindu Yandi salaka awa na Yesu.

204 Mpova Dimpa zola kutuba ntangu nionso kudisama na. “Mpe muntu ke zinga ve na dimpa, mutindu dimpa yayi, kaka, kasi na konso Ndinga.” Na yina ya kele Ndinga Dimpa, beno bumba yawu na mabanza, yayi kele Dimpa yayi yina dibuundu na nzila ya bansungi nionso me kudya, me vwanda Mana yina ba bumbaka kaka samu na kinungi kaka. Apocalypse me tuba mutindu yina. Ntangu yayi mu ke na ntangu ve ya kutendula kima yayi nionso, samu mu zola baka minuti makumi tatu yankaka. Kasi, beno tala, ntangu—ntangu mani ya santu kubwaka na Mazulu, yina vwandaka kifwanusu ya Mpeve-Santu. Beno ke wisana na yawu.

205 Nzambi tubaka na Moise na kukwenda kuna mpe kubaka omer mosi ya kifuluka na yawu, mpe kutula yawu na kisika ya kulutula Santu ya basantu. Samu ti, kana ba tulaka yawu ve na kisika ya kulutula Santu ya basantu, ya me kuma yina ke ninganaka ve. Ya kele kieleka? Misobi me kota na yawu. Ntangu yayi Yandi tubaka, “Kasi tula yawu na kisika ya kulutula Santu ya basantu, na kati ya omer yayi, ti konso nsungi;” ke kwisa, na manima ya kinganga-nzambi yina, ntangu muntu ke kuma nganga-nzambi, samu na kulonga Ndinga, kima ya ntete yandi ke sala, na manima ba me tuma yandi, yandi ke kota mpe ke kuzwa ndambu ya mani yina ya kisina mpe kudya yawu.

206 Yina zolaka talisa Nsemo yina na diboko ya Yandi, na nsungi ya dibuundu ya malu-malu, na kulakisaka Nsemo ya Yandi, Mana; mpe kaka muntu yina nungaka na mutindu ya kulunga, muntu yina ke vwanda kieleka mpe ke tula bima nionso yankaka na lweka ya Ndinga. Mpe Ndinga kele Mana yina. Oh, la la, ya kele Yesu! “Muntu ke zinga na konso Ndinga yina me basika na yinwa ya Nzambi.” Ya kele Mani ya kubumbama samu na kinungi, oh, yina ba tulaka mosi na mosi—mosi na mosi, samu na konso kinganga-Nzambi yina vwandaka landa yawu.

207 Balukolo ya théologie, ntama mingi ve, me sobisa Kima yayi ya kusakumuka samu na dilonga ya ndunda. Ya kele nyonso kieleka. Yinga, tata.

208 Mutindu Ésaü salaka. Ntangu yayi, Ésaü, na bumuntu, vwandaka muntu ya kulutula mbote na Jacob, kasi yandi vwandaka ve na buzitu na bukuluntu ya yandi yina vwandaka Ndinga. Bantu yikwa zaba yawu, bukuluntu vwandaka Ndinga, nsilulu, mwana ya kuluntu? Kasi yandi vwandaka muntu ya mbote, muntu ya nkadulu, mutindu, oh, mutindu Muklisto ya nkumbu bubu yayi, muntu ya mbote. Yandi vunaka ve. Yandi yibaka ve. Yandi vwandaka mbote samu na papa ya yandi. Yandi salaka bima yayi nionso. Kasi, beno me mona, bukuluntu ya

yandi, yandi tubaka ti yandi talaka yawu ve. “Wapi luswaswanu ya ke sala? Mu kele Israélite, na mutindu nionso. Beno me mona, mu—mu kele ya yawu, na mutindu nionso.” Kasi ya vwandaka bukuluntu ya yandi yina ba me tanga, beno me mona. Nkadulu ya yandi ya kimuntu vwandaka mbote mingi, kasi kimpeve ya yandi vwandaka nionso ya luvunu.

209 Mutindu mosi ya kele bubu yayi, mbungu, kuvukisa dibuundu mpe yinza kintwadi, mosi na mosi; bafeti ya bingo, makinu, bansululu ya mutindu nionso, na kati ya dibuundu; bakento na bansuki ya kuzenga, ba ke na kulwataka bakupe.

Mbote, beno ke tuba, “Mpangi Branham, yinki kele mwa kima yina?”

210 Ya kele mosi ya Bandinga, samu ti Biblia ke tuba ti ya kele yimbi samu na kento na kuzenga nsuki ya yandi. Ya kele kieleka. Kana yandi sala yawu, wapi mutindu yandi ke kota? Beno me mona? Beno yufula kaka, mulongi nyonso ke tuba na beno Ndinga me tuba yawu. Beno me mona, “yandi ke zitisaka ve yintu ya yandi,” yandi ke kondwaka buzitu na bakala ya yandi. Yandi fwana kufwa makwela. Ya kele nyonso kieleka. “Samu ti yandi yina ke zenga nsuki ya yandi, ke bika yandi mpe ke katula yandi, ke zenga ndefi.” Beno me mona, ya ke lakisa yawu. Ya kele kaka ve ya kuzenga, Nzambi zola yawu mutindu yina ve. Ya kele Tata Na kati-kati. Beno sakana na yawu ve. To beno zenga yawu nyonso to beno bika yawu kukula, ya kele yina Nzambi tubaka. Mulongi nyonso ya Nsangu ya mbote zaba ti ya kele Kieleka, kana beno ke tuba yawu to ve. Kasi ya kele Kieleka. Beno me mona? Mbote, wapi mbote, kana beno ke sala bawu nyonso yankaka, mpe beno bika yawu kukwenda?

211 Yinki? Ya kele kaka na mwa kitini ya yinza na kati ya beno, ke meka na kusala kaka mwa fyoti mutindu mabuundu yankaka. Ya kele nyonso kieleka kisika Israël kotaka na mpasi. Ya kele kisika yina bawu ke kufwa. Ya kele kisika yina Adam kotaka na mpasi. Ya kele kisika bawu nyonso yankaka kotaka na kati ya mpasi. Kaka Ndinga mosi, yawu yina kaka ya ke lomba, kaka dibanza mosi. Nzungu, ya kuvukana na yinza! Bayankaka ya yinza, bayankaka ya Hollywood, bayankaka ya dibuundu, bayankaka ya ba-théologien, mpe yinki kele na beno?

212 Beno tala, kana Satana kubwa awa, na yina yandi ke meka nzila ya yandi ya zole samu na kunata beno na ku—kukondwa kukwikila Ndinga, yandi ke . . . mpe—mpe ke kwenda na seminere. Yandi ke meka yankaka, mutindu ya kusala. Ntangu yayi awa kele kisika beno zola sala keba mingi, mpe beno vwanda kaka baminuti tanu yankaka na lweka yayi, kana beno zola. Na yina yandi ke sala beno kupesa ya mazulu. Mu ke vutuka na nyonso yayi, kaka ntete beto sukisa. Yandi ke salaka . . . Beno me mona, kana yandi lenda ve kumeka beno ntama na Ndinga,

“Ve, mu ke kangama na Ndinga,” na yina yandi ke pesa nge dikabu ya kimpeve.

213 Yandi tubaka, “Mu ke tuba na beno yinki. Nge ke telama awa mpe ke panza tempelo, mpe kuvutula yawu. Beno me mona, beno lakisa bantu ti Nge lenda sala kima ya kimpeve.”

214 Bakala, yandi kuzwaka bawu kuna. Ntangu yayi beno tala mbote yayi, yayi kele yawu. Beno tala mbote ntangu beno ke kuma na nsuka, kisika mpukumunu yayi ke kwiza. Mu banza ti yandi lendaka bika bayankaka ya beno kuzonza na bandinga, kubanza ti beno kele na Yawu. Beno me mona? To yandi lendaka pesa beno profesi, ata ti ya kele ve na Ndinga. Mu me monaka bantu kutelama mpe kupesa profesi, ya vwandaka mutindu yankaka na Ndinga mutindu Esete kele na Wesete. Beno me mona? Ya kele Ndinga yina beno ke zingaka. Makabu yango ya kulutula kimpeve, Satana lenda kaka kupesa bawu diboko na nzila ya diboko. Kieleka. Yina zola kutuba kima mosi ve.

215 Yesu tubaka ve, “Mingi ke kwiza na Munu na kilumbu yina, mpe ke tuba, ‘Mfumu, mu pesaka profesi ve na Nkumbu ya Nge? Na Nkumbu ya Nge mu basisaka bampeve ya yimbi. Mu salaka bisalu ya ngolo. Mu vwandaka muntu ya nene na kati ya organisation. Mu me sala bima yayi nionso, bima yayi’? Yandi ke tuba, “Kwenda ntama na Munu, nge yina ke salaka disumu ya nkú.”

216 Yinki kele disumu ya nkú? Ya kele kima yina beno zaba ti ya kele kieleka, mpe beno lenda yawu mpe ve kusala yawu, na kati ya ntima ya beno. Ntangu beno zaba ti Biblia ke longaka kima mosi, mpe beno ke sala yawu ve, ya kele disumu ya nkú. Mpe David tubaka, “Kana mu bumbama disumu ya nkú na kati ya ntima ya munu, Nzambi ke kuwa ve kisambu ya munu.” Ya kele Kieleka? Ya kele Biblia? [Dibuundu me tuba, “Amen.”—Mu.] Ntangu yayi, ya kieleka beno lendaka ve kudasuka na Yawu, beno me mona. Yesu tubaka ti, “Mingi ke kwiza na Munu na kilumbu yina, mpe ke tuba, ‘Mu me sala bima yayi nionso,’ mpe mu ke tuba, ‘Beni kwenda, beno bisadi ya masumu ya nkú.’”

217 Mutindu mosi Adam, Adam tubaka, “Mfumu, mu salaka *yayi*, mu salaka *yina*.” Kasi Ndinga mosi, beno me mona, Ndinga mosi salaka yawu, yawu yina kaka ya ke lombaka, kaka kutumama ve na Ndinga mosi.

218 Yinga, ya lendaka vwanda pesa profesi ya kuswaswana na Ndinga. Kasi ntangu yayi, ntangu yandi kele na dikabu yayi ya kulutula kimpeve, yandi kele mingi na nzila ya makelele, na nzila ya kungenga ya yawu. “Nkembo na Nzambi, mu ke sambila samu na *Yayi-mpe-yayi*, bawu me telama mpe me kwenda! Alleluia, mu lenda zonza na bandinga! Mpe muntu mosi ke tendula yawu, ya kele kieleka, kieleka.”

219 Paul tubaka, “Mu lenda zonza na ndinga mutindu bantu mpe Bawanzio, mpe dyaka kuvwanda kima ve. Mu lenda vwanda na

lukwikilu ya kukatula myongo, mpe dyaka kele kima ve.” Ya kele kieleka? [Dibuundu me tuba, “Ya kele kieleka.”—Mu.]

²²⁰ Kasi, beno me mona, yandi ke pesa beno yawu. Oh, bantu ya Pantekote, mu zola beno, to mu ke vwanda ve na beno. Ya kele kisika beno kubwaka, beno me mona. Beno tala mbote Ndinga, dikabu ve. Beno tala mbote mupesi, beno me mona kisika—kumona kisika yawu me katuka, beno me mona. Yandi me kwenda ntama, yandi ke na kubina na kimpeve, mwana. . . [Kisika ya mpamba na bande—Mu.] . . kima kaka mosi. Yandi kele na bantu mingi pene-pene ya yandi, mpe bantu nionso ke bokila yandi, awa mpe kuna, mpe yandi me zimbana Ndinga.

²²¹ Oh, beno me zabana mingi ntangu nyonso yina beno ke bikana ntama na Ndinga yina. Kasi beno kota na kati ya Ndinga yina, kilumbu mosi, beno tala mbote nani ke vwanda na ngwisani na beno kuna. Beno me mona? Beno tala mbote yina ke salama kuna. Beto ke kuma na yayi, na kitezo yankaka ya yinza, na mwa ntangu fyoti. Beno me mona, beno tala mbote nani—nani zola beno kuna, muntu ve ke salaka. “Oh, maboko na Yawu!” Mutindu mwa kimvuka mosi vukanaka kintwadi awa mwa basabala fioti me luta mpe kangaka munu, konso mulongi yina ke kwisa na mbanza, ya Nsangu ya mbote ya muvimba, yina fwana nata munu na mbanza samu na kusambila samu na bambevo ya bawu, ba tulaka yandi kimakulu na ngaanda ya kimvuka. Mbote mingi, samu mu ke sambila samu na bambevo. Mbote mingi. “Beni kuwa Yawu ve,” beno tuba. Mpe ya kele na Ndinga yina me siamisama.

²²² Ya kele kima mutindu mosi bawu salaka na Mfumu ya beto. Ya kele kima mutindu mosi bawu salaka na konso muntu, na kati ya konso nsungi. Ya kele yina bawu salaka na Luther, Wesley, mpe nyonso. Yawu yina bawu salaka na beno, na mbandukulu, ntangu yayi beno ke vutuka kaka na kati ya poto-poto yina beno basikaka. Beno tala mutindu, ya ke vwandaka ntangu nyonso mutindu mosi. Ata mbala mosi ve ti ya me kondwaka, Satana ke salaka kima mutindu mosi.

²²³ Ntangu yayi yandi me natama na nzila ya makelele ya kitoko, mpe nionso yina, tii, oh, yandi ke kipe Ndinga ve. “Oh, mpangi, Mpangi *Kingandi* tubaka *yayi-mpe-yayi*, mpe mu fwana kwenda awa. Mu. . .” Beno me mona, yandi kele kaka ya kunatama, yandi ke talaka Yawu ve. Kana ya kele Ndinga to Ndinga ve, ya ke sala luswaswanu mosi ve. “Bayankaka ya bawu tubaka ti ya vwandaka nyonso ya kulunga, na yawu Yina ke sala ata luswaswanu ve.” Denomination ke tuba, “Bakala, nge me kuzwa yawu, kubika muntu ve kutuba na nge!” Beno me kuzwa yinki? Beno me mona? Beno tala.

²²⁴ Satana vwandaka na yawu, ata mpe na yina, beno tala mbote na kisika yayi awa, yandi fikaka Ndinga. Ata mpe na zulu ya kulutula kimpeve yayi yina yandi mekaka na kunata Yesu na

kusala, kulutila kimpeve, beno me mona, na kuvwandaka na kulutila kimpeve, yinki kana Yesu zolaka kuwa yandi? Beno me mona? Yandi tubaka, “Ntangu yayi beno vingila. Beno zola kubikana na Ndinga, beno sala yawu? Beno zola kubikana na Ndinga?” Yandi tubaka, “Ya kele ya kusonika, Yandi ke pesa lutumu ya Bawanzio ya Yandi samu na yayi. Konso ntangu yina Nge ke diata dikulu ya Nge na zulu ya ditadi mosi, Ba ke nata Nge na zulu.” Kasi Yandi vwandaka ve kusukula makulu ya Yandi na zulu ya ditadi mosi ve. Beno me mona? Beno tala mbote. Yinki kana yandi zolaka bikana na yawu? Yandi . . . Beno talaka, mu tubaka ata mbala mosi ve ti yandi tangaka Ndinga; yandi fikaka Yawu, fikaka Yawu, mutindu ba ke tulaka galasi na zulu ya keki, yandi fikaka Yawu, semisaka Yawu, beno me mona, Yawu vwandaka ve na kisika ya Yawu ya kieleka.

²²⁵ Yawu yina ba ke meka na kutuba bubu yayi, ba ke na kumeka na kusemisa Yawu, kasi beno lenda ve kusala yawu kutambula na Masonuku yankaka. Ya fwana vwanda nyonso, “Yesu Klisto mutindu mosi mazono, bubu yayi, mpe kukonda nsuka.” Beno me mona, ata mutindu Ndinga beno ke meka na kufika, yina ke sala ve . . .

²²⁶ Ba fwana tanga yawu kaka mutindu Yandi tubaka Yawu. Kuna, kana ba me tanga Yawu mbote, Yandi ke siamisa ti Yawu kele kieleka na kati ya luzingu ya beno. “Ya kele mutindu bantu nyonso zaba ti beno kele mikanda yina me sonama yina ba me tanga na Nzambi.” *Mukanda* ya kusonama kele “Biblia.” Ya kele kieleka? Mukanda kele Biblia. Mpe beno kele Biblia ya kusonama yina ke lakisa Ndinga ya Yandi, muntu yina ya kulunga dyaka, na Nzambi.

Kasi Yesu tubaka, “Ya kele ya kusonama, mpe.” Beno me mona?

²²⁷ Kasi beno tala Eve na kitezo mosi yayi, yina kwendaka ntama na lubakusu ya yandi ya kulutila kimpeve, yandi vwandaka na nzingulu ya théologie. Ndongosolo ya yandi vwandaka nene mingi na théologien nyonso na kizunga na ntangu yina. Beno me mona, ba nataka yandi ntama, yandi zabaka yawu ve. Yandi zabaka ti yandi vwandaka na kima mosi yina Adam vwandaka na yawu ata fioti ve. Ya lendaka vwanda ti yandi lendaka yala na zulu ya yandi malu-malu yayi, samu ti yandi zabaka mingi samu na yawu, Adam ya yandi. Beno tala mbote yina Adam ya bawu ke na kusalaka bubu yayi. Yandi zabaka mbote na yimbi, ndongosolo ya mbote ya Kieleka. Ya kele kieleka. Yandi vwandaka na ndongosolo ya mbote ya Kieleka, yina yandi zabaka ve na ntawala, mpe ya vwandaka Kieleka ya Nzambi. Kasi yandi vwandaka ya kufwa, na nzila ya kubukaka Ndinga. Yinga, yandi kuzwaka ndongosolo ya yandi, mbote mingi.

²²⁸ Mutindu mosi seminere me pesa beno nzingulu ya théologie,

ti beno lenda tanga konso muntu ya Ngwisani ya Ntama to ya Malu-malu. Kasi beno sala keba na yina beno ke na kusalaka, kana ya ke buka ve Ndinga yina kaka kuna, kana beno tuba kaka, “Mbote, ya kele samu na bawu.” Ve, ya kele samu na beno, muntu nyonso yina zola! Beno me mona? Beno me mona? Beno sala keba. “Oh, ya vwandaka samu na dibuundu ntama mingi ve.” Yandi kele mutindu mosi mazono, bubu yayi, mpe kukonda nsuka! Yandi vwandaka na ndongosolo ya mbote, kasi yandi vwandaka mpe ya kufwa na disumu mpe bayimbi.

²²⁹ Ntangu yayi nzila ya tatu ya Satana. Beto ke kuma na yawu na nswalu mpamba ve ti beto zola ve kubaka ntangu ya kulutila, mu banza baminuti kumi na tanu yankaka, baminuti makumi zole, kana beno zola kukwenda ntama. Beno tala nzila ya yandi ya tatu kuna, ya yandi, to kumekama ya yandi ya tatu. Kana bayankaka kondwaka, yayi zolaka ve, beno me mona. Yandi ntangu yayi ke katula beno kisika na dibuundu, mutindu yandi salaka na Yesu. “Mu ke pesa Nge yinza. Nge kele ntinu, Mu ke sala Nge. Bawu nionso kele ya munu, na yina mu ke pesa yawu na Nge.”

²³⁰ Nani lenda sala muntu mulongi? Nani lenda pesa muntu dikabu na nzila ya kutentika maboko na zulu ya yandi? “Nzambi me vwanda na kati ya dibuundu!” Beno me mona? Beno me mona mutindu bawu ke tambulaka na Ndinga. Mutindu Eve ntangu yayi, na kuzabaka ya yandi ya malu-malu, luzabu, yandi vwandaka na Adam na nzila ya yandi. Yandi zolaka sala yina yandi zolaka, beno me mona, kaka na ntangu yandi kuzwaka Adam samu na kundima yawu.

²³¹ Mpe, kasi ntangu yandi kwisaka na Yesu, Yandi ndimaka yawu ve. Yandi tubaka, “Kwenda na manima ya munu, Satana.” Na nzonzolo yankaka, bika mu pesa yawu yimbi ve, kasi kubwela kaka yayi na yawu. “Ya kele ya kusonama, muntu nyonso ke zinga na nzila ya konso Ndinga ya Nzambi; ve na nzila ya dibanza ya beno, ‘Mu ke sala nge surveillant général, nganganzambi, to—to diacre, to mu ke bika nge bula piano, mpangikento.’ Beno me mona, bansasa nyonso yayi, ‘Nge kele muntu ya kuzabana mingi, mpe beto kele na nsatu ya talanta ya beno na dibuundu ya beto.’” Beno me mona, beno kwisa na Ndinga!

²³² Yandi zolaka yala yandi, to kulonga yandi, mutindu mosi bubu yayi kele kuyonzika. Ya kele mutindu bawu ke salaka yawu bubu yayi, samu na kukuma Docteur na Théologie, nganganzambi ya leta, surveillant Général, mfumu ya kizunga, to kima yankaka mutindu yina.

²³³ Wapi mutindu luswaswanu na Yesu! Yandi bikanaka na Ndinga. Ntangu yayi, baminuti fyoti ke landa, mu zola kulakisa bima nyonso yayi kieleka, beno me mona, na nzila ya bima zole mpe Ndinga, kuvukisa yayi. Yayi ke siamisa ti Yandi vwandaka Ndinga yina kumaka nsuni, samu na Dimpa. Yandi vwandaka

Ndinga yina kumaka nsuni. Samu ti Yandi talisaka yinki? Ndinga kaka.

²³⁴ Kana beno kele mukanda ya kusonama, beno ke lakisa kaka Ndinga; ve yina seminere ke tuba, yina muntu yankaka ke tuba, yina Mademoiselle Jones ke banza samu na Yawu, yina Docteur *Kingandi* ke banza samu na Yawu, kasi yina Nzambi tubaka samu na Yawu. “Bika ti konso ndinga ya muntu kuvwanda luvunu, mpe ya Munu kuvwanda Kieleka! Muntu nyonso yina ke buka misiku yayi, mpe ke longa bantu mingi! Muntu nyonso yina ke katula Ndinga mosi ya Buku yayi, to ke bwela ndinga mosi na Yawu! Muntu ke zinga kaka na dimpa ve, kasi na konso Ndinga ke basika na yinwa ya Nzambi.” Beno zinga ya Seko na nzila ya Ndinga yina!

²³⁵ Kaka mutindu beno fwana kuzwa kima ya kufwa kuna samu na kuzinga, beno fwana kuzwa Klisto samu na kuzinga awa to beno kufwa. Mpe yinki kele Klisto? “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni zingaka na kati-kati ya beto.”

²³⁶ Mpe beno kele mukanda mosi yina ba sonikaka, mosi samu na nsungi mosi mpe mosi samu na yankaka, samu na Nsemo ya ngunga yina; kasi bawu lembanaka na kumona yawu. Beno ke lakisa Yawu kaka.

²³⁷ Bayankaka yidikaka, ata ti na kati ya mosi, kondwaka kaka na kisika mosi; kasi Yandi salaka yawu ve. Mpe mutindu mu tubaka, na Apocalypse 22:18, Yandi tubaka, “Muntu nyonso yina ke bwela na Yayi!”

²³⁸ Ntangu yayi beno tala mbote-mbote ntangu yayi. Matthieu 24:24 kele kubula, mutindu ti bawu. . . “Na kutala, na bilumbu yayi ya nsuka,” Yesu tubaka, “musolami ya kieleka ke vunama na nzila ya kima yayi.” Beno tala mbote bampeve. “Na bilumbu ya nsuka,” ntangu yayi Masonuku yina fwana salama. Beno ke kwikila yawu? [Dibuundu me tuba, “Amen.”—Mu.] Ntangu yayi, yina vwandaka, “Na bilumbu ya nsuka, bantu ya kieleka ya kusolama, ya kusoola na ntwala, ya kusolama na yawu, ke vunama. . .” Ya kele kieleka ya kulunga, ya kele mingi Masonuku, mpe ke talana kitoko mingi mpe pwelele, ti beno lenda ve kumona kifu na kati ya yawu, na mutindu nionso, kaka bantu ya kusolama ke tina yawu. Ntangu yayi ya kele yina Yesu tubaka. Beno ke kwikila yawu? [“Amen.”] “Ke vuna bantu ya kieleka ya kusolama kana ya lendaka salama.”

²³⁹ “Kasi, ya kele Masonuku ya kulunga, beno lenda mona yawu na meso ya kimuntu.” Kasi, beno me mona, ya kele yawu ve. Yesu. . . Ba-Pharisien yina vwandaka na Masonuku yina kaka ya kulunga mutindu Yawu lendaka vwanza, kasi na nzila ya ntendulu ya bawu mosi.

240 Wapi mutindu bawu zabaka ti Yandi vwandaka ve na yimbi? Samu Nzambi siamisaka konso Ndinga yina Yandi silaka na Yandi na nsungi yina. Ya kele samu na yina bawu zabaka ti Yandi vwandaka Mesiya. Beno me mona?

241 Ntangu yayi beno tala, “kana ya lendaka salama,” na bilumbu yayi. Kaka Ndinga mosi, Ndinga mosi kele na nsatu. Ya kele nyonso yina Satana zolaka kuzwa na Adam, kuzwa kaka Yandi na zulu ya Ndinga mosi. Ya kele nyonso yina yandi fwana kuzwa bubu yayi, kuzwa kaka kima mosi kubaluka. Kaka yina, ya kele nyonso yina yandi kele na yawu nsatu. Ntangu yayi, beno zaba ti ya kele Kieleka. Kubwela mosi, to kukatula mosi, ya kele nyonso ya kubwa. Konso kitini, “Konso Ndinga ya Nzambi!” Beno banza ntangu yayi balutendulu ya baseminere, mosi na mosi yankaka ya luswaswanu.

242 Ya fwana vwanda na Kieleka kisika mosi, mpe *yayi* kele Yawu, Biblia. Ntangu yayi Yesu tubaka. . .

243 Beno ke tuba, “Mbote, Mpangi Branham, bawu kele na bisambu ya kulutila kitoko.”

244 Yesu tubaka, “Na mpamba bawu ke sambilaka Munu, na kulongaka malongi ya muntu, Ndinga ve,” muntu, dibanza ya yandi mosi ya Ndinga yina ba tendulaka.

245 Mutindu mu tubaka, Nzambi ke na nsatu ya mutendudi ve. Yandi ke tendulaka Ndinga nionso Yandi mosi. Beno me mona, beno ke na nsatu ya muntu ve samu na kutendula Yawu na beno, Nzambi ke tendulaka yawu na beno ntangu beno ke zola kundima Yawu. Beno me mona, ya kele Luzingu, ya kele Luzingu Yawu mosi.

246 Yesu tubaka, “Na mpamba bawu ke sambilaka Munu.” Kieleka bawu ke sambilaka Nzambi. Caïn sambilaka Nzambi, na mbandukulu. “Kasi na mpamba ba ke sambilaka Munu.” Yinki kele *mpamba*? “Ya ke sala ata mbote ve.”

247 Ba lendaka tuba, “Mbote, mu ke sala yayi. Mu ke kina na mpeve. Mu, mu ke zonzaka na bandinga. Mu, mu ke pesaka profesi. Mu ke longaka Nsangu ya mbote.” Kasi beno kondwa na kubika nsuki ya beno kukula, kubwa na kima mosi, mpe kumona yinki ke salama, Mpeve ke bika beno kaka kuna. Ya kele yina salamaka na mabuundu ya beto, yina kubwaka.

248 “Na mpamba, ke sambila Munu. Oh, ya kele kisambu ya kitoko. Kasi na mpamba ba ke sambilaka Munu, ba ke longaka samu na malongi misiku ya muntu.”

249 Ba-Pharisien yango longokaka ba-théologien. Beno meka ve na kutuba ti beto kele na kima mosi bubu yayi samu na kufwanikisa na bawu. Ve, ata fioti ve. Ba zabaka mpova mosi, ndinga nionso, kaka mutindu ba sonikaka yawu, kasi na mpamba ba vwandaka sambila. Beno banza na yawu, “na mpamba,” balukolo ya nene ya mbote, mpe baseminere, mpe

milongisi, mpe ntwenya ya bakala, mpe nyonso mutindu yina, kasi ya kuzimbana!

²⁵⁰ Mutindu mosi na ntoto ya kuyuma, Yandi tubaka, “Bawu nionso kudiaka mana yina ya Ditadi yina ya kimpeve na ntoto ya kuyuma, bawu nionso kunwaka na Ditadi yina, mu zola tuba, mpe bawu nionso kudiaka mana na yawu.” Mpe Yesu tubaka, “Mpe bawu kele, bawu nionso, ya kufwa.” *Lufwa* zola kutuba “ya kukabuka ya Seko.” Samu na yinki? Samu ti bawu kondwaka na kukwikila nsilulu ya Nzambi.

²⁵¹ Oh, mu ke zolaka ve kubumba beno mutindu yayi, kasi mu fwana kaka kutuba yawu. Beno tala, mu ke baka ve muniti mosi na zulu ya yayi. Mosi na mosi ya bantu yango kubasikaka na yisi ya Dikunzi ya Tiya, bawu basikaka na ntoto ya kuyuma, Nzambi yina vwandaka kwikila, kotaka. Kasi ntangu bawu kumaka na kumona kikaku, ntangu—ntangu kumi vutukaka mpe tubaka, “Beto lenda ve kubaka yinsi. Oh, la la, bawu kele bilombe kuna. Bawu kele *yayi, yina*, mpe *yankaka*. Bawu kaka. . . Beto lenda sala yawu ve. Ya lenda salama ve.”

²⁵² Kasi yinki Caleb mpe Josué? Ba kangaka kaka bantu. Ba tubaka, “Beto kele na kiyeka ya kulutila na kubaka yawu.” Samu na yinki? Bantu yina vwandaka tala yina bawu lendaka mona, beno me mona, ba vwandaka tala yina ba lendaka mona. Kasi Caleb mpe Josué vwandaka tala nsilulu ya Nzambi. Nzambi tubaka, “Mu me pesa nge yinsi yina. Kwenda baka yawu!”

²⁵³ Ntangu yayi ba-Hebreux kapu 6, kana mu lendaka tanga yawu, “Samu ti ya lenda vwanda ve samu na bayina vwandaka mbala mosi ya kutemuka, mpe me meka Mpeve-Santu, ngolo ya yinza ke kwisa, kana bawu kubwa diaka, bawu manga, bawu kwenda.”

²⁵⁴ Mutindu bantu yango kwizaka kuna mpe kudyaka bambuma ya vinu na yinsi yankaka, telamaka kuna; mpe ntangu ya kumaka na kulandaka Ndinga, nzila nyonso, bawu tubaka, “Beto lenda sala yawu ve.” Mpe bawu kufwaka na ntoto ya kuyuma.

²⁵⁵ Ya kele kisika yina beto kuzwaka. Beto mekaka Ndinga ya mbote ya Nzambi. Kasi, nsilulu ya muvimba, “Ve, ve, beto lenda sala yawu ve, beno me mona, samu ti Mulongisi *Kingandi* to muntu yankaka ke tuba ti beto lenda sala yawu ve. Ya kele samu na bantumwa. Ya vwandaka kilumbu yankaka.” Kuna beno ke kufwa.

²⁵⁶ Beno me mona, Masonuku nionso ke vukana, konso Ndinga ya Yawu ke vukana kintwadi. Mpe ba lenda pesa yawu ve na nzila ya malongi mosi me salama na muntu, sysiteme mosi, to kima mosi. Ya me monisama kaka na nzila ya Mpeve-Santu. Yesu tubaka, “Tata, mu ke tonda Nge Nge me bumba bima yayi na bantu ya ndwenga mpe ya mayela yayi, mpe ke monisa yawu na bana yina zola kulongoka.”

257 Na nswalu ntangu yayi beto kwenda na dibanza yayi yina ke landa awa kana beto lenda. “Na mpamba ba ke sambila Munu.” Ba-Pharisien yango, longokaka, oh, na bumuntu; kasi ba bokilaka bawu, na nzila ya Yesu, “bampeve ya yimbi.” Ba-théologien yango longokaka, Yesu tubaka, “Beno kele bampeve ya yimbi, mpe bisalu ya tata ya beno beno ke sala.” Yandi tubaka, “Beno ke bongisaka bandyamu ya baprofete, kasi batata ya beno na ntangu yina mosi. . . Baprofete yina basikaka samu na kubebisa ba systeme yina ya misambidi.” Yawu yina bawu salaka.

258 Baprofete! Wapi kisika Ndinga ke kwizaka, na théologien to profete? [Dibuundu me tuba, “Profete.”—Mu.] Ya kele ve samu na ba-théologien mpe lukolo. Ya ke kwisaka na profete, ntangu nionso. Nzambi ke sobaka ata fioti ve systeme ya Yandi, ata fioti ve. Ntangu nyonso, ntangu nyonso! Ve na kimvuka; na muntu mosi yandi mosi! Ata mbala mosi ve na kimvuka; muntu mosi yandi, yinga, tata, profete. Mpe bawu tubaka. . .

259 Yesu tubaka, “Beno ke bongisa bandyamu ya baprofete, mpe batata ya beno tulaka bawu na kati kuna.” Mpe ba ke sala kima ya mutindu mosi na yisi ya kimpofo ya seminere ya Satana. Beno me mona?

260 Mpe ntangu yayi, Pentecote, bumba mbombo ya beno na Kimvuka yina ya mabuundu ya Yinza. Ntangu yayi, beno milongi awa, beno ke sonika na quartier général, na—na bantu yayi. Ntangu yayi, beno fwana sonika ve na—na ba-Assemblée mpe mingi ya bawu, samu ti bawu salaka kima, bawu zola kima ve ya kusala na yawu. Mpe beno bampangi ya ba-Baptiste, mpe, beno keba yintu ya beno na ngaanda kuna. Beno ke mona ve ti ya kele nyonso ya kieleka kidimbu ya kibulu yina ke na kwiza? Beno zaba nani ke sala yawu nyonso, kana beno zaba kima na yina me tala Masonuku. Kana Bandinga ke kukitalisa Yawu mosi na kati ya beno, beno vwanda ntama na kima yina. Denomination ya beno ke kota na yawu. Mpe beno fwana sala yawu to kutula na ngaanda denomination ya beno. Beno lenda vwanda denomination ve mpe bikana kuna, samu ti beno fwana kota to bikana na ngaanda.

261 Na yina, beno kele diaka organisation ve, na yina beno me kukitalisa beno mosi. Ya kieleka. Nzambi sakumuna beno, kana beno sala yawu. Mpasi na kutuba yina bantu yikwa ke sala yawu. Kasi bayankaka ke sala, na ntembe ve. Yinga, tata.

262 Vunaka, mpe Yesu bokilaka bawu “bampeve ya yimbi.” Ntangu yayi, kasi ntangu Yesu vwandaka ya kutelama kuna, (yinki) konso mpukumunu, Yandi sembaka yawu na Ndinga, mpe telamaka kuna na nzila ya Ndinga. Nzambi siamisaka Yandi.

263 Mutindu kuna, nkokila yankaka yina, mu longaka na Michel-Ange. Bantu yikwa me vwandaka ntete na Forest Lawn mpe monaka monuma ya Moise kuna, na Michel-Ange? Ya

vwandaka bula, ntangu mu kotaka kuna mbala ya ntete mpe monaka yawu. Michel-Ange lutisaka kaka luzingu ya yandi ya muvimba, ya kusala. Na mabanza ya yandi, yandi vwandaka na yina—yina Moise zolaka vwanda mutindu yina. Mpe yandi—yandi zolaka ku—kukubika yandi na ntwala yandi kufwa. Mpe yandi lutisaka bamvula na bamvula, ya kuyidika, ya kungengisa *awa*, mpe na kubukaka *awa*, mpe ya kulengula *awa*. Tii, na nsuka kilumbu mosi ntangu yandi manisaka yawu, na manima ya bamvula mingi, yandi vwandaka ya kutelama kuna na kitende na diboko ya yandi, mutindu *yayi*. Yandi telemaka na manima mpe talaka yawu, vision yina vwandaka na kati ya mabanza ya yandi, kubanda yandi kuwaka ntete na Moise, ya lendaka monana mutindu yina. Kuna ya vwandaka, ya kutula na ntwala ya yandi. Yandi me twadisama mingi na kisalu ya yandi, yandi simbaka nzundu mpe bulaka yawu na dikulu, mpe yandi bokaka, “Tuba, Moise!” Yandi banzaka ti ya vwandaka Moise zolaka tuba, yandi vwandaka mingi mutindu kima yina vwandaka na mabanza ya yandi. Mpe mar yina na dikulu kele dyaka kuna. Ya kele kiteki ya kulunga nyonso kasi kitini yina ya dikulu, dikulu ya kibakala. Beno tala yawu kuna na Forest Lawn, mutindu beno ke kota kuna na kielo, kifwanisu ya yawu. Michel-Ange ya Moise, kisalu ya yandi ya kulunga, ti, yina kangaka luzingu ya yandi.

²⁶⁴ Nzambi kele Kisadi-biteki ya nene, kieleka, Yandi salaka muntu na kifwani ya Yandi, samu na kutalisa Yandi, mpe Yandi kele Ndinga. Mpe yinki Yandi salaka? Yandi mekaka Adam; yandi kubwaka, Moise kubwaka, bayankaka nionso kubwaka. Kasi awa kele Mosi ya kulunga, alleluia, (yinki ya vwandaka?) kima yankaka ve kana Nzambi Yandi mosi na nzutu, Ndinga talisaka na kati ya Yandi, nataka muvimba ya Bunzambi na nzutu; profete ve, kasi Yandi vwandaka profete; muntu ve, kasi Yandi vwandaka muntu.

²⁶⁵ Ba-Juif, beno meka ve na kulomba Yandi mutindu ya beno. Yandi vwandaka Juif to Muntu ya makanda ve. Yandi vwandaka Nzambi. Beno me mona? Beno kele yina menga ya beno kele, beno me mona, mpe, ya kieleka, beno kele nsuni. Mpe Marie, ya kieleka, Marie vwandaka ve na dibanza na Mpeve-Santu na kupesaka yandi sensation. Nzambi Tata vangaka nkuna, to—to diki na Marie, mpe cellule ya Menga na kati ya yandi, mpe, mpe ya vwandaka Menga ya Nzambi.

²⁶⁶ Menga ke katukaka na sexe ya bakala. Na yina ya vwandaka ve... Hemoglobine mpe menga fwana katuka na tata, samu bébé lenda ve kubaka kimbevo ya mama ya yandi, mutindu tuberculose. Yandi lendaka kuzwa yawu na nzila ya pema ya mama, kasi yandi lendaka ve kuzwa yawu, mu zola tuba, kasi yandi lendaka pema yawu mpe—mpe kukanga yawu. Kasi yandi lenda katula yawu ve na mama, samu ti yandi, yandi kele na kimpwanza na yawu, yandi kele ve menga ya mama ya yandi.

267 Ntangu yayi, kasi Yesu vwandaka ve menga ya ba-Juif to Muntu ya makanda, Yandi vwandaka Menga ya luvangu na nzila ya Yehowa Yandi mosi. Yandi vwandaka Menga ya Nzambi. Biblia ke tuba, “Beto me kuzwa mpulusu na nzila ya Menga ya Nzambi.” Ve menga ya ba-Juif to menga ya Muntu ya makanda, ya zolaka vwanda nyonso kuvukisa banzutu, kasi yayi vwandaka Menga ya Nzambi.

268 Beno tala ntangu yayi ntangu Yandi monaka Muntu yina ya kulunga, Yandi bulaka Yandi, bebisaka Yandi. Esaie tubaka, “Yandi lwalaka samu na masumu ya beto, bukanaka samu na masumu ya beto ya nkú.” Yinki Yandi vwandaka? Yandi vwandaka Ndinga yina ya kulunga, yina vwandaka talisa Dimpa, ti muntu nionso ke zinga. Yandi vwandaka blé yango ya Ndinga ya Nzambi yina zolaka vwanda woto mpe tulaka na Babuku yiya ya mbote, makumi sambanu na sambanu. Mpe muntu ke zinga na nzila ya Yawu, mpe Yina kaka, mpe Ndinga nyonso ya Yawu. Amen. Yina vwandaka kisalu ya kulunga ya Michel-Ange. Mpe ntangu Nzambi lendaka mona Yandi mosi kutalana na kati ya Muntu, Yandi vwandaka na Muntu yina ya kulunga yina vangaka na kifwanisu ya Yandi Mosi. Oh, la la, yinki Muntu! Yandi zolaka kufwa samu na beto nionso. Beto lendaka vwanda na zulu ya yawu, kasi beto ke sala yawu ve. Yandi zolaka kufwa samu na beto nionso. Mpe Yandi kufwaka, Yina ya kulunga; yina beto, ya kulunga ve, lendaka vwanda ya kulunga na kati ya Yandi, na nzila ya kukota ya konso Ndinga ya Biblia ya Yandi. Ntangu yayi, na yina Yandi vumbulaka Yandi dyaka, samu na kunungisama ya beto, ti beto kele na muswa, mutindu Yesu yina vumbukaka, ti Yandi kele awa ntangu yayi samu na kulunga beto, konso Ndinga ya Nzambi, ti beto fwana zinga.

269 Ntangu yayi, na nswalu ntangu yayi, na yina beto ke sukisa. Ntangu yayi, kento ya makwela ya zole ya Eve.

270 Ntangu yayi, bakala ya ntete, Adam; ba zolaka nata yandi na nsinga ya yinda ya bapofete, mpe nionso yina, na manima basikaka ya kulunga, mpe na manima kufwaka samu na kuvwanda Dimpa samu na bayankaka.

271 Ntangu yayi yinki samu na Eve? Yandi fwana sala kima mutindu mosi. Kasi ntangu Yesu kwisaka... Beno bambuka moyo, Eve vwandaka kento. Dibuuundu ntangu nyonso kele kento ya kumonikisa na kati ya Biblia, samu ti yandi kele kento ya makwela. Ntangu yayi beno tala mbote yina yandi salaka. Yandi mekaka na kundimisa Yandi na malongi ya yandi. Ntangu nyonso yina yandi zolaka longa kaka yina bawu banzaka, Yandi vwandaka Muntu ya nene.

272 Kasi kilumbu mosi yandi bandaka na kuzonza, mpe tubaka, “Munu na Tata kele mosi.”

273 “Oh, Nge ke kukisala Nge mosi mutindu mosi na Nzambi, beno me mona. Oh, la la! Beto zola kima ve ya kusala na Muntu yina, dyaka.”

274 Mpe bima nyonso yankaka yayi yina Yandi bandaka na kutuba, “Kana ti beno kudya Nzutu ya Mwana ya muntu.” Yinki beno ke banza ti dokotolo mosi lendaka banza, ya kuvwanda kuna? Yinki beno ke banza ti muntu mosi lenda, kaka kubanza ya mutindu nyonso? “Beno fwana kudya Nzutu ya Munu mpe kunwa Menga ya Munu.”

275 Bawu tubaka, “Muntu yayi kele vampire, longi ve. Vwanda ntama na Muntu yina, Yandi kele kilawu. Vwanda ntama na Yandi.”

276 Kasi ya vwandaka Kieleka. Beno me mona, ya vwandaka Kieleka. “Kana ti beno kudya Yawu ve, beno ke kufwa. Beno nyonso ke kufwa, kana beno kudya Yawu ve.”

277 Ya kele kima mutindu mosi bubu yayi. Dimpa mpe vinu kele kaka kidimbu, beno bika ve kima yina ya yinza kubasika beno. Beno fwana kudya Klisto, yina kele Ndinga yina beno ke zinga, “konso Ndinga yina ke basika,” Biblia ya muvimba katuka Genèse tii Apocalypse.

278 Ntangu yayi, Eve ya zole, beno tala yandi mbote. Yandi vangamaka ya malu-malu, mutindu Yandi vwandaka, na Kilumbu ya Pantekote, ya kifuluka na Mpeve, mpe disaka na nzila ya Ndinga. Amen. Ntangu yayi mu ke na kukumaka musambidi. Mu ke kuwa mbote. Dibuundu yango ya ntete, Eve yina ya ntete, yina zolaka vwanda Kento ya makwela ya Klisto. Bantu yikwa lenda tuba “amen” na yawu? [Dibuundu me tuba, “Amen.”—Mu.] Yandi zolaka vwanda Kento ya makwela ya Klisto. Yandi butukaka na Pentecote, na Nicé ve, na Rome; na Londres ve, na Angleterre; to ve na États-Unis; ve na Allemagne na Luther, ve na Angleterre na Wesley, ve na États-Unis na ba-Pentecotiste, mutindu ba ke bokilaka bawu. Yandi butukaka na Kilumbu ya Pentecote. Yandi vwandaka ya kifuluka na Mpeve. Mpe Yandi vwandaka ya kifuluka na Mpeve, mpe Ndinga dikisaka, “konso Ndinga yina ke basika na yinwa ya Nzambi.” Ata mpe na Judas. . . Mpe, oh, bawu zolaka baka kaka nyonso, kaka Ndinga na nzila ya Ndinga, yinti ya kieleka ke basisa bafelele na zulu ya ntoto ya Nzambi, yina ke talisa Yandi, yinti yankaka ya Kento ya makwela.

279 Ndinga ya Yandi ya nsilulu talisaka Yandi na kati ya Yandi. Ba zolaka tala na Pierre mpe bayankaka. Ba vwandaka ve na seminere, mpe ba zabaka yawu. Ba vwandaka ve na lukolo ya Biblia, seminere mosi ya théologie. Bawu vwandaka na ndongosolo ve, samu ti bawu zolaka sonika ve nkumbu ya bawu mosi. Biblia ke tuba, “Ba vwandaka bantu yina zabaka kima ve mpe yina longokaka ve.” Kasi yinki salamaka? Ba zolaka baka noti yina ba vwandaka na Yesu, samu ti kuna Yandi vwandaka na

kati ya bawu, na kulakisaka nsilulu ya Yandi. Alleluia! Nkembo na Nzambi! Yawu yina beto ke na yawu nsatu na nsungi yayi. Ndinga ya Yandi talisaka Yandi, dibuundu. Yandi vwandaka ya moyo na konso Ndinga yina basikaka na yinwa ya Nzambi.

²⁸⁰ Kasi na yina, mutindu Eve, yandi kutanaka na kubwa ya yandi, na Ndinga, na Nicée, na Rome, kisika ba salaka organisation ya ntete, dibuundu ya Baklisto ya yinza ya muvimba. Ya kele na kizabi ya Biblia na kati awa? Ya kele. . . Ya kele na théologien na kati awa yina zaba ti ya kele kieleka? Organisation ya ntete vwandaka na Nicée, na Rome. Nzambi ata mbala mosi ve kuzwaka organisation, ata mbala mosi ve ke kuzwa mosi. Ya kele muntu yina me twadisama. Ya kele kisika bawu nyonso. . .

²⁸¹ Mu kele Muklisto. “Wapi dibuundu nge kele mambele?” Ya kele kaka na mosi. Mu vwandaka Branham, bamvula makumi tanu na tanu, mpe mu me kotaka ata fioti ve na dibuta yango, mu butukaka mosi. Ya kele mutindu beno me butuka na Kimfumu ya Nzambi, mpe beno kele kitalisi ya Ndinga ya Yandi.

²⁸² Beno tala, Eve kutanaka na yandi. Mpe mutindu mosi salaka Eve ya zole kutanaka na yandi na Nicée, na Rome, pesaka yawu denomination, credo, ndimaka ba-dogme na kisika ya Ndinga; katulaka biteki ya mimpani mutindu Jupiter mpe nyonso, mpe tulaka Paul mpe Barnabas. Mpe—mpe bakaka nzambi-mwini mpe nzambi-ngonda, Astarte, nzambi-ngonda, na kosher na zulu ya yawu, mpe salaka yandi na kuvwandaka mama ya nzambi-mwini yina kele Jupiter. Mpe sobaka kilumbu ya mbutukulu ya Yesu na Ngonda ya yiya, kisika yinza nyonso, kisika Yandi butukaka na yisi ya nkombo ya bakala, samu ti Yandi vwandaka nkombo ya bakala, mpe sobaka yawu na mukembo ya mbutukulu ya nzambi-mwini na kati kuna, kisika ya ke salaka kilumbu mosi. . . Kuna kele kaka na kutala minuti mosi ya luswaswanu na kilumbu ntangu ya ke luta kilumbu ya makumi zole na tanu ya Ngonda ya kumi na zole, mukembo ya mbutukulu ya nzambi mwini, Mwana ya Nzambi ve. Mpe mosi na mosi ya beto ke bulaka Tata ya Nowele, mpe bayinti ya ngitukulu, kinganga-Nzambi ya mimpani, mpe bima ya mutindu yina, mpe na yina beto ke kukibokila beto mosi Baklisto? Yinki kele diambu na dibuundu ya Baklisto?

²⁸³ Ya ke vwanda na muntu mosi na kati ya beto, yina lenda longa Ndinga mpe kutuba Kieleka, mpe Nzambi ke siamisa yawu mpe ke siamisa na bantu ti Yandi kele mutindu mosi mazono, bubu yayi, mpe kukonda nsuka? Beto ke na nsatu ya seminere ve. Beto ke na nsatu ya théologien ve. Beto ke na nsatu ya profete. Ya kieleka. Nzambi silaka yawu, mpe.

²⁸⁴ Na yina Eve lungisaka yandi, mutindu mosi salaka dibuundu; pesaka nzila na denomination, misiku ya muntu, samu na kuyala na nzila ya muntu, dyaka ve ya kutwadisa

na Mpeve. Yandi kwendaka ntama na Ndinga, mpe ndimaka ba-dogme. Nani lenda tuba “amen”? [Dibuundu me tuba, “Amen!”—Mu.] Kieleka. Kasi beno zaba ti beto ba-Protestant ke ndimaka ba-dogme mingi mutindu bawu kuzwaka, ntangu beto ke bwela kima mosi na Ndinga yayi to ke katula kima mosi na Yawu? Satana kuzwaka yandi, na tekini ya yandi ya mutindu mosi yandi salaka na Eve, na kukakulaka. Ya kele kisika yina yandi kuzwaka yawu, tubaka kima ya kuswaswana na Ndinga, credo to denomination.

²⁸⁵ Ya kisina kubwaka na zulu ya ntoto, na kati ya bumbangi, bansululu ya yimbi ya Rome nikaka blé na Pentekote, tii na kati ya mbombi, mpe yokaka bawu na bitini ya bayinti mpe pesaka bawu mutindu madia na bankosi. Bawu kotaka mutindu blé yankaka kusalaka, ya kele kieleka, kasi Yandi bandaka na kuvumbula dyaka yandi na kusungika, mutindu mosi, mbala ya zole.

²⁸⁶ Mutindu Yandi salaka Adam ya Zole. Na manima Adam kubwaka, Yandi bandaka na kuvumbula Adam ya Zole. Mpe Adam ya Zole kubwaka, na yina ba zangulaka Yawu. Adam ya ntete kubwaka na disumu ya yandi mpe bikanaka kuna. Adam ya Zole kubwaka, samu na kuvulusa muntu na disumu, mpe ba zangulaka yandi.

²⁸⁷ Ntangu yayi, dibuundu ya ntete kubwaka na Nicée, na Rome, ntete, na nzila ya Ndinga mosi ya Kieleka na kati ya Biblia, kisika dibuundu ya Rome bwelaka ba-dogme ya bawu mpe ba-credo. Nganga-Nzambi mosi ya fioti kwisaka na nkumbu ya Martin Luther, yina tubaka, “Yayi kele ve kominyo, yayi kele ve nzutu ya Klisto. Ya kele kosher. Mpe, muntu, ‘muntu ya kudedama ke zinga na lukwikilu.’” Mpe yandi losaka kima yango na ntoto, mpe kolamaka na yawu. Kuna me kwiza mbwetete ya beno ya ntete yina ke sema na manima ya nsungi ya Thyatire. Yinga, tata, yina ba me nungisa na nzila ya lukwikilu! Yandi, Kisadi-biteki ya nene, ya kuvwanda samu na kusala Kento ya makwela ya kulunga yina ke lakisa Ndinga ya Yandi.

²⁸⁸ Kasi yinki ba-Luthérien salaka na manima ya lufwa ya Luther? Bawu kutanaka na Satana, mpe salaka dénomination na yawu, mpe kufwaka. Yandi salaka ata mbala mosi ve kima yankaka na manima ya yawu, yandi salaka, yandi kumaka kaka lutangu ya nene ya bantu. Mbote mingi.

²⁸⁹ Na yina Nzambi zangulaka yandi diaka, na bilumbu ya John Wesley, na Kieleka yankaka samu na kutalisa. Yinki yandi salaka? Yandi tubaka, “Kusantisama kele kisalu ya zole ya lemvo.” Mpe yinki Nzambi salaka? Yandi sakumunaka yawu. Mpe yandi teleminaka dibuundu ya ba-Anglican, mpe dibuundu ya Zwingli, mpe bayankaka nionso, mpe bantu nyonso ya kukangama na misiku, mpe Calvin, to ba-Calviniste, mu zola tuba, mpe teleminaka yawu. Mpe—mpe tubaka, “Muntu ya

kudedama ke zinga na lukwikilu,' tubaka Luther. Mpe ksalu ya zole ya lemvo kele kusantisama." Mpe ya kele Kieleka. Ya kele kieleka. Beno me mona?

²⁹⁰ Kuna yinki yandi salaka? Kima mutindu mosi, na manima ya lufwa ya Wesley, mpe Asbury mpe bayankaka, kima mosi yina Luther salaka, salaka organisation, kufwaka. Beno tala yawu ntangu yayi.

²⁹¹ Mu kwendaka kuna, ntama mingi ve, samu na kusambila samu na kento mosi na lupitalu, yandi vwandaka kwenda na yisi ya lipaso. Mu kwendaka kuna. Yandi tubaka, "Mpangi Branham, mu bokilaka nge. Nge zaba munu ve," yandi tubaka, "kasi nge ke sambila samu na munu? Mu fwana sala lipaso na suka."

Mu tubaka, "Kieleka, mpangi ya kento."

²⁹² Ya vwandaka na bakala yankaka, kento mosi, mpe mwana-bakala mosi, yina vwandaka kuna, pene ya mwana-bakala mosi ya bamvula kumi na nana, mpe ba vwandaka tala munu mbote-mbote. Mpe mu balukaka mpe mu tubaka, "Nge lenda lemvokila munu, mu ke . . ."

Yandi tubaka, "Benda rido yina!"

Mu tubaka, "Nge kele Muklisto ve?"

Yandi tubaka, "Beto kele ba-Methodiste!"

²⁹³ Mu tubaka, "Ya vwandaka ve yina mu yufulaka nge. Mu yufulaka nge. . . Kana nge kele kaka Methodiste, mu ke benda rido. Kana beno kele Muklisto, beno zola ve rido yina." Na yina, yinga, ya kieleka.

²⁹⁴ Na yawu, ya kele na luswaswanu mingi na kuvwanda Methodiste, to Baptiste, to Presbytérien, mpe na manima kuvwanda Muklisto; ve na kuvwandaka Campbellite, kasi na kuvwandaka Muklisto, beno me mona. Yinki yandi salaka? Kima mutindu mosi.

²⁹⁵ Kuna yinki salamaka? Nzambi bakaka mwa nkonga mosi awa na Sud, mwa muntu-ndombe mosi na disu ya kubaluka. Mpe, Yandi, yinki Yandi salaka? Yandi tiamunaka mvutukulu ya makabu, mpe ya kumaka Pantekote. Mpe mingi ya beno bantu ya ntama mutindu Mpangi Valdez yina kele ya kuvwanda kuna na manima, kiboba ya ndwenga, vwandaka longa ntangu mu vwandaka na bamvula tanu. Yandi ke bambuka moyo na Pantekote ya ntete. Oh, beno tuba organisation ve na bantu yina, ba basikaka na kima yina ya yimbi. Mpe ba vwandaka na Nsangu ya Nzambi.

²⁹⁶ Kasi yinki bawu salaka? Kima mutindu mosi bayankaka salaka, bongisaka yawu. Ntangu yayi ba ke na ba-organisation makumi tatu to makumi yiya ya kuswaswana, ba-unitaire, ba-binitaire, tatu. Tii, kyadi, bumbote, mu me kuwaka ntete ve mutindu yina na luzingu ya munu! Yinki beno salaka? Beno kufwaka kaka na kisika yina. Ya kele ntama mingi beno lendaka

kwenda. Organisation ya beno zolaka ve kundima Yayi. Nge, nge me baka muntu ya nge, “Muntu yayi, kana yandi kwikila na beto ve, kuvwanda na yandi ve kuna. Kimpangi ya beto ke kuzwa yawu ve.” Oh!

²⁹⁷ Beno tala, beno sala nswalu, ya fwana vwanda na Nkuna ya kieleka. Ya fwana vwanda kaka, samu ti Yandi ke na kwiza samu na Kento ya makwela kukondwa ditona to mifutu. Yandi ke kwisa samu na yawu, Kento ya makwela yina me siamisama. Oh, yandi ke vwanda mwa kimvuka mosi ya fioti. Yesu tubaka, “Mutindu ya vwandaka na bilumbu ya Noé, kisika myoyo nana vulukaka,” (ya kele kieleka?) “mutindu mosi ya ke vwanda na nkwezulu ya Mwana ya muntu.” Bantu yikwa? Mu zaba ve.

²⁹⁸ Kasi, beno me mona, Kento ya makwela ke salama na nzila ya muvimba, yina vwandaka na Ndinga na nsungi ya bawu. Ya kele kaka ve kimvuka yayi ya nsuka, Nzambi ke katula nionso yayi awa. Oh, ve.

²⁹⁹ Ya ke vwanda—ke vwanda fioti mingi, ya ke vwanda na ngitukulu. Ba ke zimbana, beno ke zaba ve ti bawu me kwenda. Yinki kana Yandi bakaka bankama tanu na bilumbu yayi ya nsuka? Beno ke zaba yawu ata fioti ve. Bakaka bankama tanu na mwa bilumbu, bilumbu zole to tatu? Kuna ya kele na bantu mingi ke na kuzimbana na yinza ya muvimba, ba ke zaba ve kisika bawu kele, ata mbala mosi ve kuwa kima na zulu ya bawu. Nkwizulu ya kinsweki ya Mfumu Yesu, ba ke katula Yandi.

³⁰⁰ Mpe bayankaka ya bawu ke kwenda kaka na ntwala ke longa, kaka mutindu ya vwandaka na bilumbu ya Noé, “Nkembo na Nzambi, beto me kuzwa Yawu, alleluia,” mpe ba me tula kidimbu na lufwa ya bawu. Ya kele yina Biblia ke tuba, mpe Yawu lenda kubwa ve.

³⁰¹ Mutindu Noé, Moise, David, talisaka nkwizulu ya Bakala ya makwela yayi ya kulunga; mutindu mosi na Luther, Wesley, mpe Pentecote, talisaka nkwizulu ya Kento ya makwela ya kulunga.

³⁰² Beno tala, konso ntangu yina yandi vwandaka na kimpwanza, yinki yandi salaka? Konso ntangu, dibuundu yayi, mutindu Eve salaka, yandi tumaka Adam ya yandi na ngolo nionso na kukwikila nsemu ya yandi ya malu-malu, nzila ya yandi, mpe kuna kufwaka na yawu. “Beto ke, mbote, kimvuka ya beto ke vukana, beno me mona, oh, balusakumunu ya beto ya malu-malu ya yina beto monaka, mpe nionso yina.”

³⁰³ Yinki yayi nionso salaka na Eve? Beto kele kaka na ntangu ya nkufi ntangu yayi. Yinki salaka yayi nionso na Eve, na dibuundu ya ntete ya mama, kento ya makwela ya ntete na Adam? Yinki yawu salaka na yandi? Ntangu yayi beno kuwa mbote, beno ke wisana na Yayi ve. Kasi ya basisaka “nkuna ya nyoka.” Ya kieleka.

³⁰⁴ Mwana ya yandi ya ntete vwandaka ve mwana ya Adam. Kana ya vwandaka, yandi vwandaka na bukuluntu. Biblia, na

Jude, tubaka ti Adam. . . ti, “Enoch vwandaka ya sambwadi na Adam.” Ya kele kieleka? Mpe yandi bandaka, “Adam butaka mwana ya yandi, Seth.” Yinki samu na Caïn, yina vwandaka na bukuluntu? Yandi vwandaka ve mwana ya Adam. Seth, mpe Seth butaka; Jared, mpe landilaka tii na Adam, yina tii. . . “yina vwandaka ya sambwadi ya Adam.” Na yina kana Caïn vwandaka mwana ya yandi, ya kele ve na kisika mosi na kati ya Biblia, ata mpe na Luc ntangu yandi ke vutuka dyaka na yawu, yandi ke manga ata mbala mosi ve na Caïn na kuvwandaka mwana ya Adam. Mpe, kana yandi vwandaka ve, mwana ya nani yandi vwandaka? Mpe kana yandi vwandaka mwana ya Adam, yandi vwandaka mwana ya yandi ya ntete, yina vwandaka na bukuluntu nyonso. Oh!

³⁰⁵ Ya kele na dibuundu yango ya nsuni (beno lenda mona yawu ve?) yina ndimaka kima mosi, vwandaka pité na kisika ya Ndinga. Bantu ya Pentecote, sakumuna beno. Mbote mingi, yinki yandi salaka na Eve? Nkuna ya nioka. Yinki yawu salaka na bilumbu yayi ya nsuka, na nzila ya denomination? Basisaka nkuna ya nyoka, diaka, losaka Ndinga. Yinki yandi pesaka? Bambuma mpe nyonso, Menga ve.

³⁰⁶ Na nzila ya luzayikisu ya Ndinga, Ndinga ya Nzambi na ntwala ba sonikaka Yawu, “Abel na lukwikilu pesaka na Nzambi munkayulu ya kulutila kitoko na yina ya Caïn, yina pesaka kimbangi ti yandi vwandaka ya kusungama,” Ndinga ke kukitalisa Yawu mosi na nzila ya yandi, na nzila ya dikabu ya yandi.

³⁰⁷ Oh, Caïn kwendaka mpe bakaka bambuma ya bilanga, yandi banzaka ti Eve kudiaka pomme. Baseminere ya kulutila théologie me sobaka yawu ntangu yayi na abricot. Ya vwandaka pité. Mpe muntu nyonso zaba yawu, yina zaba Biblia. Kieleka, ya vwandaka.

³⁰⁸ Beno tala, ba basisaka nkuna ya nyoka na nzila ya Eve ya ntete ke kwenda ntama na Ndinga. Eve ya zole salaka kima mutindu mosi na Nicée, na Rome. Mpe yinki yandi me kuzwa? Nkonga ya bana ya denomination. Ya kele kieleka. Oh, na bumuntu; kieleka, mbote. Kasi yinki samu na yawu? Ya kufwa, na nzila ya ba-credo ya bawu.

³⁰⁹ Mutindu mosi ntangu yayi. Luzayikisu ya Caïn ya Ndinga salaka kima mutindu mosi yina bayayi kele na yawu. Yinki? Silaka yandi. Na nsuka ya ntangu, yinki silaka Eve yayi ntangu yayi? Beno kuwa mbote ntangu yayi, mu ke sukisa. Yinki nsilulu na Eve yayi na ntangu ya nsuka? Bamvwama, Laodicée, na nkumbu ya nene, muntu ya nene, ya mvwama. “Kasi ya kufwa, mpe kinkonga, mpe zaba yawu ve.” Yawu yina nsungi ya dibuundu sukaka.

³¹⁰ Kasi yandi ke manga Ndinga. Samu na kusala Matthieu 24:24 kieleka na yandi, yandi ke meka na kutambula na makelele

mingi, mpe mingi ya *yayi*, mpe bantu mingi ya kutelama, mpe bima mutindu yayi, na kumekaka na kutuba, “Mbote, beto kele na ngolo! Nkembo na Nzambi, alleluia, beto kele na ngolo!” Ke lakisa mutindu ya kinzambi, kasi ke manga Ngolo ya yawu, na mutindu ti ya ke vuna bantu ya kieleka ya kusolama... Wapi mutindu muntu lenda bina na Kimpeve mpe kuzonza na bandinga, mpe ke manga Ndinga ya Nzambi kele Kieleka, mpe ke vwanda Mpeve-Santu? Yawu lenda salama kaka ve.

³¹¹ “Konso Ndinga!” Nzambi me tuba kima mosi, ya kele kaka nyonso kieleka yina Yandi zola kutuba. Beno tendula Yawu ve mutindu yankaka. Biblia ke tuba, ti, “Ya kele ve bantendulu ya muntu yandi mosi.” Beno tuba yawu mutindu Yandi tubaka Yawu.

³¹² Beno tala, ngolo ya luvunu. Ya kele nyonso kieleka yina Satana zolaka pesa na Yesu, ke mata kuna mpe ke sala Yandi kukitalisa Yandi mosi. Bantu ke sala yawu, ata mpe Kimvuka ya Yinza, bawu nionso. “Nani lenda sala mvita na yandi,” yandi tubaka, Biblia, “kifwanisu yayi ya kibulu yina ke telema?” Kana beto vwandaka na ntangu, beto zolaka kota (kasi beto kele ve) na yawu. Beno tala Yesu, Ndinga ya zole Adam, na kilumbu ya yandi, beno tala mbote na bilumbu ya dibuundu yayi ntangu yayi yina ke vwanda pene-pene mingi. Nsungu ya dibuundu ya nsuka kele Laodicée. Bantu yikwa lenda tuba “amen” na yawu? [Dibuundu me tuba, “Amen.”—Mu.] Yinki yandi salaka? Wapi mutindu yandi kotaka na kitezo ya nkembo? Tiya ve madidi ve, kukondwa Nzambi. Mpe yinki yandi salaka?

³¹³ Ntangu yayi, Adam monaka Eve na luzolo...to ve na luzolo, kasi vunamaka kukondwa kuzaba dyambu, mpe Adam kwendaka na Eve samu yandi vulusa yandi. Ya kieleka? Biblia ke tuba, “Adam vunamaka ve.” Ya kele samu na yina Yawu ke yimina bakento na kulonga Nsangu ya mbote. Beno me mona? Adam vwandaka ve na kati ya kukolama, kasi Eve vwandaka. Na yawu ya kele samu na yina yandi zolaka longa ve, beno me mona, to kubaka lutumu na zulu ya bakala, to nyonso yankaka yina. Ya kele—ya kele yina Ndinga ke tubaka.

³¹⁴ Beno ke tuba, “Mbote, yayi. . .!” Mu ke kipe ve yina *yayi* ke sala mpe *yina* ke sala. Ya kele yina Ndinga ke tuba, mpangi-bakala, mpangi-kento. Mu ke na kumeka na kunata yawu na nge, beno me mona, ya kele yina Ndinga ke tuba. Beto ke zingaka na nzila ya Ndinga, ve yina kimbangi mosi, to kima mosi ya nsuni, to mwa nzingulu. Yina ke na kima mosi ve ya kusala na yawu. Konso mutindu ya nzingulu ke simba ve, kana ya ke manga Ndinga. “Bantu mingi ke kwiza na Munu mpe ke tuba, ‘Mu pesaka profesu, basisaka bampeve ya yimbi. Mu zonzaka na bandinga. Mu salaka bima yayi nionso, mu longaka Nsangu ya mbote, mpe Docteur ya Théologie.’ Yandi tubaka, ‘Nge kisadi ya disumu ya nkú, mu zabaka nge ve.’” Na kuzabaka ti Ndinga me tuba Yawu, mpe na manima kukakula samu na organisation

mosi to kima mosi, systeme mosi. Oh, nkundi ya munu, bika mu kebisa beno, mutindu mpangi-bakala ya luzolo yina ke zolaka beno. Beno kuwa mbote.

³¹⁵ Ntangu yayi, Adam ya ntete basikaka na Eve, samu ti yandi vunamaka. Kasi, ya vwandaka na muntu awa na Laodicée yayi, yandi zabaka luswaswanu. Yinga, tata. Samu ti yandi tulaka Yandi na mbeto ya yandi, kisika ya yandi, sh- . . . Yandi vwandaka na ngaanda, ke na kukonkotaka, ke na kumeka na kuvutuka na kati. Kasi yandi kuzwaka luzabu, ba tulaka yandi na zulu. Yandi vwandaka, oh, la la, “yandi vwandaka na nsatu ya kima mosi ve,” yandi tubaka, kasi yandi zabaka ve ti yandi vwandaka kinkonga, na mpasi. Ya kele dibuundu yina ke vunaka bantu ya kieleka ya kusolama kana ya lendaka salama. Beno tala, yandi vwandaka na ngolo, ngolo ya luvunu. Yandi bakaka kitini ya Ndinga, yandi bakaka ve yankaka ya Yawu.

³¹⁶ Yinki kele luvunu ya kulutila nene yina ba me tubaka ntete ve? Ya kele na makumi yivwa na yivwa na zulu ya nkama mosi na kati ya yawu. Kana muntu mosi tubaka “William Branham, na kilumbu yayi, yandi vwandaka kuna na Houston, na Texas, ya kulawuka malafu mutindu yandi lendaka vwanda.” Ya kele luvunu. Beno me mona? “Oh,” beno ke tuba, “ve, yandi vwandaka na Phoenix, na Arizona. Yandi vwandaka longa na bantu ya mumbongo ya Baklisto, yandi longaka na zulu ya dilongi mosi, bantu mingi vwandaka kuna, bawu kuwaka tii pene ya ngunga kumi na tatu. Mpe, na ngunga ya kumi na ndambu, beno zaba yina yandi salaka? Yandi tandaka diboko mpe bakaka dikonga ya malafu, mpe bakaka yawu.” Ntangu yayi ya kele na luvunu. Yankaka ya yawu vwandaka nyonso kieleka. Beno me mona, ya fwana talana nyonso kieleka mutindu kieleka, samu na kuvuna.

³¹⁷ Ya kele mutindu bantu ke salaka bubu yayi. Ba kele na Kieleka mingi, ba ke vuna bantu ya kieleka ya kusolama. . . . Kasi, Ndinga mosi, kaka yina ya ke lomba. Mpe mu me siamisa yawu na nzila ya Biblia.

³¹⁸ Beno tala, ata mbala mosi ve ti Yandi kwendaka na yandi. Yandi tulaka Yandi na ngaanda, Ndinga, mangaka Yandi. Ntangu yayi yayi kele kumona ya mawa, ntangu beto ke kuma na nsuka.

³¹⁹ Kaka mutindu ya vwandaka na Babybone, muntu ke telama ve na kima yina yandi ke na kumeka na kusala yandi mosi. Yandi ke telama kaka ve. Mutindu na bilumbu ya Noé, ata mutindu Noé longaka mpe kebisa, ata mbote ve. Na bilumbu ntangu Achab, yandi fwana sala dimpa ya yandi mosi samu na kutinda yandi mosi na difelo. Ya kele kieleka. Yandi fwana sala dimpa ya yandi na yina kitini ke bukana, na yawu ya ke fidisa yandi mosi na difelo. Kaka mutindu Achab mpe Jézabel. Bawu, kasi, kima ya

yawu kele, bawu banzaka ve ti bawu vwandaka sumuka. Bawu banzaka ti bawu vwandaka sala mbote.

³²⁰ Beno zaba, Yesu tubaka, “Ya ke salama ti ba ke kufwa beno, na kubanzaka ti ba ke sala kisalu ya Nzambi.” Beno vingila tii buku yayi ya munu ya malu-malu ke basika. Ba bulaka bawu masasi na bantu yankaka, na nkokila yina, samu na kutuba ti ya vwandaka luvunu na kuvukisa dibuundu ya Katolika ya Rome na ba-Protestant. Masasi tatu bulaka na kati ya kivinga, ya nkundi ya munu, na mpasi bawu kondwaka yawu. Beno vingila tii kuna buku yayi ke kota na kisalu. Beno banza ve ti ba ke sumuka; ba ke banza ti ba ke sala kima ya mbote. Ba ke banza ti ba ke—ba ke sala yawu samu na dyambu ya Nzambi, na kuzabaka yawu ve.

³²¹ Ba-Juif kufwaka Yesu, na kubanzaka ti bawu vwandaka sala kima ya mbote, samu malongi ya bawu ya dibuundu tubaka ti Yandi vwandaka na yimbi. Oh, yandi tubaka samu na bawu Yandi. . . “Ba komaka na kulunsi Dimpa ya kieleka yina ba zolaka zingila.”

³²² Ntangu yayi, na yina, “Bayina nionso ndimaka Yandi na kuvwanda Luzingu ya bawu, Luzingu ya Kukonda nsuka, bawu zingaka na nzila ya Yandi, mpe Yandi pesaka bawu ngolo ya kukuma kitini ya Yandi, bana ya Nzambi.” Ya kele kieleka?

³²³ Ba ke zolaka ba-coyote, lufwa na kati ya mbungu, na lukolo ya ba-théologien ya bawu. Bawu zola Yesu ve, Dimpa ya Luzingu. Bawu zola Yandi ve. Bawu tulaka Yandi na ngaanda ya dibuundu ya bawu. Ba fwana sala yawu. Mu ke kipe ve yina bawu ke sala.

³²⁴ Beno ke tuba, “Nge banza ti nge ke soba yawu, Mpangi Branham?” Ve, tata. Kasi mu ke na kuzonzaka na bantu ya Kusolama.

³²⁵ Ba tulaka Yandi na ngaanda. Samu na yinki? Ba bakaka mbungu ya bawu, ya kuvukana na yinza, mwa ba-théorie ya kima mosi, mpe kuvukisa yawu kintwadi, mpe salaka mbungu ya seminere. Mpe bawu ke manga faline ya profete ya Elie samu na kubelusa yawu.

³²⁶ Bawu salaka yawu na kilumbu yina? Elie vwandaka na mwa faline. Faline yango vwandaka Klisto, munkayulu ya faline, ntoto nyonso mutindu mosi. Konso mbuma zolaka vwanda mutindu mosi, samu na kunika yawu. Mpe yandi losaka yawu na kati kuna, mpe ya nataka kimbevo ya bawu, to lufwa ya bawu na nzungu.

³²⁷ Kasi bubu yayi bawu me kuzwa lufwa na mbungu, mpe bawu zola ve Faline ya Elie, Klisto, Dimpa, Ndinga. “Ve, tata! Ya kele kinzambi-nzambi!” Ba ke kuzwa Yawu ve. Beno kwenda na ntwala mpe beno kudya yawu, mpe beno ke kufwa kieleka mutindu yinza. Ya kele na ndikila na mbungu. Bawu ke ndima ve Faline yayi (ve, tata) na banzungu ya bawu ya théologie. Bawu

ke sala yawu kaka ve. Ntangu yayi ba ke basisa beno na yawu, ba ke zola ve kima ya kusala na yawu.

³²⁸ Ntangu yayi Eve ya zole, dimpa ya mbuma, vwandaka Pentecote, salaka mutindu ya ntete, dimpa ya Adam, kwendaka na lufwa na nsi ya bansalulu ya yimbi ya ba-Romain, na nsi ya lukwamusu, ya bumbangi.

³²⁹ Kasi mpangi ya yandi ya kento yina kumaka ndumba, (ya kele yina Biblia ke tuba?) ya kele kieleka, yinki yandi salaka? Yandi kwendaka mbala mosi na yinza mpe butaka bana. Nani lenda tuba “amen” na yawu? [Dibuundu me tuba, “Amen.”—Mu.] Apocalypse 17, “Ndumba mpe bana ya yandi ya bakento,” bakala ve; bakento, mabuundu. Denomination, yinki salaka yandi ndumba? Yandi mangaka Ndinga mpe bakaka denomination, yandi kumaka ndumba. Yinki bana ya yandi salaka? Ba vwandaka bakento ya kindumba, yina kele kima mutindu mosi. Salaka kima mutindu mosi, mangaka Ndinga mpe bakaka denomination. “Bana ya yandi,” bana ya bakento, mabuundu, beno tala bawu.

³³⁰ Ntangu yayi beno bika mu tuba mutindu yayi, na profesi. Beno ke bakula? Kuswana ya nene ya dibuta me kuma pene ya kusuka. Bawu nyonso ke na kuvutukaka. Mama ya kiboba ke vutula dyaka bana ya yandi. Bawu nyonso kele mutindu mosi, na mutindu nyonso. Bawu zola kuvwanda mosi. Ya kele ntangu samu na Dibuundu mpe Nzambi, Dibuundu mpe Ndinga, samu na kuzwa mosi, kaka awa, samu ti ya kele yina Yandi ke na kwiza; ya kele ve “kimvuka mosi” mutindu yina. Ve, tata.

³³¹ Mbuma ya blé ke vwanda. Ntangu yayi beno tala mbote yinza, mpe beto ke sukisa na dibanza yayi. Beno tala mbote yinza. Muntu ke kunaka blé.

³³² Ba sonikaka buku, mu banza ti beno nionso me tangaka yawu, mu banza ti bayankaka na kati ya beno ba-théologien, yina ba me bokila *Nzambi Ya Swi*. Mu banza ti beno lenda kuzwa yawu mu banza na—na babuku ya beno, na—na kisika beno ke tekaka babuku, na buku ya ba-kilometre. *Nzambi Ya Swi*, tubaka, “Wapi mutindu,” mumpani, tubaka, “wapi mutindu nge lendaka vingila, kuvwanda Nzambi yina lendaka vwanda Kuna na kati ya Bansungi ya Mudidi mpe kutala bana ya fioti ke kufwa, na tiya; bakento, ba kangaka bansuki ya bawu na budimbu, mpe yokaka bawu; bawu kangaka ngombe mosi ya bakala na diboko mosi, mpe bendaka bawu ndambu na ndambu, samu bawu ke yambaka ve kulunsi; mpe bima yina nionso mutindu yina?” Yandi tubaka, “Wapi mutindu Nzambi, kana ya vwandaka na mosi, ya kuvwanda kuna mpe kutala mbote bana yango ya fyoti kuyoka?” Beno me mona, ya kele ya yinza, dibanza ya nsuni. Beno me mona?

³³³ Beno tala, beno zaba blé, ntangu ya ke kota na ntoto, ya fwana vwanda kuna mpe kupola? Ya kele yina dibuundu yango

ya pantekote zolaka sala, ya kulala kuna mpe kukwenda na ntoto, mpe kufwa. Ya zolaka bola, samu na kubasisa dyaka Luzingu. Ya kele kieleka? [Dibuundu me tuba, "Amen."—Mu.] Ntangu yayi beno tala mbote, mpe ntangu yayi yayi yayi kele mabanza ya munu ya nsuka. Ntangu yayi samu na kumanisa yawu nyonso, beto baka yinza. Bantu yikwa na kati ya beno ke kwikila ti Nzambi ke salaka mutindu mosi na kati ya yinza, na bima nionso? ["Amen."]

³³⁴ Yandi, beno tala, Yandi salaka yinza. Yandi vulusaka yinza mutindu mosi Yandi vulusaka muntu. Yinki muntu ke kwikilaka? Yandi ke kwikilaka, na yina ba me botikaka yandi; na yina ba me sukula yandi na menga, kusantisama, yina vwandaka nsangu ya Wesley; na yina yandi me fuluka na Tiya ya Mpeve-Santu, ke katula yinza na yandi, mpe yandi me fuluka na Mpeve, yina kele Ndinga. Beno ke kwikila yawu? [Dibuundu me tuba, "Amen."—Mu.] Ntangu yayi beno tala mbote yina. Nzambi ke vulusa yinza ya Yandi mutindu mosi.

³³⁵ Bantu yikwa kele na *Yinzo Ya Bilumbu Ke Kwisa Na Ntwala Ya Kento Ya Makwela Mpe Bakala ya Makwela*, na bande? Beno me mona, mu me basisa yawu kuna. Mfumu pesaka munu yawu. Mu pesaka yawu na nge mutindu Yandi pesaka yawu na munu.

³³⁶ Beno tala, kima ya ntete, yinza vwandaka ya kufundisa, na yisi ya kubwa ya Adam katuka na Ndinga. Malongi ya Noé nataka kunungisama, mpe Nzambi botikaka ntoto na maza; na manima kwisaka Mwana mpe tiamunaka Menga ya Yandi na zulu ya yawu, samu na kusantisa yawu, samu na kulomba yawu samu na bantu ya Yandi Mosi; na yina na kati ya mupepe ya nsuka, kuvutula ya malu-malu, ke vwanda tiya yina ke yoka konso nkuna, konso kima, ya ke kwenda mafunda ya bakilometele na zulu, na mipepe.

³³⁷ Mpe na manima yinki? "Mu monaka Mazulu ya malu-malu mpe ntoto ya malu-malu, mazulu ya ntete mpe ntoto lutaka. Mpe mu monaka Mbanza ya Santu, Jérusalem ya Malu-malu ke lumuka na Nzambi, kuna na Zulu, me kubama mutindu kento ya makwela samu na yandi. . . me kubama mutindu kento ya makwela samu na bakala ya yandi, beno me mona, ke kulumuka na zulu ya ntoto." Na yina Nzambi mpe muntu. . .

³³⁸ Kima ya mutindu mosi na Yesu, beno tala, ntangu ba botikaka Yandi na masa, mpe salaka nsodolo ya Yandi. Ba santisamaka Yandi, na kubanda, na nzila ya Tata; na yina Yandi telemisaka maboko ya Yandi, mpe awa kwisaka Yembe na zulu ya Mwana-dimeme. Yinki Nzambi vwandaka sala na ntangu Yandi tulaka Yembe Kuna? Yandi tubaka kitini yina ya luzingu; yina—yina vwandaka kitini ya ntoto, Yesu samu na kudya madia mutindu beto kele na yawu, dimpa ya kimuntu. Kasi ntangu yayi Nzambi ke tubaka yawu, ya kele ve na kima mosi ke simba yawu.

Lufwa lenda simba yawu ve. Yandi tubaka, “Bebisa Tempelo yayi, Mu ke vumbula Yawu diaka.”

³³⁹ Mpe ntangu bakala mpe kento ke kota na Nzambi, ya kulunga ntangu yayi, ve na yisi ya mwa bantangu, ve na yisi ya emotion, kasi ya kieleka ntangu Ndinga mpe Yandi ke kuma mosi; Nzambi me vulusa muntu yina, ba santisaka yandi na bima ya yinza, kuvutula nyonso ya yinza na yandi, na Tiya ya Mpeve-Santu, mpe ke zinga na kati ya muntu yina, ke kukitalisa Yandi mosi, bakala yina ya kulunga to kento yina ke zinga na nzila ya Ndinga. Beno me mona, ya kele ntoto yina ba me sukula. Yandi ke sadila ntoto mutindu mosi, Yandi ke vulusa yawu.

³⁴⁰ Ntangu yayi beno tala mbote, mbuma ya blé ke kubwaka na ntoto. Ntangu yayi, Yesu vwandaka mbuma yina ya blé yina kubwaka na ntoto, yina na manima kumaka ya kulunga, Yawu vwandaka na Luzingu na kati ya Yawu. Moise kuvumbukaka ve. Adam kuvumbukaka ve. Ata mosi ya bawu vumbukaka. Kasi Muntu yayi ya kulunga yina talisaka Ndinga na mutindu nionso, Yandi zingaka na nzila ya Ndinga nionso! Bantu yikwa lenda tuba “amen” na nzila ya yawu? [Dibuundu me tuba, “Amen.”—Mu.] Yandi zingaka na nzila ya Ndinga nionso. Yinki salamaka? Ba tulaka Yandi na kati ya ntoni. Kasi, bilumbu tatu, Yandi bukaka yawu mpe basikaka diaka. Beno me mona?

³⁴¹ Ntangu yayi awa ke kwisa diaka dibuundu, beno me mona, ke kwisa na Yina ya kulunga, samu na Enlevement diaka. Ntangu yayi yinki salamaka na manima dibuundu kubwaka na ntoto na Nicée, na Rome, na organisation ya ntete? Muntu lenda tuba “amen,” ya kele kieleka? [Dibuundu me tuba, “Amen.”—Mu.] Yinki yandi salaka? Yandi basikaka dyaka na mvumbukulu ya mwa ntangu fyoti, Yandi mekaka na nzila ya Luther mutindu mosi Yandi salaka na nzila ya Noé. Kasi yinki yandi salaka? Yandi kondwaka Ndinga, yandi salaka organisation. Yinki yawu salaka?

³⁴² Ya kele mutindu mbuma ya blé ke basika. Ntangu mbuma ke basika, yinki kele kima ya ntete ke basika? Bana zole ya bantwenya. Ntangu yayi beno kuwa mbote-mbote. Yinki ke kwisa, yinza ntangu yayi? Beto ke landa yinza na kimpeve, dimpa ya yinza na dimpa ya kimpeve. Yinki ke salama? “Wapi mutindu Muntu yayi lendaka vwanda Dimpa?” Beno tala mbote.

³⁴³ Ntangu dibuundu kwisaka, yandi vwandaka mwa dititi mosi. Ntangu yayi ya ke talana ve mutindu mbuma yina kotaka na ntoto, ata fyoti ve, kasi ya kele munati ya luzingu. Beno me mona? Ntangu yayi yinki ke salama? Ntangu yayi muntu ke tuba, “Oh, mu kele na bilanga ya mbote ya blé.” Ntete ve. Na kutala yandi kele na yawu. Yinki salamaka? Yina landaka kwisaka vwandaka Zwingli, yina vwandaka kisalu yankaka yina kwisaka na manima ya Luther. Dyaka yina vwandaka yawu ve. Ya kele dititi. Na manima mwinga basisaka matiti mingi, mumbandu

Calvin, mpe nionso yina, basikaka. Na nsuka dibuundu ya ba-Anglican telamaka, matiti nyonso. Beno me mona, bawu nyonso kaka kieleka mutindu mosi, kima mutindu mosi.

³⁴⁴ Na yina yinki salamaka? Blé ke sobaka, mpe mbuma ke sobaka, mpe bima nionso ke sobaka. Yinki kwisaka vwandaka fololo. Beno lendaka bokila yawu felele. Mbote, ntangu ya salaka mutindu yina, beno tala yina ke kangama na yawu, mwa bapine. Ntangu yayi yina ke monana fioti mingi mutindu mbuma ya kieleka yina kotaka, kulutila dititi. Ya kieleka? Mbote, nsangu ya Wesley vwandaka pene-pene mingi na Biblia kulutila Luther. Beno zaba yawu. Ya kele kieleka? Yinki kele mwa bafololo yango nyonso ntangu yayi? Ya vwandaka na ba-Méthodiste ya Wesley, ba-Nazaréen, ba-Pèlerin ya Sainteté, Bampangi ya Kuvukana, bayina nyonso na yisi ya kusantisama. Mpe yinki me katuka kuna? Yawu, na nsuka, yinki yawu salaka? Kubongisa, kufwaka!

³⁴⁵ Yinki me basika yina vwandaka ba-Pentecotiste. Beno ke tuba, “Oh, mpangi-bakala!”

³⁴⁶ Ntangu yayi na buzitu nyonso, mpe mu ke tuba yayi na zola ya kinzambi. Mpe bika ti Tata ya Nene Yina mu me tuba na beno, na mbandukulu, vwandaka awa, bisika nionso. Kana mu tuba yayi na nzila ya yimbi, na yina Yandi ke fundisa munu. Kana mu tuba yawu na nzila ya Kieleka, Yandi ke sakumuna munu. Yandi ke bika beno kumona Yawu, kana beno kele ya kutumama na Luzingu.

³⁴⁷ Ntangu mwa mbuma ya ntete ya blé ke basika na mwinga ya blé, ya kele kieleka mutindu mbuma. Ya kele kieleka? Kasi yinki ya kele? Ya kele ve mbuma. Ya kele ti Matthieu 24:24, “ya kubelama mingi ti ya ke vuna bantu ya kieleka ya kusolama kana ya lendaka salama.” Beno tala, ya ke talana kaka mutindu mbuma. Kasi beno katula yawu mpe beno vwanda, mpe beno baka tala-tala ya microscope mosi mpe beno banda na kubenda yawu na manima. Ya kele kaka mpusu na zulu ya disangu, to mpusu na zulu ya blé. Ya kele kaka samu na kukeba yawu, kasi ya ke talana kaka kieleka mutindu mbuma. Ntangu yayi bantu yikwa zaba ti ya kele kieleka, beno telemisa maboko ya beno? Kieleka. Kasi ya kele mpusu.

³⁴⁸ Ntangu yayi, bampangi ya ba-Pentecotiste, beno sala munu yimbi ve, kasi yayi kele Kieleka. Beno lenda ve kutelemina yinza. Mpe yinza ke tuba Nzambi na nyonso, Mvangi ya yawu.

³⁴⁹ Ntangu yayi beno tala mpusu yina. Ya ke talana. . . Yinki bawu salaka? Bawu zonzaka na bandinga. Bawu salaka kaka kieleka mutindu bawu salaka na Pantekote. Kasi kana beno zenga yawu, beno baka mwa kima yango mpe beno vutula yawu, ya kele na mwa bampusu mingi na kati ya yawu. Mpe ntangu beno ke vutula yawu, beno ke mona ntama na manima ya yawu, beno fwana kuzwa galasi ya mbote, beno tala na manima kuna. Ya kele na mwa matiti ya fioti ya mbuma yina ke kwisa, ya kele

na kima ya kieleka. Ya kele munati. Samu na yinki? Ya fwana vwanda kuna samu na kukeba mbuma yina. Ya ke na kusalaka na ngwisani, kasi ya fwana kukeba mbuma yina. Ntangu yayi kisika mbuma katukaka na ntoto, kuna na ba-Luthérien, na nzila ya mabuundu yango, na nzila ya Wesley mpe nzila nyonso kuna, na kati ya bafololo, mpe ntangu yayi tii na mpusu. Ntangu yayi ya ke talana kaka na mutindu ya kulunga. Kuyituka ve ti Yesu tubaka, “Ya ke vuna bantu ya kieleka ya kusolama kana ya lendaka salama.” Ya ke talana kaka mutindu mbuma, kaka na kisika mbuma zolaka vwanda, kasi yinki salamaka? Ya salaka kima mutindu mosi yina bayankaka salaka na ntwala ya yawu, kubongisaka! Yinki ya kumaka? Munati.

³⁵⁰ Ntangu yayi na bilumbu yina beto ke na kuzingila, muntu nyonso ya masolo awa zaba ti reveil mosi kaka pene ya bamvula tatu, mpe na manima na kati ya reveil yina kwisaka organisation mosi. Mpangi-bakala, mpangi-kento, na reveil yayi ya nene ya mvula kumi na tanu yina mu zingaka, mu kuzwaka bweso ya kuzinga na yawu na nge, ya vwandaka ve na organisation yina basikaka na yawu. Ya kele dyaka ve na ba-organisation. Ya ke vwanda ve. Ya kele na nsuka. Ntangu yayi, Pantekote zolaka vwanda kuna samu na kukeba yayi. Wapi kisika beto zolaka kwenda na Nsangu mutindu yayi kana ya vwandaka ve na Pentecotiste na kukwikila yawu? Ntangu yayi beno vutuka na Nzadi ya Ohio, na 1933. Beno me mona?

³⁵¹ Beno lemvočila munu yayi, kasi mu zola beno kuzaba Kieleka. Mpe mu me bikana na ntangu mingi ve, beno zaba yawu, mu ke na bamvula makumi tanu na tanu. Kasi ba-bande yayi ke zinga ntangu mu me kwenda, mpe beno ke mona kana ya kele kieleka, to ve, kana mu kele kisadi ya kieleka to profete ya luvunu. Mu me tubaka na beno ntete kima ve kasi yina salamaka, mutindu mosi yayi ke salama.

³⁵² Ya kele munati. Ya zolaka vwanda. Kasi ntangu blé yango ke banda na kukula, mutindu dibuundu ntete vwandaka munati na Yesu, kasi ntangu Yandi bandaka na kutuba na bawu Kieleka ya Nzambi, bawu kabwanaka na Yandi. Ntangu yayi yinki ke salama? Ngwisani ve. Samu na yinki? Ya fwana vwanda mutindu yina, samu ti blé yawu mosi lenda vwanda na ntwala ya mwini, m-w-i-n-i, mpe na yina blé ya kimpeve lendaka vwanda na ntwala ya M-w-a-n-a, na kubaluka na mbuma ya wolo ya Ndinga, beno me mona, yina salaka Ndinga, Nzambi kumaka nsuni, siamisaka. “Yandi yina ke kwikila na Munu, yandi mpe ke sala bisalu yina Mu ke sala.” Dibundu yina ke zingaka na nzila ya Ndinga yina, ke yelisa, ve na nzila ya organisation, kasi na Mvwandulu ya Ndinga, Mwana, Yawu ke kuma yinki? Ndinga mosi kaka yina kulumukaka na Kilumbu ya Pentecote.

³⁵³ Ntangu yayi, Malachie 4 ke longa beto ve, ti na ntwala ya kilumbu ya nene mpe ya mpasi ya Mfumu ke kwiza, ti yayi ke salama? Bantu yikwa zaba yawu? “Mpe Yandi ke vutula bantima

ya bana na batata,” ya kele kieleka, “Lukwikilu ya batata ya ntete ya pentecote.”

³⁵⁴ “Mpe na kilumbu yina,” Luc 17:20, mu ke kwikila ti ya kele, Yesu tubaka, “ntangu Mwana ya muntu ke monisama,” bantu ve. “Mwana ya muntu,” organisation ve. “Mwana ya muntu,” Ndinga ke zinga Yawu mosi diaka na kati-kati ya bantu! Beno me mona?

³⁵⁵ Ndinga, Yawu mosi, kumaka nsuni na kati ya beno, beno kele kitalisi ya ngunga yayi, Nsangu, kitalisi ya yawu. Beno me mona, beno ke zinga dyaka, ke zinga Luzingu yina vwandaka na kati ya Yesu Klisto. Beno kele na Mvwandulu ya Mwana. Na yina na . . .

³⁵⁶ Yinki ke salama na yawu? Yinki ke salama na Dibuundu yina? Na nsuka, beno kuwa, mpusu yina ke basika na blé yina, ntangu ya ke banda na kumonisama. Yinki salamaka? Luzingu yina vwandaka na kati ya mpusu, basikaka na blé. Luzingu ke sobaka ve. Minati ke sobaka, bawu ke sala denomination; beno me mona, matiti, felele, mpusu. Kasi blé lenda soba ve. Ya fwana vwanda ministere kaka kieleka na zulu ya Ndinga mutindu Yandi vwandaka na zulu ya Ndinga, mpe mutindu Dibuundu ya ntete vwandaka na zulu ya Ndinga, Mpeve ya kufulukuka, Ndinga disaka; ba-denomination ve. Ndinga disaka!

³⁵⁷ Ntangu yayi ya kele na yinza, mpe Ndinga ya Nzambi. Yandi kele Dimpa yango. “Muntu ke zinga kaka na dimpa ve, kasi na konso Ndinga yina ke basika na yinwa ya Nzambi.”

³⁵⁸ Mu ke sukisa ntangu yayi, na ntwala ya kisambu. Beno tala awa, tala kima yina mu zola tuba.

³⁵⁹ Ntangu yayi mpusu yina fwana katuka na blé yina, ya kele na kati ya luzolo ya Nzambi. Bantu yikwa ke tuba “amen”? [Dibuundu me tuba, “Amen.”—Mu.] Mpusu fwana katuka na blé, samu ti ya me yela ntangu yayi. Ya me tala. Ntangu yayi, mpusu yina vwandaka kuna ve, ya vwandaka nsimbisi, ya vwandaka munati ya Luzingu, na yina Luzingu basikaka kuna basikaka mbala mosi na kati ya blé. Ntangu yayi, ya kele samu na yina.

³⁶⁰ Beno kuwa, bankundi, wapi kilumbu beto ke na kuzinga? Beto kuzwaka réveil ya mvula kumi na tanu. Bantu yikwa lenda tuba “amen” na yawu? [Dibuundu me tuba, “Amen.”—Mu.] Yinki organisation me telamaka? Ata mosi ve. Bawu mekaka na kunata munu na kusala organisation, yandi tubaka, “Nge ke sala organisation, Mpangi Branham, na ministere ya nge? Ya ke vwanda . . .” Ntangu yayi, munu ve, mu ke tubila munu ve. Mu ke tubila Nsangu ya ngunga, ya kilumbu.

³⁶¹ Mpe bawu kwendaka kuna na Canada mpe bakaka mwa bampangi ya mvula ya nsuka. Ya kufwaka kaka kuna. Beno bambuka moyo na mvula ya nsuka, beno bampangi? Wapi kisika ya kwendaka? Wapi kisika kima yankaka kwendaka? Kasi yinki organisation me basika na yawu? Ba-million ya mindimi, mpe me sala bampika na kati ya bawu, na ba-credo ya bawu, kumaka

mvwama, mpe kutunga mafuku mpe byazi ya ba-dollar na bayinzo ya nene mpe bima mutindu yina, mpe ke tuba “Mfumu ke na kwiza,” ke fidisa milongi na baseminere mpe nyonso, mpe ke pesa bawu malongi ya théologie yina bantu me sala, mutindu Luther, Wesley, mpe bayankaka ya beno. Ya kumaka mpusu.

³⁶² Kasi, matondo na Nzambi, mbuma ke landila na kukwenda na ntwala. Kuna kana ya kele kieleka na nzila ya Ndinga, kisika beto ke na kuzinga, ya kele kieleka na nzila ya yinza, ya me siamisama, disangu ya blé, na mutindu nionso, bantangu yikwa beto ke na yawu dyaka? Beno zaba yinki? Mu ke kuwa nkwizulu ya masini ya kingolo-ngolo, Kimvuka ya Yinza ya muvimba, yandi ke kabula yawu. Yinki yandi ke sala? Yandi ke zenga yandi na yinti ya yandi. Kasi Yandi kele na ascenseur mosi yina ke na kuvingila Yandi. Yandi ke kwenda na Yinzo, mosi ya basuka yayi. Oh, yinga. Beno me bakula, beno tuba “amen”? [Dibuundu me tuba, “Amen.”—Mu.]

³⁶³ Mu zaba ti yinza ke kwikilaka yawu ve. Bawu lenda kwikila yawu ve. Ve. . . Beno lemvokila kaka samu na bawu, samu ti, “Muntu ve lenda kwiza kana Tata ya Munu me benda yandi ve; mpe Tata ya Munu nionso me pesa Munu ke kwisa.” Kana nkumbu ya yandi kele na Buku ya Luzingu, ya kieleka yandi ke zaba Ndinga. Yandi fwana, ya me kuma bilumbu mingi. Ya me siamisama na mutindu ya kulunga, tii ya ke kieleka Kieleka.

³⁶⁴ Beto ke kuzwa dyaka ve ba-organisation, kasi ba-organisation nyonso ke kota na mosi. Wapi yandi kele mbote? Ke. . . Samu na yinki bawu ke sala na nyanga? Bawu ke yoka yawu. Yesu tubaka, “Bawanzio ke kwisa vukisa blé na kati ya kibumbulu.” Mpe yinki ke salama? “Bayinti, mpe matiti, ke yokama na tiya na tiya yina ke kufwaka ve.” Beno me mona? Mpe yinki fwana salama ntete? Bawanzio basikaka mpe kangaka matiti ya yimbi. Ya kele kieleka? Beno me mona, bawu ke na kuvukanaka bawu mosi kintwadi na organisation mosi ya nene, dyaka ve na ba-organisation.

³⁶⁵ Blé kele awa. Matondo na Nzambi, blé kele awa. Klisto kele awa. Yandi ke siamisa Ndinga ya Yandi, Yawu kele Kieleka. Blé kele awa, ya ke na kuyelaka ntangu yayi, ya kele ya kulala na Mvwandulu ya Mwana.

³⁶⁶ Muntu ve lenda simba Yawu, ya kele nyonso kukwenda, “Beto ke kuzwa kima ve ya kusala na Yawu.” Beno fwana sala yawu.

³⁶⁷ Oh, mpangi, kota na blé, ti Luzingu ya beno yina kele na kati ya beno kubasika na blé. Beno zola? Beno kwikila Nzambi. Ve. . . Beno vwanda kaka na Nzambi. Beno me ndima ti beno ke sala yawu? Yinki kana muntu mosi tubaka. . . Mu ke kipe ve.

³⁶⁸ Mutindu disolo mu tangaka, kilumbu mosi. Ya vwandaka na dokotolo, yandi vwandaka muntu mosi ya mbote, mpe yandi vwandaka zola bantu ya mputu. Mpe ntangu nionso bamputu

lendaka futa ve bamfuka ya bawu, beno zaba yina yandi salaka? Yandi sonikaka yawu na ntinta ya mbwaki, yandi tubaka, “Ba me lemvokila nge.” Na nsuka, dokotolo kufwaka. Mpe ntangu dokotolo kufwaka, kento ya yandi vwandaka muntu ya lunangu. Yandi vwandaka ya kuswaswana, mutindu dibuundu bubu yayi. Yandi kwendaka mpe kotisaka bawu nionso kintwadi. Yandi nataka misiku, mpe losaka bawu nyonso na yinzo ya lufundusu, “Nge ke futa ba-facture yayi, na mutindu nyonso!”

³⁶⁹ Kasi zuzi bakaka ndambu ya mukanda, yandi tubaka, “Kwisa awa, mama.” Yandi tubaka, “Yayi kele ntinta ya mbwaki signature ya bakala ya nge?”

Yandi tubaka, “Yinga, tata, ya kele mutindu yina.”

³⁷⁰ Yandi tubaka, “Ya kele ve na yinzo ya lusambusu na yinsi yina lenda kunwa bawu. Ba kele na kimpwanza.”

³⁷¹ Bika bawu tuba yina bawu zola. Yandi sonikaka Ndinga ya Yandi na Menga ya Yandi Mosi. Ya kele ve na kima yina lenda katula yawu na beto, mpangi-bakala. Beto kele na kimpwanza.

³⁷² Beto sambila. Ya kieleka beno . . .

[Mpangi mosi ya bakala na kati ya dibuundu ke pesa mwa malongi ya nkindusulu. Kisika ya mpamba na bande—Mu.]
Amen.

³⁷³ Ntangu yayi na bayintu ya beno ya kukulumusa. Kana mu me bakula, mosi me telama na kati-kati ya bawu, na bilumbu ya ntinu, mpe pesaka profesu, kisika bawu zolaka kutana na mbeni mpe kubebisa bawu. Ntangu yayi, kana mu me bakula yawu mbote, ya kele na kisika mosi samu na kukutana na mbeni ya beno, ya kele na Ndinga. Ya kele kisika yina yandi ke na kumeka na kukutana na beno. Beno ke kutana na yandi kuna na MUTINDU ME TUBA MFUMU.

³⁷⁴ Bantu yikwa awa, na bayintu ya beno ya kukulumusa, (ya me kuma pene-pene mingi na midi, mu ke na ntangu ve samu na lubokilu na autel kasi kaka yayi) ke telemisa maboko ya beno, na bayintu ya beno ya kukulumusa, meso ya beno ya kukangama, “Mu zola vwanda kitini ya Yandi. Mu zola kota munu mosi na Yandi mpe Ndinga ya Yandi. Ya lenda vwanda yina ke kwisa to ke kwenda, yina yinza ke tuba, mu zola vwanda kitini ya Yandi,” beno telemisa diboko ya beno mpe beno tuba, “Mu ke sala”? Nzambi sakumuna nge. Nkama na zulu ya nkama, mu ke kwikila.

³⁷⁵ Na bayintu ya beto ya kukulumusa, na yina beto ke banza, beto yimba na malembe mwa nkunga yayi ntangu yayi. Muntu nyonso kusambila.

Nsinga ya ngwisani kusakumuka (Yina kele Ndinga.)

Bantima ya beto na zola ya Buklisto;

Ngwisani ya mpeve mosi

Ya kele mutindu yina na Zulu.

“Mutindu Munu mpe Tata ya Munu kele mosi, beno kele mosi na Yandi, mpe.”

Ntangu beto ke kabwana,
Ya ke pesaka beto mpasi na ntima;
Kasi beto ke vwanda dyaka ya kuvukana na
kati ya ntima,
Mpe kivuvu na kukutana dyaka.

³⁷⁶ Kilumbu ya sambanu yina ke landa na suka na Flagstaff, na Arizona, kana Mfumu kuzola, mu banza kukutana na beno dyaka. Beno zola Yandi?

³⁷⁷ Ntangu yayi mu ke bika kaka yawu mutindu yina, beno me mona. Biblia ke tuba, “Bayina nionso kwikilaka Yandi, mpe bayina nionso yambaka Ndinga.” Beno me mona? Mu lenda tuba ve nani kele to nani kele ve, yina me tala beno. Kasi kana beno ke kangama na mwa credo mosi, bayankaka na kati ya beno ba-Methodiste, ba-Baptiste, to ba-Pentecotiste, to konso muntu yina beno lendaka vwanda, yina me kangama na kima ya kuswaswana na Ndinga yina, pardo, bantu ya munu ya luzolo, beno baluka na yawu, bubu yayi. Beno zola ve? Beno baluka na yawu, mpe beno baluka na Yandi. Beno bika ve Ndinga mosi kuzenga beno na kimpangi ya Klisto. Bika ti Mpeve ya Yandi kupesa yayi.

³⁷⁸ Tata Nzambi, bantu yayi me vwanda awa kubanda ntama. Ya ke bambuka munu moyo kilumbu mosi yina Paul, na kulongaka na nzila yayi mosi, ya vwandaka Nsangu ya mbote, bawu vwandaka mpimpa ya muvimba mpe kuwaka yandi, ntwenya mosi ya bakala kubwaka na nela mpe kufwaka. Paul kwendaka mpe tulaka nzutu ya yandi na zulu ya ntwenya ya bakala, mpe tubaka, “Luzingu me vutuka na yandi.” Ntangu yayi, Tata, ya kele na bambevo mpe bantu ya mpasi awa, ya kele na bayina kele na nsatu ya bisambu samu na banzutu ya bawu. Mu ke sambila, Nzambi ya Luzolo, kuingila ve tii lukutakanu. Ba fwana vingila lukutakanu mosi ve. Ndinga kele ntangu nyonso awa, ya kele Klisto. Mu ke sambila ti Nge ke belusa mosi na mosi ya bawu. Bika ti mosi na mosi ya bawu kuvwanda ya muvimba, Nzambi. Pesa yawu. Sakumuna bawu, bangolo ya bawu. Bawu zolaka vwanda awa ve, Mfumu, bawu zolaka kuwa Yayi ve, kana bawu kwikilaka Yawu ve. Ntangu yayi, Mfumu, ba me telemisa maboko ya bawu, ba ke kwikila Yawu, ntangu yayi bika ti Yawu kuzwa na kati ya bantima ya bawu, konso mulongi, mosi na mosi ya misambidi. Musumuki, ti yandi kuzwa Klisto; retrograde kuvutuka. Pesa yawu, Tata. Balusakumunu yayi beto ke lomba na Nkumbu ya Yesu Klisto. Amen.

Mu zola Yandi, mu zola Yandi,

Yandi tulaka nkumbu ya munu kuna, bamvula mingi me luta.

. . .zolaka munu ntete

Mpe futaka mpulusu ya munu
Na yinti ya Calvaire.


379 Beno zola Yandi? Ntangu yayi na yina beto ke yimba dyaka yawu, beno tanda kaka diboko na zulu ya mesa mpe beno pesa mbote na muntu mosi, beno tuba, “Kizyeti ya luzolo, mu kele na kyese na kuvwanda awa na suka yayi. Mu ke kwikila Klisto. Ve?” Kima mutindu yina, ntangu beto ke yimba dyaka.

mu . . . (. . . ? . . .)
. . . futaka mpulusu ya munu
Na yinti ya Calvaire.

380 Ntangu yayi, kubanda ntangu yayi, beto me manisa na yinza? Beto me manisa na bamvwatu ya yinza? Mpe . . . buzoba nionso, mpe bima yayi nionso awa ke ngenga, mpe ke basisa Nsangu ya mbote mpe ke sala kima ya mumbongo na yawu, mpe—mpe beto me manisa na yawu? Mutindu yina ve? Pesa munu kaka Yesu, yawu yina kaka mu zola. “Kuzaba ti Yandi kele Luzingu, zaba Yandi.” Mu zola Yandi. Beno zola Yandi ve? [Dibuundu me tuba, “Amen.”—Mu.] Oh, mutindu beto zola Yandi!

381 Ntangu yayi mu ke vutula kisalu na Mpangi Carl, mu zaba ve yina yankaka yandi ke sala.

382 Nzambi sakumuna beno. Mpe mu banza kumona beno diaka Lumingu ke kwisa, mpe kana mu lenda mona beno ve . . . to Kilumbu ya sambanu ke kwisa. Kana mu mona beno ve kuna, mona beno kuna na Tucson. Kana ve kuna, mu ke mona beno awa kilumbu ya kumi na sambwadi. Kana ve na yina, mu ke mona beno na Nkembo. Amen.

383 Mpangi Carl ntangu yayi, mu zaba ve yina yandi zola kusala na ntangu yayi, Mpangi Williams. 

64-1212 Ntangu Ya Kuyonzika
Kisika ya Kuyamba Banzenza Ramada Inn
Phoenix, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org